

# WANT

NIUSPEPA BILONG YUMI OL PAPAUA NIUGINI STREET 30 YIA NAU

32 pes      Namba 1,337      Wik i stat long Fonde Februari 10, 2000      70t

<b>Strongpela lo mas kamap long ol raskol</b>	<b>Praivetaisesen i no inap wok</b>	<b>Melpa Luteran sios i laik bruk</b>	<b>Ol nius long ovasis</b>	<b>Tok pilai wantaim Kanage</b>
pes 2	pes 3	pes 7	pes 19-20	pes 25 na 26

# Kabinet i no bik salim PNGB

## JOE KANEKANE i raitim

NESENEL Eksekutiv Kaunsil (NEC) i no oraitim tingting bilong praivetasesen komisien long salim PNGBC beng long wanem i gat strongpela bilip olsem planti ol arapela gavman bisnis na opis bai kisim taim.

Dispela long wanem ol dispela lain olsem Air Niugini, Telikom, PNG Habas Bod na Pos PNG i gat bikpela dinau mani long dispela beng.

Sapos nupela lain i baim PNGBC o papa long beng bai ol i kisim ol haus na samting bilong dispela ol kampani long bekim lon na tu ol bai salim dispela ol kampani long kos we gavman bai kisim bikpela taim moa long en.

Wanpela man husat i stap.

Kabinet i bin wanbel olsem toktok bilong salim PNGBC na ol grup kampani bilong em i mas wet pastaim na i noken hariap inap palamen i lukim na toktok tu long dispela wait pepa we i toktok long dispela praivetaisesen program.

Sampela minista tu i laik save long dispela wok bilong salim PNGBC bai go olsem wanem na bai i stap long klia na gutpela rot o nogat. Sampela kabinet memba i no amamas long pasin na rot dispela samting i kamap long en na laikim samting ya i mas stop hariap tru. Ol i save tu long wanem hevi bai kamap bihain taim gavman i salim PNGBC beng.

Wantok i klia olsem taim gavman i salim PNGBC na ol kampani grup bilong em, ol arapela kampani husat i pas wantaim em bikos long ol dinau (lon) bai bungim bikpela hevi.

I gat luksave olsem planti gavman bisnis na opis i gat planti milien Kina we i gat bikpela aigris long ol tasol ol i pas wantaim PNGBC olsem na sapos nupela

man i baim PNGBC, em i ken mekim wanem samting em i laik wantaim ol bisnis ya.

Planti bilong ol dispela bisnis tu i gat ol hevi long mani long wok bilong ol na i save kisim sapot long PNGBC. Na sapos PNGBC i pundaun long han bilong wanpela man, em i ken salim ol dispela bisnis grup.

I rogat veluesen o makim prais long ol dispela gavman bisnis na sapos ol lain i baim PNGBC, bai ol gavman bisnis ya i mas salim tu na bai gavman i no inap kisim gut mani long gutpela prais.

Dispela nius bilong salim PNGBC beng i kirapim planti toktok pait namel long ol pablik, yunien memba na ol kain kain grup tu na singautim praivetaisesen komisien long soim klia ol pepa bilong dispela samting bai ol i ken luksave long gutpela na nogut bilong en.


Jenerel seketeri bilong beng woka yunien Mark Phallen i ol

toktok bilong praivetaisesen Minista Vincent Auali i no gutpela tru. Bikos gavman i laik salim ol gavman bisnis long kisim mani bilong bekim ol dinau kantri i gat, tasol gavman i no tingting long givim sevis long ol liklik manmeri bilong pes.

Arapela yunien i singaut tu long i laik save wanem kain klia rot na stretpela pasin tru bai dispela praivetaisesen program i bihainim.

Jenerel seketeri bilong PNG Tred Yunien Kongres (PNGTUC) John Paska i rabisim ol toktok bilong Minista Auali na siaman Ben Micah olsem komisien i no glasim dispela samting insait tru long ol hevi bilong em bikos i gat planti askim i stap yet.

Minista Auali i askim ol yunien long i no ken bikmaus long nius tasol ol i mas go toktok wantaim em long wanem samting ol i save. Tasol ol i abrus tru na komisien i go het long mekim olgeta samting i kamap.



• Chris Moon wanpela turis husat i save wok olsem dokta bilong biknem basketbal tim Chicago Bulls long Amerika i sanap wantaim wanpela lokel man long Bilbil arere long Madang. Mista Moon i tok PNG i wanpela stail kantri long wol na em i amamas long kam raun na lukim. Foto: John Rei bilong TPA opis.

## Wewak haus sik i gat dinau long K64,400

WEWAK Jenerel haus sik long 1996 inap 1999 i bin baim Sief Eksekutiv Opisa bilong haus sik Dokta Linda Tamsen K64,400.89 ausait long emploimen o wok agrimen bilong em we i nogat stretpela tok orait.

Nesanel Helt Seketeri Dokta Puka Temu i tokaut long dispela insait long pas em i raitim i go long Ekting Siameri bilong Wewak haus sik bod Laura Martin.

Dokta Temu i raitim dispela pas long Misis Martin long Oktoba 8 1999 bihain long wanpela wok painimaut o odit wok we i bin kamap insait long fainensel operesen bilong Wewak haus sik. Dispela odit o sekap em Sief Intenel Odita bilong Helt Dipatmen i bin karimaut.

Insait long dispela pas Dokta Temu i tokim Ekting siameri olsem haus sik i egensim o brukim lo na peim dispela K64,400.89 i go long Dokta Tamsen.

Em i tok bikos long dispela as, Dokta Tamsen i gat dinau wantaim Wewak haus sik.

Wewak haus sik i no peim bosmeri bilong haus sik Dokta Tamsen dispela mani long wanpela taim tasol. Nogat. Haus sik i pem em lokng wanpela wanpela sek mani long ol arapela arapela samting namel long 1996 inap1999.

Long pas bilong em, Dokta Temu i tokim Misis Martin olsem mak bilong mani Wewak haus sik i poim Dokta Tamsen em K47,807.45. Tasol Wantok i sekim ol rekot na namba bilong mani na i painimaut olsem haus sik i peim K64,400.89.

Wantok i gat kopi bilong dispela pas bilong Dokta Temu i raitim i go long Ekting siameri bilong Wewak haus sik bod long Oktoba 8 1999.

Long pas bilong Seketeri Temu em i tokim Misis Martin olsem bai i moa gutpela long bod i

noken makim o apoinim Dokta Tamsen long dispela posisen bilong Sief Eksekutiv Opisa bilong Wewak haus sik. Dispela long wanem em i gat dinau long haus sik inaplong K64,400.89.

Em i tokim Misis Martin olsem bod i mas kisim sampela kain eksen long kisim bek dispela mani haus sik i peim i go long Dokta Tamsen. Na tu bod i mas tok klia long em (Dokta Tamsen) olsem bikos long disela hevi bod bai i no inap tingting long makim em long dispela posisen bilong Wewak haus sik Sief Eksekutiv Opisa.

• Rekot bilong Dokta Tamsen i yusim mani pes 2

# PLIS RIPO

**Madang:**

Wanpela man i bin kilim narapela man na kaikaim ai, lewa na samting bilong em, plis ripot i kam long Madang i tok.

Dispela samting i bin kamap long fas wik taim tupela man i kros pait Ono Woks kern.

Provinsel Plis Komanda Ben Simanjon i tok tupela man, Yakamup Makatu na Moropia Silkapi, i bin kros pait na bihain Silkapi i bin go long ples Makatu na kukim haus bilong em.

Orait, Makatu i ronim Silkapu wantaim naip na katim pes bilong em, tasol em i ronim Makatu i go, maski em i kisim bikpela bagarap na blut i kapsait long pes bilong en. Silkapi i sutim het bilong Makatu wantaim ston na em i pondau na dai. Bihainim dispela, Silkapi i katim na autim ai, lewa na samting bilong Makatu na kakaim, Mista Simanjon i tok.

Em i tok bihain long dispela, ol hauslain bilong Silkapi i belhat na katkatim em i go liklik na em dai.

Taim ol plis i laik go long ples na karimaut ol wok painimaut, ol ples lain i bin kisim bodi bilong tupela daiman na ronawe i go pinis long bus.

**Morobe:**

FOAPELA raskol manki i bin stilim K5,000 bilong wanpela man Makam, plis i tok.

Bosman bilong plis long Morobe provins Simon Yupam i tok dispela em laip seving bilong man Makam we em bin sevim long ol ya bipo i kam inap long mun Desemba 1999. Na bikos long Y2 K pret olsem ol kompyuta bai bagarap taim nupela ya i kamap long Januari 1, 2000, em bin rausim olgeta seving bilong em long beng na karim na halim long haus bilong em long ples Taranam.

Tasol ol stilman i bin hensapim em na stilim olgeta dispela laip seving bilong em

Inspekta Yipam i tok long bikmonig taim olsem long 3 kilok long Januari 26, foapela yangpela man we krismas bilong ol i stap namel long 20 na 22 i bin go insait long haus bilong man Makam ya na hensapim na stilim olgeta mani bilong em.

Em i tok grup ya i bin ronawe tasol man Makam i bin putim ripot long Nazdab plis stesen husat i bin bihainim dispela samting na holim pasim olgeta foapela ya. Ol bin kisim bek K1,000.

Inspekta Yipam i tok ol i sasim pinis foapela man ya long wokim stil pasin taim ol i holim samting bilong pait. Ol i wetim kot i stap.

Inspekta Yipam i tokaut long nem bilong foapela stilman olsem Francis Depe husat i gat 21 krismas, John Raicos husat i gat 22 krismas na Paul Simon Umete i gat 24 krismas. Olgeta tripela ya i bilong ples Tamaranik insait long Is Nu Briten tasol ol i save stap long Morobe provins. Namba foa stilman em long John Manavok i gat 24 krismas na em i kam long Apa Ramu eria insait long Madang provins.

Inspekta Yipam i tok pablik i mas luksave dispela stilpasin na sapos ol i holim ol mani we ol bin rausim taim ol i pret long Y2K binatang long pinis bilong las ya. ol mas go putim bek ol mani long beng gen.

Em i amamas long siksipela plisman long Nazdab husat i bin mekim gutpela wok na ol holim foapela stilman ya.

**Enga:**

Plis long Enga i painim pinis nainpela ka we ol ples lain i bin stilim taim ol i holim ol rotblok namel long Wabag na Porgera main long las wik.

Laspela long ol ka ya em ol plis i bin painim long Tunde taim sampela lain i bin putim toksave long ol olsem em i hait i stap long ples Wanepop, klostu long Laiagam.

# Tanis i tok ol Bogenvil pipel redi long toktok

**BARBARA MASIKE i raitim**

OL BOGENVIL lida i kamap long Pot Mosbi long dispela wik i tok ol Bogenvil pipel i redi long toktok na painim bel isi na gutpela sindaun bai dispela hevi bilong tenpela ya i pinis olgeta.

Na wanpela bikpela samting tru long ol dispela toktok em long politikel setelmen long pinisim dispela hevi.

Vais presiden bilong Bogenvil Pipel Kongres (BPC) James Tanis dispela wik i mekim dispela toktok taim ol lida i bung wantaim Gavana Jenerel Se Silas Atopare long gavman haus long Pot Mosbi.

"Mipela i redi long toktok na painim bel isi long dispela hevi, na moa mipela i redi long toktok long painim politikel setelmen," Mista Tanis i tok.

Mista Tanis i tokim Gavana Jenerel olsem dispela Bogenvil hevi i bin stat bikos ol asua ol koloniel masta na ol ovasis kampani i kamapim.

"Maski ol dispela hevi istap long mipela, mipela i stap wanbel long painim gutpela sindaun na bel isi long ailan bilong mipela," Mista Tanis i tok.

Mista Tanis i tok ol lida i amamas tru

long bung wantaim gavana jenerel.

Na em i askim Gavana Jenerel long go lukluk raun long Bogenvil long sampela taim bihain. Se Silas i tok em i amamas tru long lukluk raun long Bogenvil. Dispela em bai mekim long sampela taim bihain.

Pastaim tru Se Silas i tokim ol Bogenvil lida olsem hevi bilong Bogenvil bai pinis, tasol em bai pinis wantaim helpim bilong God Papa.

"Papua Niugini em i kristen kantri. Dispela hevi bai pinis, tasol em bai pinis wantaim helpim bilong God Papa," Se Silas i tokim ol.

Em i tokim ol tu olsem God tasol i ken pihsim olgeta hevi bilong olgeta pipel.

Em i tok tingting bilong nesenei gavman long bungim ol komiti kam long tupela sait wantaim na sindaun na toktok long Bogenvil em i wanpela gutpela tingting stret.

Na em i askim olgeta lida bilong Bogenvil long toktok na wok wantaim olgeta memba bilong Bogenvil long stret sindaun long ailan.

"Na tu long dispela taim mi laik tenkim nesenei gavman, ol Bogenvil lida na ol pren bilong Papua Niugini olsem Australia na Nu Silan long olgeta helpim bilong ol long ailan," Se Silas i tok.

# Lo i isi tumas long ol raskol, Wakon i tok

LO bilong Papua Niugini i save isi tumas long ol trabelman we ol i save go het yet na mekim planti bikpela trabel moa olsem kilim man i dai, bagarapim ol meri na ol bikpela stil pasin, Plis Komisina John Wakon i mekim dispela toktok.

Mista Wakon i tok ol kot i mas kamapim kapitol panisemen bai ol trabelman husat kot i painim i asua long ol bikpela trabel i ken hangamap.

Mista Wakon i tok ol bikpela raskol pasin i kamap bikpela pinis long Papua Niugini we ol i save bagarapim ol gutpela manmeri wantaim ol strongpela strongpela birua samting bilong pait.

Mista Wakon i tok ol plisman i redi long

pait egensim ol hevi bilong lo na oda insait long kantri na ol i no inap sruk bek long ol toktok bilong wanpela ol tupela lain tasol husat i yusim Humen Rait lo long daunim wok bilong plis fos.

Em i tok Jastis Dipatmen i mas lukluk strong nau long kamapim kapitol panisemen bai ol raskol i ken save long pawa bilong dispela lo na i ker pret.

Yumi mas kamapim lo bilong bekim bek rong (Inglis ol i kolim, eye for an eye na tooth for a tooth). Bikos hevi bilong lo na oda i bikpela tru na i bagarapim nem bilong PNG long ovasis na long hia yet, em i tok.

Mista Wakon i tok ol plisman tu i mas

Dispela deligesen bilong Bogenvil namba bilong ol inap olsem 14 na ol i kamap long Mosbi long toktok wantaim ol sampela nesenei gavman lida long ol sampela bikpela toktok tru pastaim long bikpela miting bai kamap klostu.

Ol dispela bung bilong ol i stat este taim ol i bung wantaim ol foapela memba bilong Bogenvil yet, Moi Avei na Hai Komisina bilong Australia.

Long tude ol bai bung wantaim Spika bilong palamen Bernard Narokobi, Oposisen lida Bill Skate na mista John Pundari.

Long Fonde nait Nesenei Kepitel Distrik Komisen bai lukautim wanpela kaikai bilong ol dispela lida na long Fraide ol bai bung wantaim Ministia bilong Bogenvil Afeas Se Michael Somare.

Se Silas i tok welkam long ol lida na luksave long ol sampela poro bilong em husat bipo em i skul wantaim long Kambuvu long Rabaul, Is Nu Briten provins.

Ol sampela lida long dispela deligesen em long Thomas Anis, Joel Banam, Joe Watawi na Jonathan Ngati.

Se Silas i givim ol lida ya wanpela sek inap long K5000 long helpim ol wantaim ol slip na kaikai ples bilong ol.

kisim sapot bilong olgeta lo opis we i save lukautim na go pas long kamapim lo long stretim hevi bilong lo na oda insait long kantri.

Em i tok ol raskol lain i no save wari long wokim trabel bikos taim ol i kisim sas, ol i gat ples bilong slip gut na kisim fri kaikai.

Ol turangu lain husat i bungim birua na trabel i wok long wari na kra i stap, ol trabel lain i raun gut na amamas i stap bikos lo i isi tumas long ol.

Em i tok hevi bilong lo na oda insait long kantri i bikpela samting tasol ol plisman i wok hat tru wantaim wanem kain samting ol i gat long traun daunim dispela hevi.

# Ol beng union tok lukaut long gavman

OL union wokmanmeri bilong beng i tok lukaut long pasim olgeta beng insait long Papua Niugini sapos gavman i go het na kamapim dispela praive-taisesen program. Praive-taisesen program em bilong salim olgeta gavman bisnis, wanpela long ol em haus mani bilong Papua Niugini, PNGBC beng.

Dispela tok lukaut i kam long ol union memba bilong PNGBC beng we i kam aninit long bikpela nem Finance Pacific.

Yunion i askim gavman long soim ol dispela pepa ol i kolim White Paper we i gat ripot bilong praive-taisesen program long en. Ol i laik lukim dispela pepa long dispela wik o nogat, bai bikpela straik i kamap we moa long 2000 wokmanmeri bilong PNGBC beng bai kirapim straik.

Yunion jenerel seketeri Mark Phallen na presiden Joseph Kabilu i tokaut strong olsem praive-taisesen komisin siaman Ben Micah i mas soim dispela wait pepa long ol bai ol i ken lukim wanem i gutpela na nogut long dispela program bilong gavman.

Ol i tok sapos ol i no kisim dispela wait pepa, bai ol i pusim olgeta wan wok bilong ol long olgeta PNGBC brens insait long olgeta provins long pasim beng. Dispela rot ol bai mekim long pusim gavman long holim bek disisen bilong em long salim PNGBC beng.

Jenerel seketeri bilong Papua Niugini Tred Yunion Kongres (PNGTUC) John Paska i tokaut strong tu olsem gavman i mekim pasin nogut tru long mekim ol samting hait tasol na i no mekim klia long ol pipel bilong Papua Niugini i save long ol senis em i laik kamapim long kantri.

## Wewak haus sik i gat dinau long K64,400

**I kam long pes 1**  
Rekot bilong Dokta Tamsen i yusim mani:

Cheque No	Date	Amount	Particulars
157428	12.2.98	K3,300	School fees
155681	18.12.97	K1000	X-Mas party of sections in hospital
159191	21.5.98	K486	Security reasons. Husbands grief with CEO.
154269	12.11.97	K13,391.63	No reason
-	1996	K800	House girl
-	1996	K840	House girl
-	1996-97	K840	gardener
-	1997	K480	gardener
-	-	K943.11.	PTC
-	-	K1205.53	Elcom
-	-	K8282.99	School fees
161460	11.6.98	K3,250	No reason
-	-	K2500	Settling in new job
-	-	K750	reimbursement, domestic servant
-	-	K482.39	<u>Utilities paid for 1998</u>
-	-	K626.77	Elcom
-	-	K62.52	PTC
-	-	K62.52	Water
165178	10.9.98	K2,109.25	Rental on study
166927	12.11.98	K1,921.55	rental on study
172129	19.1.99	K2,617.80	Rental on study
174875	30.3.99	K3,868.82	Rental on study
174982	4.4.99	K5,539.96	Rental on study
185673	28.9.95	K6,751.28	Back date gratuity
-	-	30.9.97	pay No 5 of 1998 dated 13.3.98

Dairekta Fainens na Edministresen bilong Wewak haus sik bai kisim toktok bilong ol haus sik bod long dispela wik long tokaut long ol dispela samting na tu tok klia long wanem as na ol i laik peim Dokta Tamsen K2,760 long ovataim alawens.

Wantok i traun: long kisim toktok bilong Dokta Linda Tamsen tasol i hat.

## WANTOK

All departments. Phone: 325 2500 - Fax: 325 2579  
P. O. Box 1982, Boroko, NCD, Papua New Guinea

**Publishing Weekly, Thursday, for  
Word Publishing Company Ltd.**

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Ltd.

General Manager and Group Editor in Chief: Anna Solomon. Acting Advertising Manager: Jocko Oberleuter  Editor of Wantok: Yakam Kelo.	Papers distributed by air throughout PNG. Available by air mail subscription within Papua New Guinea and overseas.  Email address: <b>word@global.net.pg</b>
--	--

Advertising deadlines, Display bookings: Tuesday midday; Camera ready copy: Wednesday midday. Classified Advertising: Wednesday 5pm.

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd. and are set out in full on the reverse side of its official display Advertising Bookings form.



# Praivetaisesen i no inap helpim PNG, Paska i tok

TINGTING bilong Gavman long salim Papua New Guinea Banking Corporation (PNGBC) na ol arapela kampani insait long Finance Pacific Group of Companies wantaim ol arapela (praivetaisesen) i no inap helpim PNG, Seketeri Jenerel bilong Trade Union Kongres, John Paska i tok.

Mista Paska i tok maski sapos gavman i salim olgeta gavman bisnis na i kisim K1.6 bilion, dispela mani i no inap bekim bek ol arapela dinau gavman bilong Sir Mekere Morauta i mekim.

Em i tok Gavman i tingting long kisim US\$200 milion i kam long ol Pren bilong PNG na tu US\$400 milion i kam long Wol Beng na Intanesenel Monitori Fan. Dispela em i olsem K2 bilion olgeta.

Mista Paska i tok praivetaisesen em i no rot bilong rausim PNG long hevi bilong mani. Em i tok wanem samting Gavman i mas mekim em long kamapim

wanpela sistem we i gutpela long ol pipel bilong PNG long tingting bilong ol pipel bilong PNG yet na i no tingting bilong Wol Beng na ol arapela ausait save lain.

Mista Paska i bin autim dispela toktok taim em i sapatim toktok bilong ol eksekutiv bilong Finance Pacific Workers Union long Mosbi long Tunde.

Ol mausman bilong Finance Pacific Workers Union i pasim tok long holim wanpela stop wok sapos Gavman i go het long salim PNGBC na ol arapela gavman bisnis.

Ol i askim tu Gavman long givim ol 'White paper' long toktok bilong praivetaisesen olsem bai ol i ken tokaut klia long ol gutpela na nogut bilong pasin gavman i tingting long salim ol gavman bisnis.

Ol i tok tu olsem gavman bai westim mani bilong ol pipel bilong PNG long salim ol gavman bisnis.

Jenerel Seketeri bilong

Finance Pacific Workers Union i tok yunion bilong ol i gat samting olsem 3000 wok manmeri. Ol i wok insait long Motor Traffic Registry Services, Rural Development Bank, PNGBC, Namba Wan Finance, Pacific Mechante Mutual Insurance na Motor Vehicle Insurance Limited.

Em i tok sapos Minista bilong Praivetaisesen Vincent Auli na Siaman bilong dispela komiti i no givim gutpela bekim long ol, ol bai stapim wok inap gavman i rausim tingting bilong praivetaisesen.

Ol eksekutiv bilong Finance Pacific Workers Union i no tokaut long wanem taim stret we ol bai stapim wok.

Mista Paska na ol arapela Workers Union eksekutiv i bin stap tu insait long dispela kibung na tok olsem ol arapela yunion i redi long sapatim PNGBC na ol arapela gavman bisnis long stapim gavman long salim ol gavman bisnis.

# Ol papamama bai straik long Isten Hailans edministresen

MAK olsem 500 skul tisa insait long Isten Hailans provins i nogat posisen o ples bilong wok long dispela yia. Na dispela bai givim bikpela hevi long moa long 2000 skul pikinini insait long Isten Hailans provins.

Deputi siaman bilong Provinsal Skul Bod Alfred Sabumei i tokaut long dispela hevi long aste long radio stesin Nokondi FM.

Mista Sabumei insait long dispela toksave bilong em i askim olgeta papamama, ol skul tisa na ol skul bod long kamap bung long Mande neks wik long Goroka Peace Park

oval long tokaut long ol dispela bel-hevi bilong ol.

Mista Sabumei i tokaut tu olsem edministresen bilong Isten Hailans tu i save long ol paul pasin we i bin kamap las yia long ol mani bilong skul subsidi tasol ol bosman bilong edministresen i no mekim wanpela samting. Ol i no panisim wanpela wokman long dispela paul pasin long mani bilong skul subsidi.

Dispela hevi bilong ol skul tisa i nogat spes long tis i bikpela hevi tu long planti hap bilong provins we planti tisa i stap wetim posting na nem bilok ol istap long pul i stap.

# Ol Kwik Mani Bisnis i ken opim pasbuk long ol beng

**YAKAM KELO i raitim**

PAPUA Niugini Benking Kopresen (PNGBC) i wanbel long U Vistract na ol kwik mani bisnis long opim pasbuk bilong ol long beng bai ol ovasis mani bilong ol i ken kam insait long peim ol manmeri.

Ripot i kam long PNGBC beng i bos bilong U Vistract Noah Musingku i mas opim kampani akaun long PNGBC beng. Noah Musingku i gat pasbuk bilong em yet long hap.

"Noah Musingku i save gut na klia long wanem samting bilong mekim long opim pasbuk bilong em wantaim PNGBC beng bikos i gat planti miting na toktok wantaim em pinis. Astingting bilong opim pasbuk wantaim beng em long bringim mani long ovasis i kam insait long pasbuk na peim bek ol manmeri husat i bin betim mani wantaim U Vistract."

Ol bikman bilong Beng ov PNG i bin holim miting wantaim ol bosman bilong U Vistract long Fraide las wik na toktok i bin sanap wankain yet we Beng i askim U Vistract long opim pasbuk na karim ovasis mani bilong ol i kam. Beng i tokaut klia long ol bosman bilong U Vistract olsem nogat man o lo i stapim ol long opim pasbuk bilong kampani. Ol i ken opim pasbuk nau na bikpela wok bilong ol long mekim em long bringim mani i kam long pasbuk bilong ol.

I gat luksave olsem arapela Kwik Mani Bisnis tu i bin holim miting wantaim beng long Mande dispela wik. Na wankain toktok tu em ol i kisim long bringim mani bilong ol i kam long pasbuk bilong ol na stat long peim bek ol manmeri.

Planti bilong ol kwik mani bisnis i tok mani bilong ol i stap long ovasis na ol bai bringim i kam. Tasol beng i tok ol i mas bringim ol dispela mani i kam long pasbuk bilong ol o sapos ol i nogat pasbuk, ol i mas opim pasbuk wantaim beng nau long opim rot

bilong mani i ken kam long ovasis.

Beng i tokaut olsem i gat tupela Kwik Mani Bisnis tasol i opim pasbuk bilong ol wantaim pipia mani tasol long PNGBC beng. Tasol i nogat wanpela nupela mani i go insait. Dispela mani i no inap tru long baim ol manmeri.

Long las wik yet bikpela tok pait i bin kamap namel wantaim Beng ov PNG na dispela biknem Kwik Mani Bisnis U Vistract insait long kantri.

U Vistract i tok strong olsem bos bilong ol Noah Musingku i stap pinis long ovasis na i laik kisim mani i kam long PNG long baim ol manmeri husat i putim mani wantaim ol. Tasol Beng ov PNG o Sentrel Beng i no oraitim ol long opim pasbuk bilong ol long putim mani i go insait.

Ol mausman bilong U Vistract i tok tu olsem Beng ov PNG i no opim rot bilong ol long kisim mani i kam long PNG na tu i laik save long wanem hap U Vistract i kisim mani long en.

Tasol Gavana bilong Sentrel Beng Wilson Kamit i tok olgeta toktok bilong U Vistract i giaman tasol. Sapos U Vistract i gat mani, em i ken bringim i kam long pasbuk bilong ol wantaim ol komesel beng. Nogat man o lo i stapim ol long bringim mani long ovasis i kam.

Mista Kamit i tok em i no bilip long dispela kain toktok bilong U Vistract bikos ol i laik sutim tok tasol long beng long pulim tingting bilong ol manmeri i go ausait na sut long beng tasol.

Mista Kamit i tok long rekot bilong ol beng, ol dispela Kwik Mani Bisnis i nogat mani long pasbuk, nogat nupela mani i kam insait long kantri olsem na i luk olsem ol Kwik Mani Bisnis lain i giamanim ol manmeri tasol.

Em i tok sapos husat manmeri i laik kisim bek mani bilong em, ol i ken kotim ol dispela Kwik Mani Bisnis lain. Bikos em i nogat bilip long ol Kwik Mani Bisnis na i ting ol i nogat mani.

# Plis kisim salens long sutim pipel

**WENCESLAUS MAGUN i raitim**

PASIN ol plis i bin sutim 5-pela yangpela man husat i bin traim long stil long Papua Niugini Beng (PNGBC) Mosbi, long Fraide Desemba 17 las yia, i kirapim planti bel hevi long ol pablik.

Planti ol non gavman ogenaisesen, ol sios grup, ol save man bilong lo, ol pipel bilong Papua Niugini na ol famili bilong ol lain ol plis i bin kilim, i wok long sutim tok long ol plis long mekim pasin nogut.

Tasol long taim ol plis i bin sutim ol dispela 5-pela yangpela man, Plis Komisina John Wakon i bin apim nem bilong ol plisman bilong em long mekim wanpela gutpela wok.

Plis i bin sutim Jonathan Davis 23 bilong Yule Ailan Sentral provins, Alex Hedai 29 bilong Kelabo long Koroba Sauten Hailans provins, Christopher Baru 29 bilong Pinu Sentrel provins, Isaac Mana 24 bilong Garima long Tapini Sentrel provins na Emmanuel Oveke 32 bilong lori long Ihu distrik Gulf provins, taim ol i bin yusim wanpela helikopta long traim long stil long PNGBC Mosbi.

Long taim ol i bin traim long ronawe ol plis i bin sutim helikopta i go daun na sutim ol dispela yangpela man.

Dispela hevi nau i stap long han bilong Coroner Minty Mae long Waigani Distrik Kot long Mosbi.

Mis Mae i tok long mekim wok painim i go insait na sasim ol lain i brukim mama lo na intanesenel human rait lo insait long dispela hevi, em i mas kisim inap stori



• Ol Nesenel Kot Jas i sanap lain long fran na olgeta loya i sanap long baksait. Dispela em long open de bilong Ligel Yia long dispela wik. Foto: ISSAC IKUAVI.

(evidence) i kam long ol ai witness.

Em i tok i kam inap nau em i nogat inap ripot. Olsem na em i askim olgeta ai witness, na ol man o meri husat i save long pasin ol plis i sutim dispela 5-pela yangpela man long go long opis bilong em na givim ripot kwik bai ol i ken karim aut dispela wok painim.

Mis Mae i tok opis bilong em bai op long 9:30 moning long Tunde Februari 14 bilong kisim komplem na ripot i kam long ol ai witness na ol man o meri husat i save long pasin ol plis i bin sutim ol dispela yangpela man.

Em bai amamas tu long ol loya bilong ol dispela 5-pela yangpela man long bungim em tu long dis-

pela taim na givim ripot bilong ol.

Mis Mae i tok dispela ol ripot bai helpim Coroner long pinisim kwik dispela wok painim na kotim husat ol lain i gat asua long dispela hevi.

Em i tok wanpela hevi i mekim dispela wok painim i go isi em bikos ol plisman yet i stap insait long wok painim i go insait long dai bilong dispela 5-pela yangpela man.

Mis Mae i tok long karimaut wanpela gutpela wok painim i go insait long kain ol bikpela hevi olsem we ol plisman yet i stap insait long en, i moa gutpela long ol ausait lain o ol man i no holim wok olsem plisman o meri i mekim.

# TORO

NUPELA KAIN REGIS I KAMAP LONG SHOOTAS KIAB OL I KOLIM "PLANET ROCK" (DISKO)... HUSAT IDANIS GUT BAI KAMAP KING BILONG DISKO...

PLANET ROCK DISCO!!

BAMI GO TRAIM!!!

TORO LAIK TRAIM NA EM GO PUTIM NEM...

NEM...

KING DISK

PLANET ROCK

NAU EM I KAMAUT NA MEKIM OL STAIL DISKO BILONG EM...

HAI BAI YU SAVE, BAGA MEKIM KAIN KAIN STAIL NA EM TENGOLIM EM YET NA OL I KARIM EM I GO LONG HAUSSIK...

# Kalabus sumatin kisim sans gen

Walter Darius i raitim

FAIVPELA kalabus skul sumatin long Keravat i laki bikos ol gat sans long skruim edukesen bilong ol taim ol i stap yet long haus kalabus.

Keravat haus kalabus long dispela yia i wokim rekot insait long kantri long givim sans long ol kalabus sumatin i skruim edukesen bilong ol. Nogat narapela kalabus insait long kantri i save wokim dispela, ol ripot i tok.

Bos bilong ol kalabus lain long Keravat Kelly Karella i tok em i wokim dispela long soim ol arapela manmeri long kantri olsem ol lain i wokim ol kain rong na ol i stap long haus kalabus em ol man na meri olsem ol tasol. Na ol

gat rait long ol arapela i luksave long ol olsem.

Dispela faivpela yangpela man i stap long kalabus long tu na eitpela krismas long ol rong we ol bin wokim namel long 1998 na 1999.

Ripot i tok ol bai stap long haus kalabus tasol long san ol bai save lusim kalbus na go long skul. Foapela bilong ol i wokim ol matrikulesen kos long Yunivesiti senta long Vunadidir taim wanpela i wokim ol CODE kos.

Superintenden Karella i tok dispela kain sans we em i givim long faivpela sumatin ya i no save kamap insait long kantri tasol em no pret long traime long Keravat.

"Sampela long ol yangpela

pipel i bin stap long

Nesene Hai skul na tu long

yunivesiti

tasol bikos ol i

go kalabus, ol no

inap long go hetim skul bilong ol.

Mipela i luksave olsem ol gat

bikpela laik long skruim eduke-

sen bilong ol na mipela i givim ol

taim long lusim haus kalabus na

go long skul," Mista Karella i tok.

Long las yia, Katolik Sios i bin

peim ol skul fi bilong ol sumatin

tasol long dispela yia, ol bin

askim ol papamama long wokim

dispela.



# Bogenvil nogat gutpela rekot long populesen

BOGENVIL i stap 20 krismas bihain long rekot bilong kaunim olgeta manmeri na pikinini long provins. Na wok i mas kamap kwiktam nau long kaunim ol pipel, Provinsel Sensus Kodineta Hajily Kele i tok.

Misis Kele i tok laspela kaunim bilong ol pipel i bin kamap long Bogenvil long 1980. Bikos long hevi long ailan, ol no bin holim sensus wok long 1990. Dispela i namba tu nesene sensus bihain long PNG i kisim independens long 1975.

Misis Kele i tok em i gutpela long ol pipel bilong Bogenvil long sapotim 2000 Nesene Plening Sensus, moa yet taim taim ol wok long stretim ailan i go het. Em i tok provins i laikim ol infomesen data long yusim long ol plening wok bilong em.

Long wankain taim tu, ol wok redi bilong karimaut sensus long provins i go gut, maski i gat hevi long komyunikesen na trenspot samting.

Misis Kele i tok ol Sesus Yun i insait long olgeta distrik i pinis na ol i putim ol ripot pinis long registri. Arawa tasol i no yet. Tasol em i kisim ol ripot olsem Arawa Distrik bai stretim ol kaunim bilong ol pipel long distrik na salim i go long Buka.

I gat 12-pela distrik long Bogenvil. Na long Buka, Nissan na Atols distrik, ol opisa i wok long kisim rekot bilong ol haus na ol famili. Ol arapela bai wokim ol lista bihain long ol i wokim namba tu level trening bilong ol lista na lista supavaisa.

Wankain wok i kamap long ol arapela hap bilong kantri na dispela wok i stap aninit long lukaut bilong Nesene Stetistik opis.

Nesene Eksekutiv Kaunsil i no tokaut yet wanem taim bai Nesene Sensus i kamap.

# Ileksen petisen bilong Sir Julius bai kamap bihain long tupela wik

Noah Kagai na Nevil Choi i raitim

KOT bilong olupela Praim Minista na Kavieng memba Sir Julius Chan bai i go het bihain long tupela wik malolo, ol ripot i tok.

Dispela em ileksen petisen kot we Sir Julius i kisim memba nau i kisim ples olsem Namatanai memba, Ephraim Apelis i go long kot bilong sampela wok nogut we i bin kamap long taim bilong ileksen na em (Sir Julius) i lusim sia long 1997 nesene ileksen.

Dispela kotkes i wok i bin go het long laspela tupela wik taim nesene kot i sindaun long Kavieng. Na planti lain long Kavieng taun i soim laik long harim dispela kotkes, ol ripot i tok.

Las wik, ol witness i wok long givim ol toktok bilong ol na wok ya i bin pinis long dispela wik.

Sir Julius i tok em no bin laik wokim apil egensim Mista Apelis husat i wanpela hauslain bilong em tasol planti sapota bilong em i wok long strongim em long putim salens na kot i harim dispela keis.

Sir Julius i putim ileksen petisen



• Sir Julius Chan wantaim ol pipel bilong em long Namatanai. Ol pipel i amamas na sekanim em. File foto.

apil bilong em bihainim ol ripot we i sut long sampela ilektorel opisa i wokim sampela samting i no stret na tu, Mista Apelis i bin kisim sapot long ol opisa husat i go pas long ileksen na ol vota na olsem em bin winin Sir Julius.

Sir Julius i bin tokim Camillus Narokobi husat i loya bilong Mista Apelis olsem long wok painiamut em i wokim, mak bilong ol manmeri husat inap long vot i bin go daun long 5,000 (mak) long 1997 ileksen bikos moa i bin votim em long 1995. Kot i bin stat long harim ol toktok bilong ol witness long las wik Tunde taim Namatanai Distrik Kot i bin harim ol ripot bilong Anthony Drett husat i holim wok olsem Provinsel Ritening opisa.

Loya bilong Sir Julius em Michael Wilson i bin kisim foapela awa long putim ol askim na kisim ansa long Mista Drett long balot bokis namba 23 we i bagarap. Dispela bokis i gat ol vot long en. Narapela em we ol vota na sapota bilong Sir Julius i go na ol i lus na pasin we em no bin karimaut gut wok bilong em long sekim ol poling na patroling opisa.



# Ol asples mas go pas long ol wok bisnis long Bogenvil

Veronica Hatutasi i raitim

OL ASPLES pipel yet bilong Bogenvil i mas go pas long ol wok bisnis insait long provins, Sentrel Bogenvil memba Sam Akoitai i tok.

Mista Akoitai i bin wokim dispela toktok long taim bilong opening long Kieta bris long tupela wik i go pinis.

Gavana John Momis, Bogenvil Pipels Kongres Presiden Joseph Kabui, Nesene Fores Minista Michael Ogio na ol arapela bikman long Bogenvil administresen na ol bikman long Kopra Maketing Bod i bin stap insait long seremoni we i bin kamap long Kieta yet insait long Sentrel Bogenvil.

Long dispela taim tu, MV Rangitane wanpela ovasis sip bilong Singapo i bin karim 1,300 ton hevi kakau aut long Kieta Bris.

Mista Akoitai i bin tok em i amamas long lukim olsem Kieta Bris i op nau long ol ovasis sip long kam bikos dis-

pela bai strongim ol wok long stretim na kirapim bek ol sevis long ailan. Na tu strongim ol wok bilong kirapim bek wok mani long provins.

Em i tok insait long laspela 10-pela krismas, Bogenvil i bin stap long har bilong Nesene Gavman long sait bilong mani na dispela i no inap long karimaut ol wok long stretim ples na sindaun bilong ol pipel. Na taim Kieta Bris i op long ol ovasis sip long go insait, em bai strongim wok mani we provins i ken kamapim, Mista Akoitai i tok.

Mista Akoitai i putim strongpela toktok olsem ol asples pipel yet i mas go pas long ol wok bisnis long ailan.

Em i wokim dispela toktok bikos dispela i wanpela as long hevi long Bogenvil i bin kamap na em no laikim bai wankain samting i kamap gen.

Long wankain taim tu, Mista Akoitai i apil long ol pipel long lukautim Kieta Bris na ol sip we i wok long go insait long lusim na karim ol kago, kakau na kopra samting.



## Saweni i mas baim ol Aitape Lumi Kaunsela

WANPELA Aitape lida i tenkim Minista bilong provinsel na lokol level gavman na memba bilong Nuku, Andrew Kumbakor. Long kamapim pinis piksa long baim ol kaunsela bilong Nuku long sevis ol i givim long pipel long planti krismas. Na olgeta memba insait long Papua Niugini i mas mekim wankain.


Chawech Assin bilong Aitape i mekim

dispela toktok long taim em i singautim memba bilong Aitape Lumi, Eddie Saweni long painim mani na baim planti ol lapun kaunsela bilong bipo. We planti long ol i dai pinis na sampela i stap yet long sevis ol i bin givim long pipel insait long komyniti ol i stap long ol.

Aitape lida ya i tok nau ol open memba

bilong palamen i kisim K1.5 milien aninit long Rurel Eksen Proqram o RAP Fan bilong ol wanwan. Olsem na wanpela prairiti em long baim aut olgeta olpela kaunsela bilong bipo. Em i tok husat ol olpela kaunsela i bin dai pinis, sevis pe bilong ol i mas go stret long meri na pikinini bilong ol.

Mista Assin i tokaut olsem bipo long ol baim ol kaunsela, i mas gat wanpela wok painim aut ol opisa bilong ol memba i mas karim aut pastaim. Na dispela bai i tokaut stret long nem bilong ol olpela kaunsela stat long 1960 i kam. Olsem dispela bai i helpim ol long baim stret ol famili bilong ol kaunsela husait i dai pinis na husat long ol i stap laip yet.



• OL KAM GUD YA....Ol ami mangi o soldia boiniengu. Nogat ya, em ol sekyuriti gad bois bilong Sepik Konstaksen na Hadwe kampani long Is Sepik provins. Foto:Elvis Mathews.

## Redio Sandaun i no wok

FELIX RAMRAM i raitim

SANDAUN pipel i isi lain tumas long pilai wantaim bikos ol i no save bung long wantaim na tok pait long hevi. Peter Matin bilong Aitape i tokim Wantok long dispela, taim em i tok olsem i gutpela long pasim olgeta Redio Sandaun. Bikos piksa i klia olsem faivpela Sandaun memba insait long nesenel palamen i nogat tingting long fandim operesen bilong Redio Sandaun.

Man Aitape ya i tok i bikpela sem long lukim ol lida bilong provins i no wok bung long fandim redio stesen. Bikos planti taim stesen ya i save helpim ol long promotim as tingting na politiks bilong wanwan long dispela faivpela Sandaun palamen memba. Tasol long taim redio stesen ya i pas, i save kisim ol longpela taim painim mani na opim Redio Sandaun gen.

"Skelim Sandaun wantaim Manus, we i gat tupela palamen memba tasol. Redio Manus i no save pas olgeta taim o sapos i pas i no save stap longpela taim nogat. Yumi long Sandaun stat long 1997 i kam inap 2000, Redio

Sandaun i wok long pas klostu klostu. Tupela taim redio stesen i bin klos i stap winim fopela mun, na mipela i askim faivpela memba bilong Sandaun i stap we?

"Maski, NBC i mas tingting ken long klosim daun Redio Sandaun olgeta na trasferim ol wokman i go long ol narapela stesen. Ol lida bilong Sandaun i no soim olsem ol i gat wok long lukim olsem redio Sandaun i noken klos nating. Sapos em i mas pas orait em bikos long ol hevi bilong transmita o sampela teknikel bagarap, tasol em i noken pas bikos i nogat mani bilong baim pawa bil, telepon bil o karim aut mentenens wok", Peter Matin i tokim Wantok.

Wantok i save olsem planti taim Redio Sandaun i klos em bikos long ol hevi bilong transmita na ol narapela hevi long teknikel sait. Tupela o tripela taim Redio Sandaun i mas klos em bikos long ren i lik long het bilong bilding, na long hevi bilong pawa na telepon bil.

Menesmen bilong Redio Sandaun i tokaut olsem gavman bilong provins wantaim Edministreser, na Vanimo Green memba Micah Wes. i

bin givim helpim mani long ronim stesen. Taim ol narapela i no kam wantaim sampela kain helpim yet long taim stesen i save pas.

Ripot i tok nau yet Redio Sandaun i klos stat long Novemba 20 1999 bikos long ol hevi bilong masin bilong salim ol toktok. Inap nau menesmen i traime long painim sampela helpim mani long bringim tupela teknisen i kam long Pot Mosbi long stretim masin bilong salim ol toktok.

Wanpela liklik bisnis man na memba bilong Vanimo Eben lokol level gavman, Kym Downes, i tokim Wantok tu olsem. Sapos olgeta Sandaun palamen memba i ken givim K25,000 wanwan long ol, dispela bai givim bikpela helpim tru long lukautim na ronim bilong Redio Sandaun. Em i tok, klostu olgeta wik dispela stesen i save "brodkastim na promotim politik" bilong ol dispela faivpela Sandaun memba. Na em i stret olsem ol i namba wan lain long givim helpim long dispela stesen taim em i bungim hevi.

Mista Downes i kisim taim tu long tenkim wanpela memba, Micah Wes, Vanim Green MP long givim K50,000 long helpim Redio Sandaun.

## Ren pasim Tudjip ples balus

ADAM ELLIOTT i raitim

TADJIP ples balus long Aitape Sandaun provins i bin pas las wik bikos ples bilong ol balus i pundaun i gat hevi long longpela taim ren we i bin pundaun long eria.

Graun malumalum na ol ston i antap long ples balus i pretim ron bilong ol balus we ol pilot i luksave na tokaut long las wik Fraide. Olsem na ples balus i pas long las wik Sarere na bai op gen long pinis bilong dispela mun.

Wanpela bisnisman long Aitape Robert

Parer i tok ol wok long sampela eria bilong ples balus long las ya i no bin gutpela long ol ron bilong balus olsem na nau taim bilong ren na ol dispela eria i bungim hevi.

Wanpela greda we fran bilong em i gat loda na tripela dam trak i bin wok long las wik Sarere long stretim maus bilong dispela ples balus. Moa wok bai go het yet.

Mipela i gat hevi wantaim sampela hap bilong ples balus ya we ol bom long wol woa 2 i pundaun long ren, Mista Parer i tok. Olsem na sampela hap bilong ples balus ya i save holim wara long aninit.

## Vanimo bai gat maket buai yet

OL LAIN husat i save salim na baim buai i no long taim bai i gat maket bilong buai i stap bilong em yet arasait long Vanimo taun. Ol ripot Wantok i kisim i tok dispela i mas kamap bihainim ol nupela senis i kamap nau insait long Vanimo taun maket rul.

Vanimo Green distrik edministreta Tobias Welly tok olsem i tru ol nupela "lo bilong maket" bilong Vanimo taun i no bihainim stretpela rot long kamapim na i no bihainim lo. Dispela i no stapim opis bilong em long painim rot long sanapim nupela maket bilong salim, na baim buai, daka na kambang.

Em i tok i gat toktok ol i paitim yet long kisim sapat bilong ol lida bilong Wes Kos na Bewani husat long ol i kam aninit long Wutung Onei Bewani lokol level gavman. Sapos i orait long wantaim Vanimo taun atoriti i ken sanapim wanpela rurel maket. We dispela maket i ken givim sans long ol lain husait i stap arasait long taun i ken salim na baim ol kain kaikai na ol narapela samting long dispela maket.

Mista Welly i tok ol i no nap long tok orait long maket ples long Dasih nambis long stap olgeta. Bikos dispela hap i nogat wanpela luksave olsem ples bilong maket. "Mipela i tok orait long pipel i yusim dispela hap long sotpela taim tasol long taim Vanimo taun maket VTA i pasim long ol i mentenim. Nau ol i opim pinis taun maket, olgeta lain i bin yusim Dasih nambis bai i mas go bek long taun maket".

Mista Welly i go het na i tok em i no amamas long we VTA i go nabaut long apim maket fi i go antap bikos dispela i no bihainim stret rot bilong mekim ol dispela samting. Bipo long mipela i apim ol maket fi i kamap olsem lo, i mas gat LLG asembli i sindaun na pasim ol dispela wantaim ol narapela senis sapos ol i laik kamapim lo.

"Tasol bikos dispela i bihainim daireksen i kam long VTA edministresen, VTA i go het tasol long strongim olsem lo".

Vanimo Green distrik edministreta i

tokaut tu olsem opis bilong helt inspekta long Vanimo i raitim wanpela pas pinis. Bihainim daireksen i kam long opis bilong em na VTA long klosim Dasih nambis maket. Na dispela oda i sanap stat long namba tri de bilong Februari na i go, olsem na ol mama i noken yusim Dasih nambis moa.

Mista Welly i tok bikos dispela tambu i sanap long ol lain bilong buai long noken salim buai, daka na kambang moa long taun maket. Opis bilong em i orait long ol dispela lain i salim long sait rot maket klostu long wara Dasih.

"Tasol long ai bilong Vanimo Green distrik opis i tambu bihainim dispela daireksen i kam long opis bilong helt inspekta. Ai bilong opis i pulap long ol ais blok plastik. Taim ren i kam olgeta lain long maket i ron i kam na hait long opis. Ol i pasim ples bilong ol opisa bilong mi long mekim wok, na ol pipel i yusim ol liklik bus i stap klostu long nambis olsem ples hait bilong ol long tromei pekpek na pispis".

Ekting menesa bilong VTA Ronny Ambau i tok bikpela maket i op pinis stat long Januari. Na mak mani bilong wanwan mama o papa long salim ol samting insait long Vanimo taun maket em K1.00, na VTA i gat tingting tu long sasim fi long ol lain i yusim tolet. Em i tok, dispela mani ol i kisim i bilong baim ol pepa na ol narapela samting bilong yusim na lukautim tolet.

VTA bai i gat fopela sekyuriti opisa i lukautim maket na ol aua maket bai i op em Mande inap Sarere. Na maket bai i pas long Sande ful de na olgeta publik holido. Ol sait rot maket olsem Wesan Kem, Tawa, Wisipi, Pewih Kona Kot, Waraston bai i stap yet inap VTA i kamapim wanem ol tingting long bihain bilong ol dispela sait rot maket.

Tasol ripot i kam long opis bilong helt inspekta i tokaut olsem ol dispela maket "i mas gat ol rabis dram na ol tolet sapos ol i laik stap, nogat helt opis bai pasim ol". Helt inspekta Norman Powai i tok.

**Morobeen**  
**BEEF**  
**CRACKERS**

IGAT kick!

**HEPI BIRTHDAY**

**25%**  
**MORE**

**5 BISKETS INSIDE-1 FREE**

# PNG ken lain long wok bilong ol Good Shepherd Sista

HELEN REI i raitim

PAPUA Niugini ken kisim sampela skul long wok bilong ol Good Shepherd Sista long Bangkok, Thailand long pasin bilong wok wantaim ol grasrut long ol setelmen eria bilong mekim ol liklik wok na kisim mani long lukautim laip na famili bilong ol.

I gat wanpela grup bilong ol Good Shepherd Sista husat i kamapim wanpela program we i glasim ol hevi bilong ol pasin nogut we i kamap tude insait long developmen na i bagarapim sindaun bilong ol pipel, na moa yet bagarapim laip bilong ol yangpela meri na ol mama.

Planti taim long Thailand ol meri na ol mama i no save gat biknem na namba long sosaiti. Na planti taim ol i save painim bel isi na gutpela sindaun long ol ples olsem ol refuji kem olsem kain senta we ol Good Shepherd Sista i ronim.

Long 1965 ol Good Shepherd Sista i bin go statim wok bilong ol long Thailand. Tude ol i gat moa long 5-pela senta olgeta.

Wanpela bilong ol dispela senta em wanpela vokesenel trening



• Poto yia i soim planti ol samting ol Good Shepherd Sista i save mekim wantaim ol meri ol i lukautim ol long ol senta bilong ol. Ripota Helen Rei i bin go long Bangkok, Thailand long dispela yia na i kisim dispela stori na poto.

senta we ol i save skulim ol meri maski ol i kam long ol ris famili ol ol famili i nogat mani, haus, klos na ol samting bilong lukautim laip bilong ol.

Moa yet ol i givim moa taim long lukautim ol meri famili na sosaiti bilong ol i rausim ol, na ol meri i karim long rot ol meri i gat bel na man bilong ol i rausim ol na i go maritim narapela meri.

Ol dispela sista i ronim tu wanpela senta bilong lukautim ol yangpela meri i kam long ol famili marit i bruk, na ol meri ol man i laik paulim ol long mekim pasin pamuk.

Dispela senta i lukautim tu ol meri i drop aut long skul na i gat krimas namel long 11 i go long 18.

Long dispela senta ol Good Shepherd Sista i save kaunselim ol, skulim ol long 'sex' edukesen, komim na stretim gras, taip, kompyuta, na stretim ol flawa long bilasim haus, opis, o ples.

Astingting bilong dispela program em bilong lukautim ol meri bai ol i noken go insait long bisnis bilong salim ol yet na kisim mani.

Ol i save ronim dispela program long 5-pela mun olgeta. Ol meri i save stap insait long senta bilong ol sista na kisim skul bilong ol.

## Nain Mail Angliken peris gat nupela pater



• Bisop Michael Hough (namel) i odenim Pater Reginald Makele (raithan) long Sagsag peris Wes Nu Briten taim em i bin lukautim Daiosis long Wes Niu Briten. Dispela yia Pater Makele bai wok wantaim em gen long Mosbi.

PATER Reginald Makele bilong Sagsag eria insait long Wes Niu Briten provins i kisim wok olsem nupela peris pris bilong St Paul's Anglican Sios long Nain Mail, ausait long Mosbi.

Em i kam long Mosbi las wik wantaim ol famili bilong em na i holim namba wan misa bilong em las wik Sande long dispela peris.

Dispela em i namba wan taim bilong em lung kam aut long provins stat long taim ol i bin odenim em olsem wanpela pater.

Em i bin wok long All Saints peris long Kandrian inap long tupela yia bihain long odinesen bilong em long Newton Theological koles long Popondeta, Oro provins long 1997.

Taim em i stap long koles em i bin kisim odinesen bilong diken long 1996. Long 1997 em i greduet bihain long foapela yia bilong stadi. Na em i wok long provins bilong em long wanpela yia bipo long em i kisim sakramen bilong odinesen.

Em i tok nau em i namba wan

taim bilong em long mekim wok olsem wanpela pater long Mosbi na em i redi long bungim ol salens i kam wantaim dispela singaut. Tasol em i bilip God papa bai helpim em.

Pater Reginald i laik bungim na mekim pren wantaim ol pipel insait long peris bilong em na long daiosis.

Em i tok Mosbi em i wanpela bikpela intanesenel siti we pipel bilong kain kain kantri i wok na stap na em i gat laik long wok bung wantaim ol.

## Mosbi Angliken Daiosis kamap senta bilong trening

MOSBI Angliken Daiosis i go pas long kamapim wanpela senta bilong trenim ol pater, bruda na sista na ol wok manmeri bilong sios.

Astingting bilong dispela trening program em bilong givim moa save long ol wok manmeri bilong sios long wok insait long Papua Niugini na tu long ol arapela kantri.

Mosbi Daiosis Bisop Michael Hough i tok Pater Reginald husat bai lukautim Nain Mail peris, bai wok insait

long dispela trening program bilong daiosis long dispela yia. Em i tok dispela yanpela pater bai wok long Mosbi long tripela yia bipo long em i go long arapela daiosis long kisim moa ekspirians.

Em i tok ol i kamapim Mosbi Daiosis olsem senta bilong skul na kamapim gutpela save bilong wok na skul program insait long narapela tupela o tripela yia.

Bisop Hough i tok dispela bai helpim ol nupela na olupela pater na ol wok manmeri

bilong sios insait long daiosis long kisim moa save long wok long PNG na tu long ol arapela kantri.

Em i tok wanpela bilong ol namba wan pater i go long dispela program em bai Pater Denny Bray Guka bilong St Mary's peris long Gerehu. Em i tok aidia bilong dispela em long bungim ol misinari bilong ol arapela hap na Mosbi long wok insait long dispela trening program.

## UPNG bai gat nupela Angliken pater ...Na ol arapela senis i kamap

Bisop Hough i tok ol arapela senis ol i mekim long Mosbi Daiosis em ol i makim nupela pater bilong Yunivesiti bilong Papua Niugini, Pater William Dobunaba, wanpela nupela pater bilong Cape Rodney na wanpela Melanesian Bruda bilong Pivo Gulf provins.

Peter bilong Santu Martins, Boroko Patrick Doulin na meri bilong em bai kam long Australia sampela taim long dispela yia. Long wankain taim Angliken Sios i no makim yet nupela pater bilong Tabubil peris.

Bisop Hough i tok Mosbi Daiosis bai lukim sampela nupela samting long kisim wanpela Melanesian Bruda bilong Solomon Ailan na em i wanpela pater. Dispela pater bai wok long ol bus ples insait long kantri.

Bisop Hough i tok sampela Franciscan Bruda bai kam sampela taim long dispela mun long wok long Santu Francis peris long Koki. Em i tok long dispela yia Mosbi

Daiosis i putim olgeta tingting long trening na dispela trening program bai karamapim planti ol eria bilong wok bilong sios. Em i tok bai i gat trening bilong ol pater, bruda na sista olsem bai ol yet i ken rongim ol program bilong ol yet.

Bisop Hough i tok sinod bilong las yia i laikim bai i mas i gat trening bilong ol le lida na Patrick bai go pas long dispela program. Em i tok Pater Patrick na meri bilong em i gat planti save long trening program bikos ol i bin trenim ol tisa bipo.

Em i tok ol bai yusim Begabari hetkwata bilong Angliken Daiosis long Mosbi long ronim dispela trening program.

Bisop Hough i tok meri bilong Pater Reginald bai stap insait tu long trening program bilong ol meri bilong ol pater, we ol meri bai kisim trening wantaim helpim bilong Mama Banita Hough.

Em i tok taim ol pater i bung long kisim trening, ol meri bilong ol tu bai kisim wankain trening.



# Hailans Nius

## Nokondi Nama rekot long asples Goroka

**YAMES KAY i raitim**

"MERI KABIUFA i laik waswas stret long kol-ples Goroka"

Dispela em hap tqk pilai tasol, long toksave olsem pawa grup bilong Isten Hailans provins musik, Nokondi Nama i go bek pinis long rekotim namba wan album bilong ol long asples stret Goroka.

Nokondi i bin rekotim faivpela kaset album bipo wantaim CHM long Mosbi. Ol i bin stat rekot long namba wan album bilong ol long 1988. Planti manmeri tru i save laikim kain stail bilong musik bilong Nokondi.

Lida o franman bilong grup, Charles Uri Essyhafo i tok olsem tingting bilong em long lusim CHM na go rekot wantaim Kumul em long sapotim studio long provins bilong em yet na promotim lokal musik na studio wantaim.

Em i gat sampela ol narapela risen tu long lusim CHM, tasol dispela em i les long tokaut long en.

Yes, Charles Uri Essayhafo em wanpela stail man tru long raitim ol song na stretim ol musik bilong em. Long 1984 Charles yet i bin raitim dispela pawa song "Megusa" we i bin winim tru lewa bilong planti lain insait long kantri. Ol musik na kain stail bilong dispela song em i nais tru long harim.

Charles i greduet wantaim diploma long Nesenel Arts Skul (nau em Creative Arts Faculty bilong UPNG). Em i save gut tru long raitim musik na save long wanem kain stail we i gupela long go wantaim ol instramen olsem kibot, gita na ol narapela samting.

Em Charles yet husat i kamap wantaim tingting long kirapim dispela grup Nokondi Nama, nau yet i stap strong na pawa yet long Isten Hailans musik.

"Nokondi" em i wanpela tumbuna stori bilong Isten Hailans stret na long planti stori tumbuna long provins dispela samting i save kam olsem hap man wantaim wanpela lek na wanpela han. "Nama" em i min olsem karai

bilong musik. Yes, dispela em mining bilong Nokondi Nama, grup bilong Isten Hailans provins stret.

Nokondi Nama i rekotim namba wan album bilong en wantaim Kumul Studio, wanpela studio we i stap insait long Goroka taun na dispela i soim stret grup bilong Isten Hailans i go be na promotim provins.

Planti ol manmeri i save pinis long kain stail musik bilong Nokondi Nama. Ol i no save pilai kaskam nabaut. Ol i gat stail bilong ol yet we i narakain moa long ol narapela musik grup. Ol i kamaut wantaim stail we i bihainim tru kontemporari musik stail na we grup lida Charles Uri Essyhafo yet i laikim long en.

Nokondi Nama i bin kamaut wantaim pawa stret long stat bilong namel long 1990s wantaim ol strongpela song bilong en we i winim lewa bilong planti lain stret. Ol i kukim stret wantaim ol song olsem Meri Kabiufa, Arungo, Kumaniafi na planti moa.

Man husat i go pas long grup, Charles Uri Essyhafo na gitaris Michael Gideon na tupela enjinia George Siwi na Amos i mekim pinis bai kamaut aninit long lebol bilong Kumul Studio. yes Kumul Studio em i stap long Goroka taun na em i bilong wanpela man Papua Niugini stret, Pat Siwi.

Mista Siwi em bagaros we i save go pas long pawa grup bilong bipo em Whagi Hellcats.

"Dispela nupela album bilong Nokondi Nama em i gat gupela kala tru, na mi bilip planti fens bilong mipela bai laikim tru," Charles Essyhafo i tok.

Essyhafo, husat i wanpela hai skul tisa i stori olsem dispela nupela album i stori long planti gupela samting long laip na i gat gupela ol edvais i go long ol yangpela manmeri tude.

Sampela ol song i stori long sindaun insait long komyuniti na tu long dispela bikipela poret nau i stap long sait bilong helt em sik AIDS.

Charles yet i raitim wanpela song we i stori long dispela sik AIDS na ol sampela kain rot we ol yangpela manmeri i mas abrusim long daunim dispela bikipela hevi

insait long kantri bilong yumi.

Insait long dispela nupela album, Charles i tok em i rekotim 10pela song.

Ol sampela song insait long dispela album em: Welcome to Goroka-Freedom Land. Dispela sont i stori liklik long dispela gutpela taun Goroka, we i gat gutpela ol samting i stap na ol manmeri bai filim fri long wokabaut. Em i stori tu long gutpela pasin bilong ol pipel bilong Isten Hailans. Ol i save stap isi na soim rispekt long ol narapela pipel husat i go stap long provins bilong ol.

Narapela song em wanpela Provinsal song bilong Isten Hailans we Charles i raitim bihain long Gavana bilong provins Mista Peti Lafanama i bin askim em sapos em i ken kamap wantaim wanpela song we i stori long Isten Hailans provins.

Wanpela song we i gat kuk tru em long tok ples Bena. Song ya em Luva Hemilo. Charles i stori olsem dispela song i gat mining bikos em i stori long kain ol pasin bilong lo na oda. Song ya i askim long ol pipel insait long eria bilong Charles long Bena eria long traim stopim pait na kam sindaun na stretim tok na painim gutpela rot long stretim hevi.

Charles i singim wanpela song tu long tok Inglis. Dispela song em Crazy World. Dispela song i gut stret long kain kain ol hevi na trabel nau i stap long wol. Em i tu olsem nau yet insait long wol, i gat planti ol pait, trabel na planti lain i dai. Planti pipel tu i wok long poret long laip bilong ol. Dispela song i olsem stori bilong wanem samting o hevi we i kamap long wol tude.

Ol narapela song insait long dispela album em Santolina, Maunten Meri, Utu pepe na lorore.

Tupela song ya lorore na Utupepe em ol Siks-tu-siks song bilong Isten Hailans we planti lain i save amamas long en taim ol i danis o disko nabaut.

Yes, dispela nupela album bilong Nokondi Nama bai kamaut wantaim kik stret olsem na putim yau na opim ai na weitim tasol dispela taim em bai kamaut.



• Charles Esehaho lida bilong Nokondi Nama ben bai laitim paia gen wantaim Kumul Studio.

## Melpa Lutheran sios strong long bruk

WANPELA distrik bilong Evangelikal Lutheran Sios bilong Papua Niugini i strong long bruk lusim administresen bilong ELC-PNG long Ampo (LGC).

As bilong dispela bruk i kamap bihain long ol narapela pasin, em i kamap long pasin bilong kamapim lida we tupela lain grup bilong Lutheran sios long Hagen i no laik wok bung wantaim aninit long wanpela lida insait long Hagen distrik. Ol arapela tingting na pasin we i kamap bihain long dispela long levul bilong distrik na Nesenel sios wantaim i soim tru olsem dispela bruk bilong sios i mas kamap.

Dispela em wanpela nupela stori na planti kristen bilong Lutheran sios i askim planti long dispela.

Bikpela save we i kamapim dispela bruk em i no long narapela pasin, em i kamap tru long pasin stail bilong ol doti politiks insait long wok bilong sios.

Bruk long distrik levul i bin stat long yia 1985 long Koern viles long Hagen distrik. Long dispela konfrens ol bilip manmeri husat i bin kamap i bin vot long dispela taim long kamapim lida man bilong Lutheran sios Hagen distrik. Tupela man husat i bin resis em Rev. Zao Rapa na Rev. Sanagkec Dole. Man husat i winim dispela em Rev. Sanagkec Dole wantaim 84 vot na Rev. Zao Rapa i kisim tasol 66 vot. Bihain tasol long tokaut bilong dispela vot, Rev. Rapa na ol lain sapota bilong en i lusim floa bilong konfrens kamaut na go pinis.

Dispela pasin i kamap long wanem ol i no laik long Rev. Dole i stap olsem lidaman bilong sios long Hagen. Hevi bilong sios long Hagen i stat kalap olsem. Planti taim ol i traim long stretim dispela hevi tasol rot bilong wanbel na wokbung wantaim i no bin karim kaikai inap long planti krismas olgeta long wanem planti giaman pasin na ol hait tingling bilong sutim bel wantaim giaman toktok na daunim narapela narapela i stap bikipela tru.

ELC-PNG wantaim ol sios kaunsil na bisop kaunsil i no bin tru sanap strong long daunim ol dispela hevi." Ol yet i tanim tanim na dispela i kamapim moa hevi na rot bilong kamapim wanbel em i go hat olgeta.

Hevi i go strong na bikipela olgeta taim wanpela bung bilong sios kaunsil we olpela namba tu bisop bilong ELC-PNG Rev. Ray Rasowe wantaim ol memba bilong kaunsil i traim long stre-

tim tasol i go popaia na popaia olgeta.

Long dispela taim bung bilong ol sios kaunsil i wanbel na strongim olsem Rev. Zao Rapa i nau kisim wok olsem distrik presiden bilong Hagen na i no Rev. Sanagkec Dole. Dispela i min olsem Rev. Dole i no moa i gat pawa long karim wok sios olsem lidaman.

Long dispela hap stori ol memba bilong Lutheran sios nau luksave olsem pasin we i kamap i abrusim pinis sampela lo bilong sios na tu dispela "tok bilip" we sios i sanap long en. Pasin politiks bilong man insait long sios bilong God i soim aut stret. Wanpela samting yumi olgeta mas lukaut long wanem dispela kain pasin i ken bagarapim sios bilong God we Holi Spirit i kamapim pinis insait long manmeri bilong God yet na long pes na hat wok Krai Jisas i karim pinis.

Tru dispela bruk i kamap pastaim tru long pasin bilong kisim wok lida tasol bihain planti moa arapela hevi insait long sios yet kamapim hevi i go moa bikipela na dispela stap i kamap inap klostu olsem 15-pela krismas olgeta.

Long Januari 9, 2000 deklareren bilong sios i nau lusim ELC-PNG i kamap aninit long nem Melpa Lutheran Sios long ples Kontkong long hap klostu long Kagamuga ples balus.

Sios i rejista pinis long Gavman na tokaut pinis olsem Melpa Lutheran Sios bai sanap em yet. Planti tausen kristen manmeri i bin witesim dispela selebren-de bilong deklarim sios, tu i bin i gat "ol pesman na kristen manmeri bilong Simbu distrik husat tu i bin i kam witesim dispela (Simbu Saut/Is).

Dokta Wesley Kigasung Het Bisop bilong ELC-PNG em i no wanbel na i bin tok strong long dispela bruk i noken kamap taim em yet i kam long Kontkong long Fraide, 7 Januari, 2000, tasol planti piksa i bin kamap long dispela hap i soim stret bisop olsem em i leit pinis. Bisop toktok planti long dispela tu long ELC-PNG Sinod long Banz.

- Melpa Lutheran Sios em i sios bilong God Triwan na bai lainim kristen manmeri pikinini tok bilong God i sut long wankain rot na bilip Lutheran Sios i sanap.

- Melpa Sios em bilong ol bilip manmeri husat i kam bung long nem bilong God Triwan, ol yet i tokaut long karim dispela sios i go moa yet na dispela em i soim aut pinis.

## Simbu na Enga plis mekim gupela wok

**JOE KANEKANE i raitim**

OL plis long Simbu na Enga i mekim gupela wok long dispela taim.

Long Simbu ol plis i was na lukaut gut long pasin bilong hait na kisim bia na ol arapela strongpela dring i go antap long hailens.

Simbu Provinsal Plis Komanda Simon Kauba i tok ol i bringim moa plisman na meri i go long ples bilong sekim ol ka na ol lain i ron i go kam long hailens haiwe bai ol i noken karim ol bia na ol strongpela dring i go long hailens.

Em i tok tu olsem ol plis i holim pas pinis sampela lain na em i gat bilip ol bai holim sampela moa lain insait long dispela wok.

Em i tok stat long taim sampela nius ripot i tokaut olsem ol plis yet i wok long hait na kisim bia i go long hailens, ol plis i stat pinis long sekim gut ol plisman yet taim ol i ron i kam long dispela sekap ples.

Long wankain taim ol plis long Enga i kisim bek

plis 6-pela ka ol man nogut i bin stilim las wik long Laiagam na ol plis i bilip ol bai kisim bek tupela ka i lus yet.

Ripot i kam long Wabag i tok ol plis i lukim 6-pela ka na i kisim ol pinis bihain long ol i lukim ol long Marmale ples ausait long Laiagam long rot i go long Pogera.

Dispela ripot i tok wanpela bilong ol dispela ka ol i bilip i stap long Mendi na ol plis i save dispela ka i stap long wanem hap.

Ripot i tok ol plis bilong Wabag i putim kem long Laiagam we ol bai karim aut wok painim bilong ol i go insait long ol lain ol i bilip i stilim ol ka.

Ol plis i no holim pas yet wanpela man tasol ol i bilip ol i save long husat ol lain i stilim ol dispela ka na ol bai holim pas ol.

NBC Wabag i tok olsem ripot i kamap long nius olsem ol i 10-pela Landcruiser bilong Pogera i lus em i no tru. NBC Wabag i tok 8-pela bilong ol tasol i lus.





# Lae Nius

## Tok pait stapim Wau hai skul laibri

**YAKAM KELO na ARI GUH DANDEE i raitim**

Wanpela K70,000 projek bilong Wau hai skul long wokim laibri i no kamap yet bikos long planti tok pait namel long skul bod, taun kaunsil, kontrakta na Morobe provinsal tendas bod.

Morobe provinsal tendas bod i bin givim K70,000 kontrak i go long wanpela kampani bilong wokim skul laibreri long las yia. Tasol dispela wok i no stat yet bikos skul bod i laikim bai dispela mani i mas go long skul-na skul yet i ken kamapim dispela projek.

Bod siaman Danny Wele i tok Morobe provinsal tendas bod i asua tru long givim dispela mani i go long Siaco kampani long wokim skul laibreri. Bikos ol i bilip Siaco kampani i nogat pepa bilong wokim ol haus. Ol i save em kampani ya i save mekim wok tasol long stretim ol rot bilong ka.

Mista Wele i tok ol Morobe provinsal tendas bod i asua tru long givim dispela kontrak long kampani we i nogat setifiket long wok bilding olsem na ol i mas kisim bek mani na stapim kampani ya.

Siaco kampani i bin kisim dispela kontrak long las yia tasol i no bin statim wanpela wok i kam inap skul i stat pinis long las wik.

Tasol opisa bilong Morobe provinsal tendas bod Yalambing Bampung i tok ol i bin givim dispela kontrak long Siaco kampani bikos long rekot em i gat bipo wantaim Morobe edminstresen long mekim ol wok kontraksen na mentenens.

Mista Bampung i tok i nogat wanpela kampani i bin aplai long dispela tenda taim ol opim olsem na Siaco wanpela tasol i aplai na em winim.

Em i tok ol i ting i nogat wanpela kain bilding kontraksen grup o kampani i stap long Wau Bulolo eria olsem na Siaco em ol i klia gut bikos long olpela rekot bilong em wantaim gavman long bipo i kam long kain wok olsem.

Misat Bampung i tok em i save olsem skul bod i bin stapim ol wokman bilong Siaco kampani long i no ken go insait na mekim wok bilong ol long las wik. Olsem na em i tok sapos dispela pasin i kamap yet na stapim wok bilong sanapim skul laibreri, bai tendas bod i kisim bek dispela projek na skul bai i nogat laibreri. Na ol bai kisim bek mani long Siaco. Narapela tu em sapos dispela hevi i stap yet, bai ol i kisim wanpela kot oda long stapim ol lain na larim ol wokman bilong kampani i go het long wok bilong ol.

Em i tok tu olsem nau Siaco

i kisim dispela kontrak, larim em i go het na yumi lukim sapos em i ken mekim wok bilong skul laibreri i kamap. Givim em sans na yumi lukim. Sapos wok i no kamap gut, orait em i wok bilong tendas bod long kisim bek olgeta samting, em i tok.

Nesenel memba bilong Bulolo Samson Napo i tok em i no amamas tru long dispela kontrak long wanem kain rot em i kamap bihainim na long wanem taim tru dispela tenda i bin kamaut.

Mista Napo i tok i mas gat ripot i kamap long soim sapos dispela kontrak i go aut bihainim gutpela na stretpela rot. Em tok strong olsem kain projek olsem i mas bihainim gutpela na stretpela rot we tendas bod i mas glasim gut na skelim gut ol kampani husat i aplai long winim ol kontrak bilong gavman. Bikos nogut i gat sam-pela hait kampani i stap na i wok long wetim sans bilong pulim ol wok.

Em i tok gutpela wok bilong givim ol kontrak na projek olsem i ken kamapim gutpela helpim na developmen bilong Morobe provins.

Wau taun kaunsil opis i tok tu olsem ol i no amamas long dispela kontrak tendas bod i givim long Siaco bikos dispela kain projek em bilong ol Papua Niugini lain stret long mekim. Na i no ol ovasis kampani.

Ol i tok tu olsem long save bilong ol, Siaco kampani i no save mekim bilding kontraksen wok. Em i save mekim tasol ol wok bilong stretim rot o rot mentenens.

Wau kaunsil i salim pas i go pinis long Morobe provinsal tendas bod long tokaut long dispela wari bilong ol.

Ol i tok long save bilong ol tu, i gat ol lokol kontraksen kampani husat inap mekim ol biding wok olsem wokim haus na ol wok olsem. Tasol ol i no bin save long dispela tenda o projek taim i bin kamap. Long wanem as ol i no save tu long dispela projek em bikpela askim tu, ol i tok.



• Yangpela Rose Lydia Mano husat i makim ples amoa. Ples bilong memba Tukape Masani. Em i singsing long Sinugu Kalsa So las mun. Foto: Franco Nebas.

## Wau kaunsil eria gat nupela skul

**ARI GUH DANDEE i raitim**

Pipel bilong Bitoi insait long wod 8 bilong Wau lokol level gavman i bin soim bel amamas bilong ol long lukim namba wan taim tru wanpela kain senis i kamapim edukesen (skul) insait long Bitoi.

Plantu i krai bikos ol i painim hat tru long toktok long soim bel amamas bilong ol long lukim namba wan tisa bilong skul i bin kamap long Bitoi.

Wod kaunsela bilong Bitoi Tonding Fuba i bin tokim Wantok olsem dispela, em i namba wan taim tru long laip bilong ol pipel long Bitoi long lukim olsem nau em i yia 2000 na i gat lait nau i kamap long edukesen long ples bilong ol.

Mista Fuba i bin tokim ol pipel bilong em olsem long 1932 i bin i gat ol waitwan i bin i stap long Bitoi long painim gol tasol waitman i no developim Bitoi bikos, em i tingting long painim gol tasol na i ronawe i go pinis long taim wol woa 2 i kamap.

Long taim woa i pinis na Papua Niugini i kisim independens long 1975 i kamap inap long yia 1999, Bitoi pipel i bin kisim bikpela taim nogat tru long helpim o sevis bilong gavman.

Mista Fuba i tok moa olsem, pipel bilong Bitoi bai i kisim yet taim nogut sapos rifom sistem i no kamap, tasol em i amamas olsem Nesenel Gavman i kamapim rifom na pipel i lukim tru senis.

Em i tok taim em i bin winim sia bilong wod kaunsel long 1997 long kamap kaunsela bilong Bitoi, em i bin wok hat tru wantaim presiden Awen Erepe na Mista Francis Lowe bilong Wau lokol level gavman long bringim sevis na developim long Bitoi.

Wok hat bilong ol i no go nating nogat, nau yet Bitoi i gat wanpela aidpost na nau i gat wanpela nupela skul.

Kaunsel Tonding i tok skul i stat pinis wantaim tisa Mista LLOYD Sige na 51 samatin husat i statim gret wan (1) bilong ol, na i nogat hevi o trabel i kam bilong stopim ron bilong skul.

Olgeta pikinini wantaim ol papamama i amamas tru na soim bikpela sapot bilong ol long dispela nupela skul bilong ol.

Mista Tonding i askim ol pipel bilong em long lukautim gut sevis bilong gavman bikos sevis i no kam nating, i gat bikpela hat wok long mekim bipo long kisim sevis i kam insait.

Em i tenkim tu Wau lokol gavman kaunsel na edukesen dipatmen insait long Morobe long wok sapot bilong ol long kirapim Bitoi komyuniti skul.

## Songin pipel long Kabwum gat nupela skul

OL pipel bilong Songin wod eria we i karamapim Singin, Hem, Kawange, Yawung, Givelon na Nembo viles insait long Kabwum eria i gat nupela skul. Dispela skul i daunim planti hevi ol i save bungim bipo long wokabaut longpela hap rot i go long Ombo komyuniti skul. Nesenel memba bilong Kabwum Ginson Saonu i bin opim dispela komyuniti skul long Songin ples long Sande Jenuari 30, 2000.

Ol pikinini bilong dispela 6-pela i save wokabaut longwe hap tru i go long Ombo komyuniti skul.

Olsem na dispela hevi i pusim memba bilong ol Mista Saonu long kirapim dispela komyuniti skul long helpim edukesen bilong ol pikinini long ol dispela ples.

Mista Saonu taim em i opim dispela skul i

tokim ol papamama olsem ol i mas lukautim gut dispela skul bikos hevi bilong mani insait long kantri na tu hevi bilong ol tisa i sot i kamapim planti hevi insait long kantri. Dispela i stapim planti skul long opim ol nupela klasrum na skul.

Mista Saonu i tok bikos long hevi bilong ol pikinini i save wokabaut longwe hap long go skul, ol i gat dispela skul. Olsem na ol i mas kirapim dispela skul i kamap bikpela.

Yupela i no ken sindaun tasol na wetim gavman long wokim skul, dispela em skul bilong yupela, em i tokim ol pipel.

Taim Mista Saonu i bin kamap memba bilong Kabwum long palamen, em i bin kamapim pinis tripela top ap skul na 5-pela komyuniti skul na nupela skul. Ol plen i stap yet em Kabwum hai skul na vokesenel senta.

Mista Saonu i tok bai i gat foapela moa komyuniti skul i kamap na bihain long dispela bai i nogat moa nupela skul.

Long makim na tingim wok bilong Mista Saonu long bringim edukesen sevis long ilektoret, dispela nupela skul em ol papamama i kolim nem bilong em Saonu Memorial Komyuniti Skul.

Moa long 1000 manmeri i bin kamap long lukim dispela open de bilong nupela skul ya we i bungim tu ol bikman na lida bilong sios na lokol gavman kaunsil na tu ol distrik pablik sevans wantaim.

Ol lida i mekim bikpela tok amamas i go long Mista Saonu long skelim gut wok bilong edukesen sevis long ol wanwan hap bilong distrik na ol i givim sapot bilong ol long wok lidasip bilong em i ken go het yet.

# Napa Napa papagraun kros long wet

## KENNEDY EDENE i raitim

PAPAGRAUN bilong Napa Napa Oil Rifaineri projek i gat bikpela wari na singaut i go long ol divelopa Inter-Oil Pty Ltd na gavman long wanem as na projek i no stat.

Wanpela papagraun mausman Simon Geita bilong Rolen viles insait long Sentrel provins, klostu long dispela projek tok, wanem as na dispela projek i wet longpela taim tru.

Em i tok, ol pipel bilong em, ol i no amamas tru long dispela na long tok-tok long environmen o bagarap bai mi kam.

Mista Geita tok, dispela projek em inap stat long stat bilong las yia 1999 na bai inap stat long kamapim petroliem prodak long rifaineri long namel bilong 1999.

Mista Geita tok, dispela projek em nau longpela taim long stat na ol lenonai askim Inter-Oil Kampani na gavman long toktok gut long wanem samting tru i holim taim bilong projek.

Em i tok, sapos em wari bilong envaironmen, ol i ting na lukim nogat as tru bikos opis bilong Envaironmen na Konsevesen lain i lukim na givim orait pinis.

Em tok, Praim Minista bilong bipo Bill Skate yet bin graun brukim sere-roni long Napa Napa insait long Novemba 1997 na long dispela taim, gavman bin givim fainel tok orait, wantaim sainim bilong Napa Napa Envaironmen plen na developmen plen bilong em.

## SENTREL PROVINS RIPOT

Na long dispela as mipela singaut long divelopa Inter-Oil na gavman long kolim wanpela miting na toksave gut long as bilong dispela westim taim.

Em i tok, sapos i gat hevi long envaironmen orait ol mas tokim mipela stret na yumi ken painim sampela we.

Sait long Napa Napa, Motukea ol rifineri na Kopi Oil Rifaineri em tu ol lukluk long ol pastaim insait long 1997.

Motukea ol rifaineri em ol tok long buildim long kos olsem K160 milien.


Kopi oil projek em ol tingting long developim long wanpela Amerika Konsotium long Kikori.

Napa Napa kos em ol tok K167 milien olpela Skate gavman bin givim tok orait long em.

Tupela Motukea na Kopi em aninit long Chan na Haiveta gavman ol tingting long egensim tasol ol bin dropim bikos wok developmen plen em ol i no hariapim.

Napa Napa rifaneri bai kamapim inap olsem 36,000 barels krui oil long wan wan de na bai wokim prodaks olsem petrol, aviesin gasolin, jet fuel, kerosin, indastriel oil bilong yusim long domestik na eksport makets.

Dispela projek bai helpim long spin-op bisnis bilong ol lokol tu bai kisim sanis bilong i i gat wok.



• Ol sampela skul studen long Mosbi husat i bin winim ol Esei kompetisen we opis bilong Republic of China (Taiwan) i bin kamapim long las yia.

## Philemon laik strongim Milen Be plis fos

### YAKAM KELO i raitim

GAVANA bilong Milen Be provins Titus Philemon i wari tru long strong bilong plis fos insait long provins.

Olsem Gavana na Siaman bilong Lo na Oda insait long provins, mi wari tru long plis i nogat sapat long samting bilong yusim long wok na nogat inap ol samting bilong karimaut reid o ol patrol wok taim ol trabel i kamap long provins, Mista Philemon i tok.

Insait long ol hat taim we nogat inap wokman na mani bilong karimaut ol wok, Milen Be plis fos i go het yet long strongim wok bilong ol i ron gut olsem na mi amamas tru long wok bilong olgeta plis opisa na plisman, em i tok.

Mista Philemon i mekim dispela toktok bihain long Provinsal Plis Komanda Suprintenden Henry Rauyak i givim ripot bilong plis wok bilong ol long em na Ekting Edministreta Wilfred Leleca na ol sinia opisa long Alotau long Fraide las wik.

Namba bilong plis fos nau

### MILEN BE RIPOT

long provins em 70 na dispela em aninit long mak mipela i laikim olsem moa long 100, Mista Rauyak i tok.

Haus bilong slip em bikpela hevi tru long mipela olsem na yumi mas stretim gut ol rot bilong toktok gut wantaim. Mipela i ken gat gupela plis fos tasol wok bilong mipela ken pundaun sapos rot bilong toktok wantaim ol atoriti ino stret, em i Mista Rauyak i tok.

Mista Rauyak i tok i gat wanpela plisman tasol i stap long Esa'ala, tripela plisman long Bolubolu, tupela long Losuia (Kiriwina) na i lukautim 30,000 manmeri, tupela plisman long Misima na tupela long Rabaraba we i lukautim tu Makamaka, Daga na Weraura Lokol Level Gavman.

Mipela i mas gat moa plisman long Rabaraba tasol hevi bilong haus slip em bikpela samting. Ol hap bilong meinten i save gat planti trabel na hevi tasol mipela i sot tru long ol plisman na mani bilong karimaut wok, em i tok.

Gayana Philemon i tok em bai

raitim pas i go long Plis Minista Mathias Karani na askim em long helpim Provinsal Gavman long stretim sampela hevi Milen Be plis fos i wok long bungim tude.

Bihain long dispela toktok bung bilong ol, Mista Philemon i givim tripela AR-15 sotgan, tupela Sig pistol na ol samting bilong plis fos i yusim we Gavman i baim long K26,000.

Insait long dispela bung bilong Gavana wantaim ol 15 plisman, mamba bilong Samarai Mururua i tok em i amamas long lukim gupela wok bung i kamap nau wantaim Provinsal Gavman, Edministresen na plis fos long wok poroman long developmen bilong Milen Be provins.

Bikpela wok bilong yu em long strongim lo na was long ol pipel na ol samting bilong ol na holim lo na oda i stap gut, Gavana Philemon i tok.

Mi askim yupela long noken birua wantaim ol pipel bikos yupela i gat ol strongpela samting olsem sotgan. Na noken larim ol dispela sotgan i pundaun long han bilong ol man nogut, Mista Philemon i tok.

## NCD RIPOT

### Raskol pasin long Sabama, Kilakila na Badili pretim ol PMV bas sevis

HEVI bilong ol man nogut i bagarapim ol PMV bas na ol pasindia insait long Mosbi siti i wok long kamap yet we wanpela PMV bas namba 17 i bungim birua long Sabama eria long Sarere las wiken.

Sabama, KilaKila na Badili eria em ol hap we ol PMV bas i save oltaim bungim hevi bilong ol raskol man we ol i save hensem ol na kisim mani bilong ol PMV bas, kisim han bek na bilum bilong ol pasindia na brukim ol bas na tu kamapim birua na bagarap long ol boskru, draiva na pasindia tu wantaim.

Long Sarere las wiken, 5-pela PMV bas i bungim dispela birua long Sabama bas stop taim ol man nogut i kam wantaim ol birua samting bilong pait olsem naip, tamiok na hom med sotgan. Ol i pretim ol draiva na boskru na sutim beksait bilong wanpela boskru long naip we em i kicim bikpela bagarap na i stap long haus sik. Ol man

nogut i bagarapim tu ol dispela bas we ol i stonim glas na brukim olgeta.

Dispela birua pasin i kamapim bikpela belhat na kros long ol papa bilong ol PMV bas na ol draiva wantaim ol boskru insait long Mosbi siti.

Ol i singaut long plis fos, Trensport dipatmen na komyuniti long ol dispela eria long mekim sampela gupela samting nau long stapim dispela kain birua long i noken kamap moa long ol PMV bas na ol pasindia bilong ol.

Ol PMV bas i tok strong olsem dispela i no nupela taim birua olsem i kamap long ol long Sabama, Kilakila na Badili eria. Olsem na ol i laikim stapim olgeta ron bilong PMV bas i go long ol dispela hap. Ol i ken ron long ol arapela rot ol i save ron long en tasol long dispela tripela eria bai i nogat. Bikos ol i draiva na boskru i mas tingim laip bilong ol na tu laip bilong ol pasindia

bilong bas. Ol PMV bas namba 17, 10, 6, 8 na 13 i save ron long dispela hap eria bilong Sabama, Kilakila na Badili.

Ol PMV bas i tok strong olsem sampela bikpela disisen i mas kamap long abrusim ol dispela kain birua we i oltaim save kamap long ol dispela hap eria.

Ol i singaut long atoriti olsem plis na Trensport long luksave long dispela hevi bilong ol na mekim sampela samting i go stret long gupela ron bilong ol PMV bas na ol pasindia tu wantaim.

Dispela hap bilong Sabama, Kilakila na Kaugere i save gat planti wokmanmeri istap. Na ol bai kisim bikpela taim nau bikos nogat PMV bas bai ron long ol dispela rot bilong ol long kisim pasindia.

Dispela hevi bilong ol raskol pasin i stapim ol PMV bas long i no inap ron moa long ol dispela hap rot.

### NCDC givim K75 milien long opim Mosbi rot

NESENEL Kapitel Distrik Komisn (NCDC) i brukim K75 milien olgeta long stretim gut na mekim kamap gut olgeta rot sistem insait long biksiti bilong Papua Niugini long Mosbi.

NCDC i bin tokaut long dispela bikpela toksave long taim em i brukim baset bilong em tupela wik i go pinis. Na long las wik, em i mekim dispela toksave i kamap klia we em i makim dispela mak bilong mani, K75 milien long mekim gut olgeta rot insait long Mosbi siti.

Edministreta Jamie Maxtone Graham i tokaut olsem nau em NCDC i gat klia luksave long wanem hap sevis i mas kamap long sevim gut ol pipel bilong siti husat i save oltaim baim takis na mani i save go long NCDC.

Mista Maxtone Graham i tokaut olsem NCDC i luksave long ol bikpela wok eria olsem rot, skul na helt sevis we ol pipel i mas kisim gut sevis long en.

Minista bilong Provinsal na Lokol Level Gavman Afeas Andrew Kumbakor tu i amamas long dispela bikpela luksave NCDC i givim long stretim gut olgeta rot sistem bilong siti.

Mista Kumbakor husat tu em ekt-

ing Gavana bilong NCD i tok Gavman bilong Sir Mekere na Zeming i gat dispela luksave o polisi bilong kirapim ol wok developmen na sevis long ol pipel na em i amamas long NCDC i gat dispela wankain luksave tu we i sapatim wok na sanap bilong Nesenel Gavman.

Mista Maxtone Graham i tok NCDC bai go het yet long givim ol gupela sevis i go bek long ol pipel na wok bilong em bai i poroman wantaim Nesenel Gavman long lukim olsem ol i bihainim stret sanap na polisi bilong Nesenel Gavman.

Dispela mak bilong mani, K75 milien i bai bruk namel long ol kontrakta kampani husat bai karimaut ol wok bilong stretim rot insait long siti. Ol dispela kampani em Global Construction, Hebou Construction, Curtain Brothers na Shornccliffe kampani.

Mista Maxtone Graham i tok ol dispela kampani i stap long PNG na i wok longpela taim long hia, we sampela em nesenel kampani na i save karimaut ol dispela kain bikpela wok. Olsem na NCDC i bilip bai ol i ken mekim kamap gupela wok long stetim gut ol rot bilong Mosbi siti.





• Ol komiti bilong Sitijen Edvaisori grup i promis long Gavman Haus long wok bilong ol. (lephan) Seketeri bilong Foren Afeas Lalatute Evoa, momba bilong Komo Magarima Alfred Kaiabe na momba bilong Raikos Stahl Musa.



• Aninit: Ol sampela bikman bilong Katolik sios i raun lukluk long opis bilong Wantok Niuspepa long dispela wik.

## Ol nes i wanbel long straik

OLGETS nes insait long Papua Niugini i holim bikpela vot long ol i laik straik egensim gavman. Risal bilong vot i bin kamaul long Tunde dispela wik we i soim olsem olgeta nes i wanbel long straik.

Ol nes i laik straik egensim gavman bikos long planti tok pait bilong ol long ol potnait pe we i no gutpela tru, haus slip bilong ol we i nogut tru na planti arapela alawens we ol i bin kisim long bipo yet i kam inap nau.

Dispela singaut bilong ol i bin go longtaim yet long gavman tasol i nogat wanpela eksen i bin kamap inap dispela yia ol i pasim toktok long holim straik.

Aninit long asosiesen bilong ol Komyuniti Helt Wokas Asosiesen, ol i sanap wantaim long kamapim dispela tingting na belhevi bilong ol.

Long las wik ol bikman bilong asosiesen i bin bung wantaim ol bikman bilong gavman long Pesenel Menesmen Dipatmen (DPM) na Helt Dipatmen long paitim toktok long dispela hevi bilong ol.

Helt Dipatmen i tok mani i go pinis long wanwan provins bilong ol we ol nes i ken kisim. Dispela mani i go long wanwan provinsal helt opis we edministreta bilong wanwan provins i save long dispela.

Tasol ol helt wokas asosiesen i sanap yet long pait bilong ol bikos dispela ol i makim namba bilong mani we gavman i feil long baim ol long longpela taim i kam inap nau. Na ol i laik kisim tok yesa bilong gavman long stretim tu mak bilong potnait pe ol i save stap long en tude na tu lukluk long hevi bilong haus slip o ples ol i save stap long en na wok.

Ol nes i save wok long olgeta haus sik na ol klinik insait long olgeta hap provins na insait tru long ol distrik level tu wantaim.

## Tripela FISIKA lida i bung wantaim

TAIM ol lida i bung wantaim long kirapim wok bai wok i karim kaikai bikos ol pipel tu bai wanbel long sapatim ol lida na harim tok bilong ol. Long dispela rot tasol wok developmen i ken kamap gut. Momba bilong Kabwum Ginson Saonu i mekim dispela toktok long Sialum insait long Tewae Siassi distrik long pinis bilong las mun.

Insait long FISIKA rijon i gat tripela ilektoret. Finsafen, Tewae Siassi na Kabwum.

Long kamapim gupela developmen insait lon FISIKA rijon mipela ol lida yet i mas bung

pastaim. Nau mipela tripela momba bilong FISIKA i bung pinis long wok bung wantaim.

Bipo ol FISIKA lida i no save bung olsem na wanbel na wok bung wantiam i no save stap.

Olsem na wok developmen i kamap long sampela hap na ol arapela hap i no save kamap, MistaSaonu i tokim ol manmeri bilong Sialum.

Mista Saonu i tok amamas long ol pipel bilong Tewae Siassi long makim Mao Zeming olsem momba bilong ol long 1997 nesenele ileksen. Nau em i

akmap Deputi Praim Minista bilong Papua Niugini. Dispela em namba wan taim wanpela momba bilong FISIKA rijon na Morobe provins i kisim dispela wok na yupela i ken amamas na wok bung wantaim em.

Mista Saonu i bin go long Sialum wantaim Deputi Praim Minista Mao Zeming na Minista bilong Wokas Alfred Pogo husat tu em momba bilong Finsafen.

Ol i bin go long opim ol masin bilong wokim rot na opim tupela haus slip bilong Tewae kaunsil long Kanome long Sialum eria.

## Busu bris i pas

GAVANA bilong Morobe provins Luther Wenge long Mande i tokaut olsem Busu bris i pas na ol ka i no ken ron long en.

Mista Wenge i tokaut long dispela bihain long em i lukluk raun long bris, we wanpela bikpela ka i bin bamim long las wik Fonde.

Gavana Wenge i askim tu Wokas dipatmen long hariap long mekim mani i redi long stretim dispela bris kwiktiam.

Em i tok long dispela taim nau bris em pas na olgeta ka i no inap ron moa long en. Dispela long wanem bris i no gutpela

moa long ol ka bai ron bikos hevi o birua inap kamap.

Wanem ka i no harim tok na draiv krosim bris bai i stap long bikpela trabel, em i tok.

Busu bris i stap ausait long Lae siti we i save sevim ol pipel long Nawae eria.

Dispela bris tu i sevim sampela bikpela bisnis kampani olem Pelgen husat i gat bikpela pik bisnis i stap long Singawa na Niugini Table Bird we i save baim ol kakaruk long ol ples i stap long hap.

Dispela em namba tri taim Busu bris i bruk long las wik bihain long wanpela bikpela ka i karim stokfid i baim sait bilong bris na kamapim dispea hevi.


Long wankain taim tu enjinia bilong Wokas dipatmen i tok bris em i no gutpela long ol manmeri i wokabaut long wanem em i save guria nai ken pundaun.

Bruk bilong dispela bris i lukim planti pipel bilong Singawa na Bukawa bai kisim hevi long go long Lae long mekim wok bilong ol.

# BIKPELA TOKSAVE

**NIU PRAIS 30t**

WANTAIM VAT



## TASOL PRAIS LONG DISPELA INO SENIS

**20t**  
WANTAIM VAT

**10t**  
WANTAIM VAT



**NOKEN BAIM MOA LONG OLGETA STUA**

# Kainantu i gat bikpela gol

IRUMAFIMPA ples long Kainantu Isten Hailans provins i gat bikpela gol i stap, gol kampani Highlands Pacific Limited i tokaut long dispela.

Highlands Pacific kampani i tokaut olsem daimon dril progrem ol i bin kari-maut we i pinis long Desemba las yia i soim klia olsem i gat bikpela gol minerol long Irumafimpa eria we i karamapim moa long 1,100 mita.

Menesing Dairekta bilong kampani Ian Holzberger i tok risal bilong painimaut ol i kism i gutpela tru na soim olsem dispela projek bai i bikpela tru wantaim hai gred malti milien auns gol diposit.

Rekot bilong dril long dispela taim nau i soim olsem Kainantu i gat bikpela risos mak olsem 1.84 milien ton gol.

Bihainim dispela risal, Join Vensa i luk-luk long surukim dril wok i go moa long opim mak bilong em we ol i ken kamapim level bilong fisibiliti stadi bilong kamapim wok maining stret, Mista Holzberger i tok.

Irumafimpa plen i stap open na bikpela. Ol wok long antap level i soim olsem moa minerol inap stap go daun long 1,500 mita na moa yet i go daun. Long dispela taim, tes wok na risal kampani i kism em long 200 mita level tasol.

Kainantu Gol Projek (HIG 100% interest, diluting 50%) i karamapim 261 skwea kilomita eria bilong golfil insait long Isten Hailans provins bilong Papua Niugini. Long Jun 1999, kampani i kamapim join vensa wantaim Nippon Mining and Metals kampani bilong Japan. Dispela i larim Nippon MM i kism 50% sea long Kainantu bikos ol i putim US\$3.5 milien eksploresen progrem.

Taim wok painimaut bilong gol i bin stat long Ogas 1999, tupela bikpela eria, em Irumafimpa na Maniapa/Arokempa i bin soim klia olsem gol i stap long dispela tupela ples ya.

# Wol bung bai toktok long kompyuta teknoloji

BIKPELA bung long toktok long ol samting we i sut long dijital teknoloji na rot long yusim Internet long wol tred bai kamap long mun Septemba long dispela yia.

Dijital teknoloji em ol nupela masin olsem ol kompyuta na ol arapela moden teknoloji bilong yusim long komyunikesen.

Wol Internet Forum bai kamap long Oxford Yunivesiti we i stap long Saut Inglan.

Ripot i tok 1,000 man i makim ol G8 kantri na ol arapela kantri moa long wol we i save tred wantaim ol bai stap insait long bung we bai kamap long Septemba 3 na pinis long de namba 7. Bung bai bungim wantaim ol kampani na gavman husat i go pas long dispela eria.

Long dispela taim, olgeta samting long wol we yumi yusim i wok aninit long nupela teknoloji olsem ol kompyuta masin na ol arapela moa.

Derek Wyatt husat i go pas long dispela namba wan bung ya na Leba memba bilong palamen long Inglan i tok Dijital teknoloji em i wok long muv hariap na i winim ol gavman. Na ol gavman i no inap long kontrolim.

Em i tok ol politisen i mas save olsem Internet i no wanpela samting we ol bai pilai pilai long en na save long en long bihain taim.

Wanpela mausman bilong bung i tok bung ya bai lukluk long stapim ol gavman long go hetim ol projek we i no save wok.

"Fokus bilong bung em long stapim ol gavman long noken westim mani long ol projek we i feil na i no save kaamp. Wari i stap olsem sapos planti infomesen teknoloji (IT) projek i feil long dispela kantri gat wok long serim ol risos namel long ol gavman na IT kampani long lukim olsem ol liklik kantri i no wokim wankain asua. Sapos yumi bungim bisnis na ol gavman wantaim long wol samit, bai dispela i sevim bikpela mani na ol arapela tu bai kism strong long lainim ol samting," mausman ya i tok.

Lord Putnam bai siarim dispela bung long Inglan na ol bai skruim moa bung long ol arapela hap bilong wol.

# DAL Faming projek helpim ol sumatin na kalabuslain

OL SKUL sumatin na kalabus lain insait long Isten Hailans provins i wok long kism skul long lainim rot bilong kism save long famim o wok gaden.

Provinsel Divisen bilong Agrikalsa na Laipstok i go pas long dispela trening projek. Bikpela as tingting long dispela projek em long givim save long ol yangpela long redim ol long bihain taim ol i lusim skul o haus kalabus na sampela bilong ol i ken go insait long dispela wok insait long ples.

Institusene Agrikalsa na Laipstok projek long Isten Hailans i wok gut bihain long ol bin kirapim long provins sampela krismas i go pinis. Ol provinsel DAL opisa i kirapim ol fam projek we ol sumatin na ol prisina i stap insait long en. Ol projek we i stap insait long en em long fud prodakesen o projek we i kamapim ol kaikai na ol laipstok wok.

Ol opisa i kariamut ol trening sesen, fam demonstrasen, tilim ol samting bilong wok gaden long ol projek na ol samting bilong planim, tilim ol sipsip, ol pato, ol liklik kakaruk, pik, pis na tu salim ol dispela samting long ol maket.

PLanti yangpela i go insait long ol projek na ol i benefit long ol, ol ripot i tok. Ol woklong yusim ol save we ol i lainim. Projek ya em i gutpela tru bikos em i helpim long pulim ol yangpela long wokim samting long helpim ol yet, na lus tingting long ol raskol na bikhet pasin.

Kodineta bilong projek Sergio Piwe i tok projek ya i gat bikpela tingting long strongim gutpela wok bung wantaim ol institusene na ol yangpela i ken benefit long en.

Em i laikim DAL long sapotim dispela,projek na skruim wok i go long ol arapela institusene long provins.

I kam inap nau, DAL i skruim projek long Bundayira na Bihuta haus kalabus, Lufa, Rintebe na Asaroka Hai Skul.

Mista Piwe i tok 5,890 sumatin, 231 woda, na 36 tisa i benefit long dispela projek.



• Plis Minista Mathias Karani wantaim Deputi Praim Minista Mao Zeming lukluk long ol rebit insait long Huon Distrik. Foto: Franco Nebas.

# Henganofi laik stopim bisnis bilong baim na salim seri kopi

## YAMES KEI i raitim

BIKPELA toktok nau i kamap insait long ol hauslain insait long Henganofi distrik long Isten hailans provins long stopim pasin bilong baim na salim seri kopi.

Dispela em bikos planti stil pasin i wok long kamap taim ol man i wok long go insait long kopi gaden bilong ol narapela lain na stilim ol seri na salim.

I gat lo i stap pinis long stopim ol man husat i nogat laisens long baim na salim seri. Man husat i

brukm dispela lo bai baim K1000 kot fain o go 6-pela mun kalabus.

Wanpela komyuniti lida na memba bilong PNG Smolholda Kopi Groa Asosiesen, Kosopi Hongkea i bin tokaut long dispela pasin bilong baim na salim seri kopi.

Mista Hongkea i tok olsem em i laikim plis i mas go insait long ol eria long Dunantina konstituensi na sekap long ol haus lain we i wok long baim na salim seri kopi.

Em i tokaut long nem tu bilong ol dispela haus lain we dispela pasin bilong baim na salim seri kopi i

wok long kamap. Ol dispela haus lain em Hongkon, Sibiri, Bangka, Kesavaka na Someo. Planti ol lain kopi fama long dispela ples tu i laik dispela pasin bilong baim na salim seri kopi i mas stop.

Mista Hongka i tok olsem taim dispela pain bilong baim na salim seri kopi wok long kamap, planti ol papa bilong ol kopi gaden i no kism gutpela prais o mani long kopi bilong ol. Dispela em bikos planti kopi bilong ol i go long han bilong ol stilman. Husat i save go long gaden bilong ol long nait na kism ol seri na bihain i go salim

long rot sait na kism mani.

Em i tok olsem dispela pasin i kamap i no long taim i go pinis long sait bilong Henganofi na em i laik dispela i mas stop. Em i tok ol papa bilong kopi gaden i hatwok tru long planim kopi na stretim gaden na i laik kism gutpela prais long hatwok bilong ol, tasol ol stilman i save go long gaden bilong ol na kism ol seri kopi bilong ol na go salim. Olsem na dispela pasin bilong baim na salim seri kopi i mas stop olgeta insait long Henganofi distrik.

Em i tok tu olsem dispela pasin

bilong baim na salim seri kopi i no helpim long kamapim gutpela kwaliti kopi.

Dispela em bikos planti taim ol stilman i wokim stil pasin long nait na i no save kism ol mau seri tasol. Ol i save kism ol grin o nupela seri tu wantaim. Olsem na dispela i ken bagarapim gutpela kwaliti bilong pasmen taim em i go long fektori.

Lo i stap pinis long stapim baim na salim seri kopi tasol planti lain i wok long brukim dispela lo na go het yet long mekim dispela pasin i stap.



# BOROKO Foodworld

## Dispela Wik Spesols

Roots Rice 1kg	K1.17	Tulip PLM 340gr	K2.78
Power Rice 1kg	K1.53	Sunshine Milk 1litre	K2.28
Ox & Palm Taper 340gr	K2.99	Sanitarium Corn Flakes 250gr	K4.90
Arnotts Sao Biscuits 250gr	K2.79	Ilimo Eggs 55gr Per Doz	K3.42
Arnotts Scotch Finger 250gr	K2.44	Ilimo Eggs 60gr Per Doz	K3.59
Sanitarium Weet Bix 375gr	K3.90	Morobeen Cream Ass. 60gr	K .50

Planti moa kaikai prais i go daun long en!

Ph: 325 7566, 325 0863 Fax: 325 7096



# Toktok namel long ol bikman stapim straik

HELEN REI i raitim

OL KOMYUNITI Helt Woka insait long kantri bai i no inap long go straik bihainim ol toktok i go het nau namel long Nesenel Helt Dipatmen (NDOH) na Dipatmen bilong Pesenel Manesmen (DPM), Komyuniti Helt Wokas Asosiesen (CHW) na PNG Neses Asosiesen.

Seketeri bilong NDOH Dokta Puka Temu i tok toktok namel long ol grup ya i wok long go gut na klostu taim ol bai sainim Memorandum ov Agrimen (MOA) long dispela wik namel long ol grup we i stap insaitm-long dispela samting.

Dokta Temu i tok bikos ol bikman long DPM i bin gat ol arapela wok long stretim long dispela wik, ol no bin sainim dispela MOA agrimen pepa.

Em i tok CHM i gat tupela samting we ol i wok long askim gavman long en na DPM i wok long lukluk nau.

Namba wan em long ol bek peimen bilong ol provins, stat yet long yia 1989. Bikos ol no apruvin yet ol provinsel baset, ol no wokim dispela peiaut yet.

Dokta Temu i tok ol i wok long skelim ol dispela samting na

provinsel baset wantaim. Em i tok Helt Dipatmen i tok strong pinis long ol provins we i no wokim peimen yet long givim bikpela tingting long en long ol wan wan provinsel baset bilong ol long dispela yia.

Namba tu samting en em ol nupela entaitelmen bilong ol nupela haus sik, etpos na helt senta. CHW i laikim bai ol i peim ol narakain mak long ol ovataim wok i go long ol wan wan level.

Long K12.3 milien we Nesenel gavmani bin basetim bilong ol CHW na Praim Minista Sir Mekere Morauta i bin tokaut olsem ol CHW bai kisim long namba tu potnait pe bilong mun Janueri long dispela yie. Dokta Temu i tok i gat paul tok i kamap long dispela samting bikos i no olgeta CHW i stap aninit long peirol bilong nesenel gavman.

Em i tok sampela CHW i save wok long ol wan wan level na planti i wok aninit long provinsel gavman long en na DPM i wok long lukluk nau.

Namba wan em long ol bek peimen bilong ol provins, stat yet long yia 1989. Bikos ol no apruvin yet ol provinsel baset, ol no wokim dispela peiaut yet.

Dokta Temu i tok ol i wok long skelim ol dispela samting na

provinsel baset wantaim. Em i tok Helt Dipatmen i tok strong pinis long ol provins we i no wokim peimen yet long givim bikpela tingting long en long ol wan wan provinsel baset bilong ol long dispela yia.

Namba tu samting en em ol nupela entaitelmen bilong ol nupela haus sik, etpos na helt senta. CHW i laikim bai ol i peim ol narakain mak long ol ovataim wok i go long ol wan wan level. Long K12.3 milien we Nesenel gavmani bin basetim bilong ol CHW na Praim Minista Sir Mekere Morauta i bin tokaut olsem ol CHW bai kisim long namba tu potnait pe bilong mun Janueri long dispela yie. Dokta Temu i tok i gat paul tok i kamap long dispela samting bikos i no olgeta CHW i stap aninit long peirol bilong nesenel gavman.

Em i tok sampela CHW i save wok long ol wan wan level na planti i wok aninit long provinsel gavman long en na DPM i wok long lukluk nau.

Namba wan em long ol bek peimen bilong ol provins, stat yet long yia 1989. Bikos ol no apruvin yet ol provinsel baset, ol no wokim dispela peiaut yet.

Dokta Temu i tok ol i wok long skelim ol dispela samting na

Dokta Temu i tok Bod long dispela wik i bin peim NDOH K2 milien na ol haus sik insait long kantri bai yusim dispela mani long peim ol wara, lait na telipon bil bilong ol i go long Wara Bod, Elkoma na Telikom.

# Skul strongim gutpela pasin na sapot bilong papamama

VERONICA HATUTASI i raitim

TAIM 2000 skul yia i op long dispela wik, bikpela samting we ol skul atoriti i autim em long ol pikinini i strongim gutpela pasin (desiplin) na ol papamama i wok bung wantaim skul long skruim gut ol wok long helpim ol pikinini bilong ol.

Strongpela singaut i go long ol sumatin long mekim gutpela stat nau na olgeta samting bai i ron gut long ol de na mun i kam bihain.

"Skul i olsem wanpela resis. Sapos ol sumatin i statim skul long gutpela

itok. Wanpela sinita tisa na memba bilong Disiplineri Komiti bilong skul i bin autim strongpela toktok tu long ol wankain isu na strongim ol papamama long givim ol gutpelas stiatok long haus long bihainim gutpela pasin.

"Gutpela pasin em i bikpela samting long ol skul na komyuniti tude. Na em i bikpela samting long skulim ol pikinini long toktok gut long ol bikpela man, ol tisa na ol arapela pipel long skul, famili na komyuniti. I moabeta long taim yumi skulim ol gutpela pasin long ol pikinini long skulim ol tu long ol helt isu."



• Dispela ol yangpela skul meri i strongim ol toktok long ol samting we i karamapim ol.

rot long stat bilong yia, ol wok bilong ol sumatin na tisa bai go gut long ol narapela de na mun inap long pinis bilong skul yia," Leo Saulep, Siaman bilong Sen Peter's Praimeri skul long Erima, Nesenel Kapitel i bin tok long ol toktok bilong em long skul opening long Mande.

Lainim na bihainim gutpela pasin olsem harim tok, pasin bilong rispek, tok tru na hat wok em ol bikpela samting we skul bai glasim na lukim olsem ol sumatin i bihainim gut, nupela Prinsipel bilong skul Anna Mage i tok.

Narapela samting tu we em bin tok strong long en em long ol papamama i mas gat intres long skul bilong ol pikinini na stap insait na help long ol ektiviti we ol i wokim long skul.

"Ol pikinini i mas lainim ol gutpela pasin. Na ol papamama i mas putim ol gutpela stia tok long ol. Harim tok, tok tru, rispek na hat wok em ol bikpela samting we ol sumatin i maslainim na bihainim long dispela Kristen skul.

"Ol papamama i mas pilim fri long kam na go long skul, sekim ol pikinini bbnilong ol na toktok wantaim ol tisa long wok bilong ol pikinini. Maski ol pasin tumbuna, lotu na tokples i narakain, mipela i putim strongpela toktok long ol papamama tu ples bung wantaim skul na mekim ol wok go het long skul i go gut," Misis Mage

"Skul bai no inap long givim sekondans long ol sumatin i dring ol smok long skul," tisa i bin tok.

Em bin tok tu skul i laikim ol sumatin long putim rait yunifom trauses, siot, dres na su soks samting na olsem komiti bai was gut tru long dispela.

Em i tok sapos pikinini i sakim tok na i no bihainim dispela, komiti bai salim pas long ol papamama na sapos sem samting i go het long tripela taim, ol bai salim ol i go long haus inap ol i wokim samting gut.

Long ol taim bipo planti skul pikinini i save wokim ol tok nugut, dring, smok na rait nabaut long ol kalsrum na ol no laikim dispela long kamap gen.

"Skul bai givim bikpela mekim save long ol dispela sumatin i wokim ol dispela pasin," tisa i tok.

Sen Peter's Praimeri em i wanpela Katolik ejensi skul na long dispela yia, em i kisim moa sumatin. Olsem na mak i abrusim 900 skul sumatin. Em i gat 30 tisa, 20 long Praimeri na 10 long elementeri level. Long mun Mas, ol bai putim skul ya long Level 6. Skul i gat gutpela rekot na em bin wokim gut gen long las yia taim ol sumatin i bin skorim gut tru long ol pesentej mak na kisim namba tu ples insait long ol Nesenel Kapitel Distrik skul.

## UPNG Medikol skul kisim 20 kompyuta long AusAID

DONESEN bilong AusAID i go long Medikol Fakalti na Alaid Helt Saiens long Yunivesiti of PNG Taurama Kempus bai i skruim save bilong ol sumatin na helpim ol gut tru long wanem nau ol i bihainim nupela kurikulum o rot bilong skul long dispela yia.

Medikol Opis Nasing Alaid Helt Saiens Trening Projek (MON-AHP) bilong AusAID i makim gavman bilong Australia long givim 20-pela kompyuta i go long skul bilong Marasin na Helt Saiens, UPNG long las wik. Pe bilong ol kompyuta em K110,000.

MONAHP i bin givim dispela helpim bilong helpim skruim skul na save bilong ol sumatin bikos aninit long nupela kurikulum we Medikol Fakalti i bihainim long dispela yia, ol sumatin yet bai

mekim wok ol yet na dispela i min olsem planti long ol infomesen na samting we ol i yusim long wok na skul em ol yet i mas painim. Olsem na ol mas yusim kompyuta long kisim ol infomesen long Intranet na Internet masin.

AusAID i givim helpim long Marasin Skul bilong UPNG insait long 15 yias tasol em statim dispela MONAHP Projek long foapela yia. Na em i wok long lukautim na helpim ol helt servis na projek insait long kantri.

Antap long givim helpim we i skruim save na wok, MONAHP i save givim teknikal sapotna ol kompyuta buk we i mekim klia rot long yusim ol kompyuta masin ya, Jacqueline Davidson i tok taim em i makim MONAHP na AusAID long prisanim ol masin ya i go long Bos bilong Medikol

Fakalti Dokta Mathias Sapuri insait long wanpela seremoni long Taurama las Fraide.

Mis Davidson i bin askim ol sumatin na akul long lukautim na yusim gut ol masin na em bai helpim ol gut long skruim save long ol krismas i kam.

Planti ol progrem we ol sumatin i laikim long skul na wok bilong ol i stap pinis long ol kompyuta ya na ol sumatin i ken sindaun na opim masin, painim na yusim.

Tim lida bilong MONAHP em Brooke Murphy i tok AusAID i putim pinis ol progrem long ol dispela kompyuta na ol sumatin bai yusim tasol. Ol progrem em ol i bihainim nupela kurikulum na wantaim ol infomesen i stap long ol teks buk, ol progrem long kompyuta bai helpim gut tru ol sumatin.

## Raits bilong ol pikinini long PNG

PNG na Konvensen

PAPUA Niugini gavman i bin sainim Yunaitet Nesens Konvensen long Rait bilong Pikinini long Mas 1993, bihain long praim minista na grup bilong em i bin sindaun long bikpela bung long 1990. Ol i kolim dispela bung long Wol Samit long ol Pikinini. Tasol bihainim ol ripot, PNG i stap bihain long ol wok long skruim ol samting we Konvensen i laikim we i sut long raits bilong ol pikinini. Bihain long sainim ol dokumen long Konvensen. Stet Pati i mas givim ripot bilong em bihain long tupela krismas. Ol ripot i mas karamapim sait bilong-fejisletja, edministresen najudisel (ol kot) na ol nesenel streteji we gavman bilong kantri i putim long skruim Konvensen. Bihain long dispela, Stet Pati bai givim ripot taim em i abrusim faipela krismas. Em i wok bilong gavman na ol Non Gavman Ogenaisesen (NGO) long skruim ol samting we i stap aninit long Konvensen long Raits

bilong Pikinini (CRC). I gat planti grup bilong ol meri i sapotim CRC tasol i nogat bikpela pablik aweanes na ol NGO grup we i sapotim Raits bilong ol Pikinini long PNG, UN ripot i tok.

Klostu taim bai PNG i givim namba wan ripot long dispela samting i go long UN. Wanpela Weking komiti long Raits bilong ol Pikinini i redim dispela ripot na ol bai givim i go long Komiti long Raits bilong Pikinini long Jiniwa, Swiselan.

Foapela Prinsipel o lo bilong Konvensen em long:

1- Non Diskriminesen  
Lo bilong non diskriminesen (glasim wantaim skin kala, man o meri, tokples, lotu, wanem tingting bilong wanwan, sampela hap long bodi i bagarap na ol arapela samting moa) i min olsem olgeta pikinini i gat wankain rait long skruim ol developim ol yet i go moa long olgeta rot.

Nogat man bai wokim ol kain toktok long rait bilong ol pikinini

long kisim edukesen. Tasol planti milien pikinini long wol husat i statim skul i no save pinisim. Tok piksa em long PNG, 70 pesen mak bilong ol pikinini i stap long ol komyuniti na praimeri skul. Na mak bilong ol dispela i stap long sekonderi skul em 20 pesen. Na aninit long 2 pesen long ol dispela husat i bin wokim gret 1 bai skruim skul i go long Gred 12. Bikos long mani i sot hevi, planti pikinini i no skul. Na bikos wok mani long kantri i no gutpela, planti pikinini i lusim skul long painim wok na sapotim papamama long lukautim famili long ples. Long sampela taim, skul bai stap longwe na tu i no seif long ol pikinini meri long bihainim longpela rot i go na i kam long skul. Olsem na planti pikinini i save givap long go long skul. Na long ol pikinini i no go long skul bai kamapim hevi long bihainim taim bilong ol pikinini.

Moa long neks wik...

# WANTOK

NIUSPEPA BILONG YUMI OL PAPUA NIUGINI STREET

## Hevi na pen em pe bilong sakim tok

PLISMAN i nogat pawa long sutim man long kilim em, dispela em toktok bilong Sief Jas Sir Arnold Amet.

Sir Arnold Amet i tok i nogat wanpela lo i tok long ol plisman i ken holim sotgan na kilim ol man nogut bikos ol i laik kilim em.

Plis Komisina John Wakon i tok yesa tu long dispela toktok bilong Sief Jas na tok ol plisman bilong em long provins i mekim dispela toktok tasol i no sut stret long kilim ol man. Ol i tok tasol long ol plisman i ken sut bek long ol man nogut long banisim laip bilong ol yet nogut bai ol i kisim birua. Dispela em ol i kolim, was long yu yet, o self difens.

Sapos yumi lukim nau long olgeta hap provins, i gat ripot bilong ol kain kain trabel na birua i kamap. Olsem na long Sauten Hailans long hap bilong Tari, nau i gat bikpela raskol pasin na ol man i pait wantaim narapela yusim ol strongpela samting bilong birua olsem sotgan. Long ol taun long Mosbi, Lae na arapela senta tu, ol man nogut i kilim ol man na stilim ol samting bilong ol. Ol man nogut i holim ol meri na bagarapim ol. I gat planti ol trabel we ol man nogut i save yusim ol sotgan olsem long stii, kilim man na arapela bikpela trabel na birua.

Ol plisman i save mekim bikpela wok tru long traim stapim ol dispelabirua long kamap. Sampela taim ol i kamap stret long tai na holim ol dispela man nogut. Sampela taim ol i kamap bihain na ol man nogut i ronawe pinis. Na taim sampeela taim ol i kamap ol sampela lain i save kisim bagarap long han bilong ol man nogut na pilim pen i stap o krai i stap.

Sapos i nogat lo bilong plis i kilim man i dai, orait i mas i gat lo bilong ol manmeri i banisim ol yet taim ol man nogut i laik kilim ol. Na dispela lo i mas rausim dispela man nogut long dispela taim stret em i laik mekim trabel o birua. Sapos wanpela meri i kilim wanpela man i dai long naip bikos man ya i kamap long em long raskol pasin na i holim em na i laik bagarapim em, wanem lo i stap long tok stret long dispela? Sapos wanpela papa i sanapim trep long banis bilong haus na trep i holim pasim na kilim wanpela man nogut husat i laik kam brukim haus bilong em long naip, wanem lo i stap long tok stret long dispela? Sapos wanpela man nogut i apim sotgan na i laik kilim mi tasol wanpela plisman i kamap stret na sutim dispela man wantaim sotgan, dispela bai yumi tok wanem?.

Plisman tu i mas was long laip bilong em yet bikos ol man nogut bai i no inap larim em. Ol bai kilim em stret bikos ol i laik traim na ronawe long rong ol i mekim. Dispela plisman i gat meri pikinini na famili bilong em i stap. Olsem na ol i laik lukim em i mekim wok bilong em stret olsem plisman na em i mas go long haus gutpela. Sapos plisman i singaut, stop, stop, stop. Yu ting bai raskol man i harim na stop? Ating em bai traim long pasim maus bilong dispela plisman na tekov olsem na wanpela katres inap long pinisim dispela bikmaus bilong plisman ya. Yu ting bai famili bilong dispela plisman bai amamas long harim dispela nius, taim plisman ya i gat sotgan tasol em i no yusim na em singaut tasol na raskol i kilim em. Ol bai krai na tok, watpo na yu no laik kilim raskol ya. Ating bai tewel bilong plisman ya bai tokim ol bihain olsem, sori lo ya, tambu long mi yusim sotgan long kilim man ya.

I gutpela long dispela toktok bilong kilim man i dai o noken kilim man i kamap. Bikos ol lida na ol lain bilong mekim lo i mas glasim gut tru ol senis nau we i wok long kamap insait long kantri wantaim hevi bilong lo ra oda na ol eria we lo i mas wok strong. Plisman kilim raskol i dai long wanem as, ating ol lida na ol saveman i mas glasim gut as bilong dispela.

Toktok bilong ol lapun na ol lida bilong ples i stap. Ol i save tokim ol yangpela olsem, sapos yu sindaun isi na mekim gut wok bilong graun bilong yu, bihainim gut kastom, bai sindaun bilong yu i gat amamas i pulap. Bai yu gat planti kaikai na yu no inap sot long wanpela samting. Bikos ol gutpela sindaun na pasin bilong yu tasol. Sapos yu abrusim kastom na bikhet nabaut, bai yu bungim sik na birua. Olsem na yumi ken lukim olsem birua na hevi olsem pe bilong man i kisim taim em i bikhet o sakim tok.

## Husat bai lukautim ol turangu long taun

NAU yet long Papua Niugini, planti manmeri na yangpela i ronawe long asples bilong ol na go long taun na siti. Na sem taim yumi lukim planti ol turangu manmeri i go long taun na siti. Ating wanlain bilong ol yet i kisim ol i go na lusim ol i stap long strit na klostu long ol bik stoa na askim ol man long kisim mani na arapela samting. Dispela turangu manmeri em ol man na ol i no wel abus o enimol.

Yumi skelim yumi yet wantaim ol turangu lain na yumi pilim tru insait long bel bilong yumi olsem ol i wankain olsem yumi. Han, lek ai, iau na arapela hap bodi bilong ol i bagarap em tasol i mekim na yumi lukim ol narakain long yumi.

Yumi mas save na bilip olsem ol kain turangu yumi lukim ol i sindaun sori na askim long kisim mani na luksori em ol i askim olsem yumi manmeri i no turangu long spirit. Long ai bilong wanpela man husat i wokim yumi long han tru bilong em yumi olgeta manmeri i wankain na wanlain tasol.

Papa God i wokim yumi long han bilong em yet na givim spirit bilong em long yumi. Na dispela i mekim yumi wankain olgeta. Tok bilong God tu i tokim yumi olsem God i givim spirit bilong em long man i narakain long ol enimol na arapela samting long graun.

Taim yumi pilim na bilip tru long dispela orait bai yumi mekim wanem long luksave na helpim ol turangu manmeri.

Pastaim yumi mas skelim gut wanem as na ol turangu i kam i stap long taun na siti olsem yumi lukim ol nau. Ating namba wan samting o wok bilong lukautim ol turangu mas i go long ol famili na ol wanlain bilong ol long ples. Ol famili bilong ol turangu lain i mas save dispela ol turangu i gat wankain spirit olsem ol yet i gat. Ating God yet i save na wanpela man o meri insait long



famili bilong ol i kamap turangu.

Ating God i gat tok long ol famili memba long bosim na lukautim gut dispela turangu. Sapos olsem orait ol famili bilong ol turangu i kam na i stap klostu long God long gutpela pasin na mekim gut long ol turangu. Long dispela pasin bai ol famili i stap gut na kisim moa blesing.

Namba tu em yumi arapela lain husat i sori long ol turangu lain na i givim mani samting. Tingting gut pastaim na givim. Yumi bai helpim ol turangu bagarapim ol sapos yumi givim mani long ol nau na i no skurim dispela gutpela wok yumi mekim. Moabeta ol i go bek long asples bilong ol na i stap gut wantaim ol famili bilong ol we ol bai i no inap sot long wanpela samting. Pasin bilong strongim famili em i gutpela tru long PNG na dispela sevis i mas pinis. Husat famili i larim ol turangu i kam long taun na siti i mas save olsem dispela sevis i wok long kamap em i samting bilong sem na tu bagarapim ol turangu.

Dispela hevi bilong ol turangu long PNG em i nupela samting, bipo i no i stap. Olsem na wanpela rot bilong helpim dispela hevi em long Gavman bilong kantri i mas luksave long em nau na kamapim sampela tingting i sut long

helpim ol dispela turangu lain. Olgeta yia namba bilong ol turangu i stap long strit na askim long kisim samting i go antap. Sapos Gavman i no luksave long dispela hevi bai nem bilong kantri bilong yumi i bagarap taim ol manmeri bilong arapela kantri i kam na lukim ol planti turangu i stap long strit long taun na siti. Ating ol turangu i gat rait long kisim helpim long bikpela Gavman bihainim ol mama lo bilong yumi we i tok long skelim ol mani samting bilong kantri i go long olgeta manmeri bilong kantri.

Mi laik tok liklik long narapela lain turangu. Em ol pikinini na yangpela bilong dispela kantri husat han, lek, iau na ai bilong ol i no bagarap tasol nupela senis na sistem long kantri i bagarapim laip na sindaun bilong ol na ol i kamap turangu na askim askim nabaut long ol strit.

Dispela hevi em i bikpela ru winim ol turangu mi tok long antap. I kam inap nau i no gat wanpela program i sut long daunim dispela hevi bilong ol yangpela ol pikinini ol lusim skul na stap nating. Mi askim ol papamama long PNG long salim ol pikinini i go bek long ples na planim gaden na bosim ol samting God i kamapim long maus bilong em na ol bai kisim ol blesing God i redim bilong ol. Ol mama papa long PNG yumi inap traim dispela. Yumi statim dispela yia 2000.

Yumi i noken wet long Gavman. Gavman i no inap helpim hevi bilong yumi wanwan famili. Yumi pasim gut tok wantaim asples we ol famili memba i stap na salim ol pikinini nogat wok o skul i go i stap wantaim ol famili. Blesing bilong God i wetim ol long asples bilong yumi we bai ol i stap belisi na kamapim famili bilong ol yet. Yumi mas lukim wanpela narapela i wankain na skelim ol samting i kam i go na i stap isi.

# Pasindia sip i brukim lo

• Ripot long sip i bin kapsait long Kavieng long Nu Ailan provins i soim olsem dispela hevi i kamap bikos long asua bilong ol manmeri yet na tu asua bilong ol wokman na bosman bilong sip. Ripot i tok long Kavieng, ol manmeri i no save pret long birua bilong sip long solwara na ol i no save laik bihainim rul o lo bilong sip long solwara.

Ripot i soim dispela sip we i kapsait wantaim ol manmeri na sampela skul pikinini i bin karim 230 pasindia olgeta. Tasol long mak bilong dispela sip stret, em i mas karim tasol 20 pasindia. Olsem na i gat bikpela luksave olsem sip ya i karim 210 ekstra manmeri long sip ya na dispela i winim tru hevi na mak sip ya i mas karim.

• Plis Komisina John Wakon i tok lo bilong kantri i mekim isi tumas long planti ol bikhet na trabel lain long kisim isi sans, maski ol i strongpela na man nogut tru long kilim man i dai, bagarapim ol meri, yusim sotgan long mekim ol bikpela trabel.

• Mista Wakon i tok rot bilong daunim ol kain bikpela na strongpela trabelman i gutpela tumas bikos planti i save kisim isi rot i go aut long luksave bilong lo. Maski ol i kilim man i dai pinis, mekim bikpela stil pasin, bagarapim meri na ol arapela bikpela trabel.

Em i tok lo bilong Humen Rait i save sevim planti ol biknem raskol man na ol man nogut husat i man nogut tru insait long sosaiti na komyuniti. Tasol em i tok i gat Humen Rait lo bilong ol raskol man na i gat Humen Rait lo bilong ol gutpela manmeri tu. Ol i mas gat lo i banisim ol



Mista Wakon i tok ol plisman bilong em bai i no inap sruk bek long ol toktok bilong wanpela o tupela lain tasol long lukaut long lo bilong Humen Rait. Bai ol plisman i go strong tu long ol raskolman na mekimsave long ol bihainim wanem kain trabel o i mekim.

Em i tok wok bilong plis fos em long lukautim o was long ol manmeri we ol i ken kisim gutpela sindaun, wokabaut wantaim nogat pret na amamas long wanem samting ol i mekim. Na tu plis fos i mas was long ol propeti o ol samting bilong ol manmeri.

• Ol nes insait long Papua Niugini i soim laik bilong ol pinis olsem ol bai straik egensim Gavman long hevi ol i gat long sait bilong potnait pe, haus bilong slip na wok na ol alawens bilong ol.

Ol nes i holim bikpela vot pinis long Tunde dispela wik insait long olgeta provins na risal bilong vot i soim olsem olgeta i laik go long straik egensim gavman na Helt Dipatmen.

Long neks wik bai mipela i ken save long dispela disisen bilong ol sapos ol

nes bai kamap long ol haus sik na klinik long wok o nogat. Dispela em bai wanpela bikpela long sait bilong ol pablik bikos ol nes i stap na mipela i save kisim gut marasin na ol helpim.

Gavman bai toktok wantaim ol eksekutiv bilong nes asosiesen long dispela hevi bilong ol na sapos i orait, bai sampela gutpela disisen i ken kamap long stapim olgeta nes insait long kantri long noken straik long neks wik.

• Ol PMV bas long Mosbi i holim miting na i laik stapim ron bilong ol bas i go olsem long Kilakila, Kaugere na Badili bikos long ol bikhet pasin bilong ol raskol long hensapim ol bas na kisim mani bilong ol na tu bilong ol pasindia. Oltaim dispela kain hevi na trabel i save kamap long Sabama, Kaugere na Badili na ol papa bilong bas, boskru na draiva i ting ol i pasim stapim ron bilong ol long dispela hap eria. Ol i tok long olgeta bas namba 10, 13, 6, 8 na 17 i no inap moa ron long dispela hap eria.

Tasol long dispela wik yet, ol komyuniti memba long dispela tripela eria i holim bikpela bung na holim ol dispela trabel lain na givim long plis. Na ol i tok long bungim mani na baim ol dispela bas we i kisim birua ya. Ol laikim bas i mas ron yet long hap bilong ol bikos ol pikinini bilong ol i save go long skul olgeta de, ol papamama i save long wok olgeta de, na ol i mas i gat bas sevis long ron i go kam long kisim ol sevis na ol helpim olsem long stua, haus sik na planti arapela moa. Bai plis fos tu i wok klostu long was gut long dispela tripela eria long sefit bilong ol PMV bas na ol pasindia.



# spot wiken

## NGI na Hawks i stap namba tu

NGI nau i kalapim olgeta arapela tim long sindaun nau long namba tu ples long poin lata wantaim Hawks insait long Pot Mosbi mens sofbal kompetisen.

NGI i winim tupela gem long Sarere na Sande, na dispela i helpim ol long kalapim namba faiv ples na sindaun long namba tu ples.

Ol boi long wait na blek strai yunifom i wanpela bilong ol tupela tim husat i winim tupela gem long las wiken. Jolibee MSC em narapela tim husat i win.

Long Sarere, NGI i fofitit Burma Raiders na long Sande, ol i nekim ol eksperiens tim Brown Eagles 5-2.

Tupela top tim, Gazelle na AB Bears i no laki tumas. Tupela wantaim i lus wanpela gem na win long narapela tasol ol i holim yet namba wan posisen long lata.

Long Sarere, Bears i autim Gazelle 5-2 tasol ol i no laki taim Elcom i diskonektim pawa bilong ol 1-0.

Yangpela Ezekiel Tovia Junia i mekim dispela wanpela ran bilong Elcom.

Win bilong Elcom i bagarapim tru sans bilong Bears long holim strong o stap klia long namba wan ples long poin lata.

Arapela gem long Sarere, Brown Eagles wilwilim stret Hawks 17-3 na

### POM MENS SOFBAL RIPOT

Jolibee MSC autim HIH Manalos 3-2.

Gem namel long Dolphins na Tigers bai kamap long sampela taim bihain.

Long Sande, Tigers i autim Malangan 2-0, Gazelle winim Burma Raiders 5-2, Hawks autim Manalos 3-2 na Elcom autim Bears 1-0.

Poin lata nau i sanap olsem Bears 27, Gazelle 27, Hawks 20, NGI 20, MSC 19, Elcom 18, Brown Eagles 17, Manalos 16, Malangan 12, Burma Raiders 10, Tigers 10 na Dolphins 4.

Bikpela gem namel long NGI na Brown Eagles i no gutpela tumas long wanem, ol pilaia i askim planti kwesten tumas long ampaia.

NGI i gat tingting long traim winim top spot olsem na namba wan beta Nosan Albert i wokim wanpela bant na ran.

Namba tri bes pilaia bilong Brown Eagles, Chris Timmy i laik tromoi bal i go long namba wan bes na i abrusim maki olsem na Albert i ran i go olgeta long namba tri bes.

Narapela tupela beta Alois Odis na Blaise Tatai i no laki tumas.

Pitsa Michael Pukai i paitim wanpela gutpela bal stret long bringim Albert i kam hom long opim skoabuk. Pukai i resis go na sanap long namba tu pes.

Long bun Sam Kepas i kisim fri wok i go long namba wan bes na Pukai i go long namba tri bes.

Nigel Tata i paitim wanpela ugutpela bal long bringim Pukai na Kepas i kam long surkim skoa i go long 3-0.

Gutpela filding wantaim gutpela pitsing i helpim tru NGI long brokim stret Brown Eagles long mekim wanpela skoa.

Brown Eagles husat i mekim bikpela win egensim Hawks las wiken i painim hat tru long bungim NGI.

NGI i kisim wanpela skoa i kam long Blaise Paivu Junia bihain long Pukai i paitim wanpela gutpela plesing long surkim skoa i go 4-0.

Allan Jones bilong Brown Eagles i paitim wanpela hom ran long mekim skoa i lus nais 4-1.

Tata i mekim wanpela gutpela pilai stret i winim ol bes bihain long pitsa bilong Brown Eagles Paul Tabete long lukim skoa i glong 5-1. Las ran bilong Brown Eagles em i kam yet long Damin Wartovo 5-2.



• Pilaia bilong Hawks i daunim het bihain long em i kamap long namba wan bes taim ol i salensim Manalos. Hawks win 3-2.

*Foto: Isaac Ikuavi.*

## Wantoks i bagarapim plen bilong AB Bears

WANTOKS i bagarapim tru plen bilong kompetisen lida, AB Bears, insait long Pot Mosbi wimens sofbal kompetisen.

Dispela win 6-4 i soim tru olsem Wantoks em i no isipela tim. Ol arapela tim i mas tingting gut taim ol i salensim ol kas ya.

Tasol lus bilong AB Bears i no bagarapim tru posisen bilong em long poin lata. Em i stap yet long namba wan ples.

Mazda i sindaun namba tu na Wantoks i stap long namba tri ples we wanpela poin tasol i brukim dispela tupela tim.

Mazda i wilwilim stret All Stars 12-1, Norths autim Gazelle 5-1 na Chebu i rekotim namba wan win bilong em long dispela sisen taim ol i waraim stret Malangan 12-0.

Poin lata nau i sanap bihain long las wiken gem i olsem Bears 24, Mazda 20, Wantoks 19, Norths 16, Gazelle, 11, All

### POM WIMENS SOFBAL RIPOT

Stars 10, Malangan 2 na Chebu 2.

Insait long namba wan ining, Wantoks i opim ai bilong Bears stret taim ol i skroim 5-pela ran.

Pitsa bilong AB Bears Maggie Joseph na ketsa bilong em Tessie Komek i painim hat taim stret long beta bilong Wantoks.

Yangpela Mathilda Moe i mekim wanpela bant long paulim infil bilong AB Bears na ran i go long namba wan bes.

Kolish Banam i paitim wanpela gutpela bal i go long sotstop bilong AB Bears Wendy Sogai tasol em i no holim gut bal na Banam i kamap long namba tu bes.

Arapela beta bilong Wantoks gen, Andrewlar Moe i paitim wanpela gutpela bal i go long aut fil long bringim yangpela susa bilong em, Mathilda long kam hom long opim skoa bilong Wantoks.

Dispela nau i opim rot bilong ol arapela pilaia olsem Banam, Andrewlar Moe na Anna Trawen long kam hom bihain long gutpela plesing bilong Veronica Bagasel.

Bagasel yet i kam hom bihain long Aida Roberts i paitim wanpela strongpela bal i abrusim ol outfil bilong AB Bears.

Bears yet i mekim planti asua na i no paitim gut ol bal ya.

Taim AB Bears i bet, tripela pilaia Sogai, Joseph na Komek i no winim wanpela bes bikos Wantoks i blokim olgeta rot bilong ol ya.

Bears i skorim ol ran taim Helen Tata i kam hom bihain long ketsa bilong Wantoks Philomina Marut i no holim gut bal 1-5.

Wantok i skorim las poin long namba tri ining, na AB Bears tu i rekotim arapela tripela poin long sem ining.

### MADANG VOLIBAL RIPOT

## Madang lajk statim junia kompetisen

PRESIDEN bilong Madang Volibal Asosiesen Willie Bagore i autim tingting long yusim ol skul insait long Madang taun long statim junia kompetisen.

Bagore i tok em bai askim Edukesen dipatmen long kisim ol haikul na top-ap skul long stap insait long junia kompetisen.

As tingting bilong kirapim dispela junia kompetisen em bikos Madang i gat tingting long salim wanpela tim i go long junia sempionsip we bai kamap long Pot Mosbi long Kwins Betde

Bagore i tok em i laik kirapim dispela sempionsip kwik long givim sans long ol yangpela ya long soim save bilong ol long nesenel sempionsip.

Insait long arapela volibal nius, Madang bai holim Noten Zon volibal sempionsip long Laiwaden oval long mun Jun.

Em i askim ol tim ausait long Noten Zon husat i gat mani long kam insait long dispela resis i ken kam traim skelim strong.

Madang Volibal Asosiesen i makim wanpela komiti long sindaun stretim na glasim wok redi bilong noten zon volibal sempionsip.

Nem bilong ol komiti memba em Moses, Steven Kadam, Andrew Morasa, Ronald na Christine Siwanbon.

Long lsten wiken, Madang tu bai salim wanpela strongpela tim i go stap insait long volibal klab sempionsip. Ol primia tim na namba tu bai makim pes bilong Madang long sempionsip. Ol tim ya em Tsunami na Wantoks (men) na Wantoks na Nomads (meri).

### MT HAGEN SOFBAL RIPOT

## NGI wilwilim Malangan

COCA COLA NGI i wilwilim stret Malangan long bikpela gem bilong Mt Hagen sofbal kompetisen las wiken.

Dispela em bikpela sem stret bikos Malangan em i gat namba long sofbal long Westen Hailens tasol NGI i nekim ol stret 7-3.

Dispela win bilong NGI nau i surikim ol i go sindaun long namba tri ples.

Kepten bilong Malangan Markis Vovono i winim tos na ol pilaia bilong em i bet. Tasol ol i no rekotim wanpela poin bikos NGI i blokim olgeta beting bilong ol.

Orait long dispela ining yet, NGI i kisim bet na rekotim foapela ran olgeta. Namba wan pilaia bilong NGI long skoa em Danny Watts.

Bihain long em, Abraham Daniel na Junior Diap i kam pitsa Serby Pirupia i paitim wanpela hom ran we bal i abrusim mak long baundri.

Ol beta bilong Malangan tu i soim sampela strong bilong ol tasol ol auffilda bilong NGI olsem Daniel na Vincent Norlick i strong na banisim ol ya.

Orait long namba tu ining, Norlick i paitim wanpela gutpela bal i go long infild eria bilong Malangan, na ol i no stapim na em i kisim wanpela skoa.

NGI i putim kamap sampela gutpela pilai i kam yet long Victor Pite, Joel Jones na Nelson Malum.

Tasol long namba tri ining, Vovono i statim skoa bilong Malangan.

Insait long long dispela ining yet, NGI i rekotim tripela moa poin we i surikim skoa bilong ol i go 7-1.

Malangan i rekotim tupela las poin i kam long Tamte John na Peter Lupalan.

Skoa i no bin kamap long arapela ining bikos tupela tim wantaim i taitim tru difens bilong ol na nogat skoa.





• Lephon: Danny Mong bilong HIH Manalos i redi long bet egensim MSC long Pot Mosbi mens softball kompetisen las wik. MSC win 3-2.

*Oi poto: Isaac Ikuavi*

• Aninit: Beta bilong MSC i tromoi bet egensim Manalos. Oi boi MSC i soim olsem oi i gat namba na win.



# Pot Mosbi wiken spot

• Beta bilong Burma Raiders i taitim bun stret long paitim bal.



• Claire Pise bilong Commerce i hetim bal taim tim bilong em i bungim IRC long Pablik sevans soka long Pot Mosbi las wik. Commerce i lus 1-0.



• Gol kipa bilong Word Publishing Karen Bayagau i redi long stapim pila ia bilong SP Holdings. Oi meri long niuspepa lus.



# Soka i laik traime nupela sistem

HENRY MORABANG i rattim

PAPUA Niugini Futbol Asosiesen (PNGFA) bai kamapim nupela sistem we i ken givim sans long olgeta pilaia i ken stap insait long nesanel tonamen long olgeta level.

Dispela em bekim bilong PNGFA sekretari jenerel Ivan Ngahan i go long tupela rijonel soka administreta.

Presiden bilong Momase Soka Federesen Peter Angassa na Hailens Soka Federesen David Chung i tokaut olsem standad bilong soka long Papua Niugini i daunbilo tru na i no wankain olsem ol arapela wan solowara kantri.

Tupela bikman ya i sutim tok long PNGFA i givim moa taim long stap insait long intanesenel tonamen na i no helpim long developim soka insait long ol 4-pela rijon insait long kantri.

Tupela rijonel administreta i askim sapos PNGFA i mas traime long kamapim

PNGFA RIPOT

wanpela nupela stadium na sapatim dispela kik resis long rijonel level.

Naghan i amamas long toktok bilong tupela administreta tasol em i tok mani na ol wokman em bikpela samting.

Mani i save stapim planti ol soka tim long kamap long nesanel kompetisen we ol pilaia i ken stap insait long resis. Long dispela taim nau, ol bai i no gat sans long stap insait long nesanel o provinsal tim.

Ngahan i tok olsem insait long Januari, PNGFA i senisim sistem bilong PNGFA Kap we i save kamap olgeta yia.

Nau PNGFA i kamap nupela sistem we ol provinsal sempionsip na bihain rijonel sempionsip na bilong nesanel sempionsip. Ol wina bilong rijonel sempionsip bai pilai long PNGFA Kap.

Dispela soka kompetisen em long soim olsem ol top pilaia bilong wanwan rijen nau bai salens long rijonel tonamen.

"Wantaim gutpela helpim, ol wanwan asosiesen bai traime long painim mani na tu sponsasip," Ngahan i tok.

Em i tok dispela K1 milien i kam long FIFA bai i no inap kamapim olgeta samting long wanpela yia.

Long bekim toktok long PNGFA i tromoi bikpela mani long intanesenel tonamen, Ngahan i tok olsem olgeta wok nau i mas stat long helpim na kamapim developmen skwat bilong ol yia i kam.

Ngahan i tok developmen skwat i mas pilai long ovasis long traime skelimi save na kisim eksperiens long intanesenel futbol. PNG i mas pilai egensim arapela kantri, na watpo bai ol i makim nesanel tim.

Dispela yia, PNGFA bai lukluk long strongim na sapatim Anda 23 man, And 20 man, Anda 18 meri na Anda 17 man.

Arapela gutpela nius em hap mani we i kam long FIFA, PNGFA bai skelimi i go long wanwan lokal soka asosiesen we i gat ol gutpela plen na gutpela wok administresen bilong soka.

PMSA RIPOT

## PMSA i mas holim AGM pastaim na sisen stat

I GAT wanpela singaut i kam long Momase soka klab long Pot Mosbi Soka Asosiesen long holim jenerel miting pastaim na ol i ken statim kompetisen.

Simon Koima husat i save mekim planti nois long PMSA na tu PNGFA sapos samting i no stret i ting PMSA i noken statim sisen. Em i askim olgeta eksekutiv long sindaun na paitim toktok na holim jenerel miting pastaim.

Koima i tok dispela miting i mas tokaut long wanem samting i kamap las yia na wanem plen bilong dispela yia.

Bikpela samting tru em toktok bilong fainensel ripot. I gat planti paul toktok we i kamap i gutpela soka olsem PMSA i dpositim sampela mani wantaim wanpela mani skim.

Koima i tok PMSA i mas tokaut long ol memba klab, bikos dispela i no disisen bilong ol memba klab long mekim dispela wok.

Em i tok sapos miting i kamap orait PMSA i ken statim Charity Kap soka tonamen bilong em, prisisen na sisen propa.

Olsem wanpela mausman bilong Momase, klab bilong em wantaim olgeta arapela klab i laik save long fainensiel ripot bilong asosiesen.

LAE SOFBAL RIPOT

## Lae makim opisel bilong Rabaul sempionsip

LAE Sofbal Asosiesen (LSA) i makim tim menesemen bilong en long lukautim 4-pela tim bilong em long stap insait long nesanel softbal sempionsip long Rabaul.

Ol dispela 4-pela tim em sinia mens, sinia wimens, junia mens na wimen's developmen skwat.

Hetkosa bilong sinia mens tim em Noah Warkia. Albert Seri bai helpim na Allan Taule em i tim menesa.

Robin Kunai bai kisim wok bilong kosa bilong developmen skwat bilong man na John Keleu bai sapatim olsem namba tu kosa, na tim menesa em David Karani.

LSA i makim Steven Turlom olsem hetkosa bilong meri, na Joan Songi i kamap olsem tim menesa.

Biknem na mama bilong Malangen, Roslyn Pasen bai lukautim developmen skwat na Albina Edwards bai kamap olsem tim menesa.

Lae softbal asosiesen bai tokaut long nem bilong ol pilaia long dispela skwat long Februari 26.

Karanas i autim Coca Cola Aviat 6-4 insait long bikpela gem bilong mens softbal asosiesen.

Tupela tim wantaim i dro 4-4, na ol i mas pilai ekstra ining we Karanas i winim dispela gem.

Manalos i putim tim bikos planti bilong ol pilaia i save skul long Yunitek ya. Olsem na Brown Eagles nau i kam antap long namba tu ples.

Eagles i winim Hawks 10-6.

Malangan i wilwilim Burma Raiders Elcess 7-4 na Admiralty Marlins nekimi NGI 9-2.



## Edukesen i kisim namba wan lus

EDUKESAN wimens soka tim i kisim namba wan lus long dispela yia bihain long NCDC i nilim 2-0 long Pablik sevans soka resis las Sande.

Dispela lus ya i brukim tru lewa bilong ol meri long Edukesen, na ating neks wik, ol bai mekim save stret long wanem birua bilong ol.

Edukesen i wok long go pas long poin lata bilong wimens pul wan. Ol i save kamapim gutpela pilai stret.

Insait long ripot, Edukesen i sutim 14 gol olgeta long dispela sisen, na i nogat wanpela tim i sutim gol long ol.

Tasol las wiken NCDC i brukim dispela rekot na nekimi ol wantaim tupela gol olgeta.

Dispela wik Sarere, Edukesen bai traime strong bilong Fisheries. Ol meri bilong painim pis i stap long namba 8 ples long poin lata.

Edukesen wantaim ol biknem pilaia olsem Helen Posing (golkipa), Lorna Mave (winga), Dorcas Horris (midfil), Christine Tomokita (fulbek) na bos Jenny Silikara (midfil), ol i gat gutpela sans tru.

Ol Fisheries i nogat ol gutpela pilai, tasol ol i ken semim ol Edukesen sapos ol i no was gut.

PSSA RIPOT

NSO wantaim nupela yunifom bai skelimi strong bilong NCDC. NCDC i winim Edukesen 2-0, na dispela bai kirapim stret paia long tim.

Ricky Jonathan na Annette Kora-Aisa, tupela biknem pilaia long nesanel tim bai go pas long ol meri long City Hall.

NCDC bai winim dispela gem yet.

Cellnet bai bungim Nesanel Providen Fans (NPF). Ol meri i save salim mobile telepon nau i wok long kirapim pawa stret.

Frederica Siwin biknem pilaia bilong PNG tim yet bai go pas long dispela tim.

Long Yunivesiti graun wan Teachers bai bungim strongpela salens long Transpot, Police bai winim NAQIA, DCA bai traime strong bilong PNGBC.

Long Sande Elcom bai bungim Atorni Jenerel, Commerce bungim BPNG, Works bai salensim UPNG, Defence bai pilai wantaim NCC, NBC bai bungim Air Niugini na IRC bai skelimi strong bilong IRC.

• Yangpela Kasau bilong Atorni Jenerel i soim stail egensim Commerce. Em i stap na Atorni Jenerel i win 1-0.

POM WIMENS SOFBAL RIPOT

## Meri Mosbi makim skwat

POT MOSBI Wimens softbal asosiesen i makim pinis wanpela trening skwat long stap insait long nesanel softbal sempionsip we bai kamap long Ista wiken long Rabaul.

Dispela sempionsip bai kamap long Epril 22-55 we bai kamap long ol ples insait long Gazelle eria.

Sempionsip ya tu bai makim 25 krismas bilong softbal i kamap long Papua Niugini, na i stat long Rabaul.

Ol eksekutiv bilong PMWSA i wanbel long skwat na ol i tokaut long nem bilong ol pilaia.

Ful skwat em: Selina Karai, Pitbat Mamalau (Mazda), Nancy Pala (All Stars), Pauline Wakit (Wantoks), Fenella Sam (Norths)

- Pitsa, Robertha Kaul (Norths), Mathilda Pondriket (Gazelle), Tessie Komek, Wendy Katusele (AB Bears) - ketsa, Jenny Pilak (Gazelle), Antonia Tatai (Bears), Freda Mero (All Stars) - fes bes, Joyce Inguba (Bears), Shirley ToMangana (Mazda), Pala Manet (Norths) - seken bes, Wendy Sogai (Bears), Ensie Tovia (Wantoks) - namba tri bes, Alice Kalas, (Mazda), Dianne Gideon (Bears), Anna Wosley (All Stars) - sot stop, Helen Tata (Bears), Helen Singiat (Mazda), Aida Roberts (Wantoks), Ronnie Kilala (Norths), Mectil Raymond (Norths), Mectil Tonga Jnr (Gazelle) - outfidas, Mona Lisa Leka (All Stars) na Philomina Marut (All Stars) - yutiliti.

Kosa bilong tim em Dein Bais (kosa), na namba tu kosa em Emma Kalas na Mectil Tonga Junia (tim menesa).

Ol eksekutiv bilong Pot Mosbi wimens softbal i tokaut olsem dispela em trening skwat na fainel 17 pilaia bai go long Rabaul.

Olgeta pilaia husat i stap long skwat i mas bung wantaim ol kosa bihain long bikpela gem nemei long Mazda na AB Bears.

Wanwan pilaia husat i stap long trening skwat bai baim K500. Sapos ol i no stap long fainel tim, ol bai kisim bek mani.

• Insait long arapela nius, Pot Mosbi wimens softbal asosiesen bai holim wanpela danis long traime wokim sampela mani bilong salim tim i go long Rabaul.

# PNGRFL rausim 4-pela biknem senta

PAPUA Niugini Ragbi Futbol Lig (PNGRFL) i saspending 4-pela bikpela ragbi lig senta long dispela wik.

Ol dispela senta em Pot Mosbi, Lae, Mt Hagen na Goroka.

Jenerel menesa bilong PNGRFL Kevin Murphy i tokaut bihain long 4-pela lig ya i bungim taim bilong baim afiliesen fi.

Em i tok ol bai makim sampela ol lain long ranim dispela ragbi lig senta.

Dispela rot bilong stretim afiliesen i karamapim dispela ol eria:

- junia lig afiliesen
- rejistresen bilong teknikel opisel bilong wanwan gret
- baim K2,200 afiliesen fi, na
- stretim dinau bilong PNGRFL.

Anit long seksen 4 bilong konstitusen bilong PNGRFL, wanem ol lig i no baim afiliesen fi bai kisim mekim save, na ol i ken saspending ol opisel na rausim ol

## PNGRFL RIPOT

olgeta long noken memba moa long PNGRFL.

I tru olsem planti lig i no baim rejistresen, PNGRFL i saspending ol bikpela senta bikos ol i mas go pas long soim gutpela pas.

Murphy i tok bot ov dairekta miting long Januari 24, i pulim mausman bilong 34 lig insait long kantri.

PNGRFL i bin givim ol bikpela taim tru long redim dispela ol afiliesen fi tasol nogat wanpela asosiesen i mekim wanpela samting.

Na tu PNGRFL tu i kamapim wanpela kalenda we olgeta asosiesen i kisim.

Insait long kalenda i tokaut olsem:

\* lig na klab afiliesen bilong 2000 bai pas long Septemba 25.

Olgeta wanwan presiden i kisim dispela

notis long Julai 24 las yia.

\* PNGRFL i salim notis long baim K2,200 na ol rejistresen fi bilong olgeta teknikel opisel.

Murphy i tok olgeta presiden i kisim dispela toksave, tasol ol presiden bilong wanwan lig i surikim tok long ol klab presiden o nogat.

Aplikesen bilong afiliesen bai gat nem bilong presiden, vais presiden, sekretari, tresera, rejistresen opisa, dokta, siaman bilong judiseri, presiden bilong referi na presiden bilong ol junia klab.

Jenerel Menesa i autim wari bilongem olsem planti ol lig edministreta i no save mekim gut wok bilong ol.

Dispela as tasol na toktok i no save go kamap long klab presiden na ol pilaia.

Na tu, planti ol man i no save painim taim sindaun na ritim mama lo (konstitusen) bilong asosiesen na tu PNGRFL.

## LAE LIG RIPOT

### Kaupa win gen sia bilong Lae

RUSSEL Kaupa i winim wok presiden namba tri taim bihain long jenerel miting i makim em long wiken.

Kaupa i winim namba wan birua bilong em, George Mack bihain long namba tu vot. Long namba wan vot, tupela i dro 8-8, olsem na miting i holim namba tu vot we Kaupa i kisim bek sia bilong presiden 10-8 vot

Ol arapela eksekutiv bilong lig em David Nandoma - vais presiden, Alex Dawa - sekretari na Gavin Ross - tresera.

Jenerel miting tu i makim 5-pela arapela komiti long wok na helpim ol eksekutiv. Ol arapela opisel Ben Bire na Augustine Wampe.

Ben Bire i kisim wanpela strongpela mekim save we PNGRFL i rausim em long pilai ragbi long laip. Tasol nau em i kisim wok komiti, ating PNGRFL bai i no inap luksave long Bire ya.

Presiden bilong PNG Junia Ragbi Lig Himony Lapiso i makim maus bilong PNGRFL na sindaun long miting bilong ol.

Sia bilong vais presiden na sekretari i no gat bikpela sans tasol sia bilong tresera i gat bikpela salens tru.

Man husat i salensim Ross em Eddie Tobal husat i les long resis long vais presiden na laik salensim Gavin Ross long tresera. Taim bilong holim vot, Ross i win isi tru wantaim 12 vot na Tobal i kisim 5-pela tasol.

Kaupa i tok amamas long Mack long givim em gutpela salens.

Presiden i askim olgeta klab long traim wok bung wantaim long kamapim nem bilong Lae ragbi lig.

Taim em i holim wok presiden, planti ol klab na opisel i no save soim laik long traim helpim ol eksekutiv bilong Lae Ragbi Lig long ranim asosiesen.

Kaupa i tok LRL i no holim jenerel miting bikos nogat ol klab opisel i soim laik. Olsem na nogat nupela opisel long kisim ples.

Em i askim olgeta opisel long putim wanem kain hevi bihain na traim kamap na sapotim opisel bilong LRL.

## PNG YUNION RIPOT

### Pukpuk bai kisim strongpela salens long Fiji

OL SELEKTA nau bai glasim gen pilai bilong PNG Pukpuk taim ol i go insait long namba tu raun bilong Wol Ragbi Sevens insait long Pasifik rijen.

Namba wan raun i bin kamap long Wellington, Nu Silan we PNG i lusim tupela gem na winim wanpela tasol.

Long Fiji, PNG i lus wansait stret long asples tim, 54-0, lus long Argentina 28-15 na winim USA 28-12.

Na ol i go stap long Bowls seksen we ol i winim Cook Ailians 31-5 tasol ol i lus long Croatia 31-12. Planti ol pilaia bilong Croatia i save stap na pilai long Nu Silan ya.

Tim menesa Tony Armstrong i tok PNG Pukpuk i no difend gut olsem na ol i lusim dispela tupela bikpela gem.

Em i tok ol pilaia i save ol i mekim rong, olsem na ol bai traim long stretim dispela long Fiji. Armstrong i tok olsem long gem long Fiji, PNG i stap wantaim Nu Silan, Croatia na Canada.

Nu Silan em wanpela strongpela tim we i lus long Kap fainel egensim Fiji. Olsem na ol bai gat tingting yet long win na traim salensim gen Fiji ya.

Canada i soim tru ol ragbi union boss olsem ol tu i gat namba ya taim ol i winim Plate fainel.

Armstrong i tok Suva i wankain tasol olsem PNG. Ol i gat sans na ren wantaim we PNG Pukpuk i ken yusim dispela kain de long traim winim sampela gem long dispela wiken long Fiji.

Ol pilaia bilong Pukpuk i kamapim gutpela pilai em Aiem Plikos, Paul Joseph, Nolan Warpina na Willie Petalie.

Arapela yangpela pilaia we ol i no yusim em yet em Andrew Mark bilong Goroka. Petalie i bin kamapim gutpela pilai egensim Croatia na em bai gat sans gen long stap insait long tim.

Armstrong i tok dispela pul i no isi pul. Em i wanpela strongpela pul stret na ol Pukpuk bai traim long kamapim strongpela gem stret.

Bihain long Fiji, PNG Pukpuk bai kam stap long Brisbane, Australia long pinisim olgeta gem bilong Pasifik rijen.

**POM YUNION RIPOT**  
Royals i kisim sponsa long benk

FAINENS Pasifik Grup ov Kampani i givim K2,500 i go long Royals ragbi union klab long Pot Mosbi.

Klab ya i kisim man taim tupela biknem bilong Boroko Pils Stesin, Asisten Komisina Raphael Huafolo na Sif Suprintendent Joehn Marru i senisim wok bilong tupela long Boroko.

Marru em i patron bilong ragbi union Ida.

Olsem hap wok bilong komyniti polleing, ol yangpela i ken stap insait long ragbi union tim long kamapim gutpela wok bung wantaim namel long komyniti na ol pilsman.

Huafolo i tok sports em wanpela gutpela rot long stapim ol hevi bilong trabel insait long sit.

Marketing menesa Philip Imbuni na Gabriel Rooney i bin givim dispela man i go long klab ya.

Marru i tenkim Fainens Pasifik we ol bai yusim dispela man long traim statim gen klab.

Ol pilsman nau i wok long stap insait long sevens kompetisen. Na ol bai redi tasol long 15's kompetisen bihain long sevens sempionsep we bai kamap long Lae long Mee 3-4.

Imbuni i tok em i amamas long kampani bilong em i sapotim klab bilong ol pilsman. Na i i gat bilip olsem dispela i ken kamapim gutpela wok bung wantaim namel long pils na ol beng.



• Straika bilong Cellnet Henry Bae i rausim bal long birua bilong em long Police. Police win 1-0. Foto: Isaac Ikuavi.

## Diau sapotim Sum soka

OLPELA biknem edministreta bilong ragbi lig long Pot Mosbi, Ben Diau, i givim wanpela sil i go long Sum soka asosiesen insait long Sumgilbar eria insait long Madang provins.

Nem bilong dispela soka sil em Millennium Kap we ol yangpela long Sum eria bai resis long winim.

I gat ol mausman bilong Madang Provinsal Gavman, Momase Soka Federesen na tu opis bilong Madang Gavana i bin stap long witnes long dispela nupela soka. Memba bilong Raikos Stahl Musa i makim Gavana Jim Kas long dispela seremoni.

Diau i tok sapos em i ken

lukim wanpela liklik mangi long ples i mekim nem long ragbi lig, ating wankain tu i ken kamap long soka ya.

Em i mekim tok piksa long biknem pilaia bilong Melbourne Storms, Marcus Bai.

Diau i tok em bilong Sumgilbar eria na em i pilim olsem em i mas givim bek samting i go long komyniti na asples bilong em.

Em i mekim wanpela tok salens long ol yangpela man na meri hust i bin kamap long lukim dispela bikpela seremoni olsem ol i mas kamapim gutpela pasin bilong pilai na noken kamapim trabel.

Diau bai sapotim dispela

tonamen inap long 5-pela yia olgeta.

Long makim maus bilong Gavana Kas, Mista Musa i tok amamas long Diau long mekim samting long laik bilong em .

Em i tok nau kantri i painim bikpela hevi tru long mani na na ol pipel bilong Sum i mas amamas long kain helpim i kam long Diau.

Kos bilong Millennium Kap i sanap long K10,000 we ol top tim insait long sinia mens na wimens soka bai resis, na wimens volibal na junia soka.

Musa i askim olgeta spotsman na meri long kamapim gutpela pilai long taim ol i stap insait long fil.



## Saut Pasifik rijonel nius:

## Suva, Fiji:

## SPC i gat nupela dairekta

Lourdes Pangelinam em nupela Dairekta Jenerel Seketeriet bilong Saut Pasifik Komyuniti i wok long mekim namba wan lukluk raun bilong em i go long ol opis bilong SPC long Suva long dispela wik bihain long em i kisim dispela wok long las mun.

Ol bin makim Mis Pangelinan insait long wanpela bung long hetkota bilong SPC long Noumea, Nu Kaledonia i no longtaim i go pinis.

PACNEWS i tok taim Pangelinan i lukluk raun long SPC opis na ol susa ogenaisesen long Suva, em bai lukim na toktok tu wantaim ol diplomet bilong ol memba kantri. Em bai lukim tu ol han bilong Yunaitet Nesens grup long Fiji.

Mis Pangelinan i tok em no nupela long dispela wok bikos em bin holim wok olsem deputi dairekta jenerel long Noumea. Na em bin wok tu wantaim deputi seketeri Jimmy Rodgers long Suva opis.


Em bin tok nupela teknoloji na ol mesin i wokim komyunikesen i isi na dispela bai mekim wok i kamap moa gutpela namel long SPC opis long Noumea na Suva.

## Samoa:

## Pasifik environmen grup kisim mani sapot long Australia

Australia i givim A\$3.3 milien (K16.5 milien) i go long Pasifik environmen rijen grup, Saut Pasifik Rijnal Environmen Program (SPREP) long karimaut ol wok bilong em long lukautim environmen long rijen. Environmen em ol bus, graun, wara, solwara na ol samting i stap aninit, insait na antap long ol.

Mani ya em bai skruim wok bilong SPREP insait long tripela krismas i kam. Ol program we mani ya bai sapotim long sampela bai lukautim environmen long ol bagarap na dispela bai karamapim ol program bilong karimaut ol environmen edukesen, wok we



• Ol liklik manki bilong ples long Fiji i amamas pilai nabaut namel long ol diwai taim ol i kisim piksa bilong ol. Piksa i kam long Insight Red Kros Megesin.

lukautim ol taiswara na ol mangru diwai, turisim na environmen na ol wok long sapotim gavman long ol intenesenol environmen toktok.

SPREP i tok Australia i givim bikpela mani sapot tu long kirapim nupela hetkota bilong ol long Vaillima, Samoa. Ol bai pinisim dispela wok long Jun 2000.

Australia i wanpela long ol 26 memba kantri bilong SPREP. Ol narapela em long Ameriken Samoa, Kuk Ailan, FSM, Fiji,

na skelim ol nupela memba bipo ol i gviim tok orait long ol. Praim Minista bilong Tuvalu Ionatana Ionatana i bin mekim dispela aplikesen long las yia mun Novemba.

Nainpela ailan i kamapim Tuvalu. Em ol long Nurakita, Nukulaelae, Funafuti, Nukufetau, Nanumanga na Nanumea. Long ol ailan kantri insait long Pasifik, Tuvalu em i liklik stret na long ol wok developmen, em i stap olsem las. Wankain tu long mak bilong pipel i stap long en na tu long bikpela long graun. Tuvalu i gat 24 skwea kilomita bilong graun na 10,500 pipel long en. Sapos UN

Tausee Sunia i bin raitim gen senis bilong insait long 21 pes dokumen pepa. Na ol b putim i go long palamen long las yia yet v 11-pela memba i bin tok oraitim na 2-pel tasol i egensim.

Ripabliken memba Muaveafa'atasi A Junia i tok em i sapotim Bil , tasol i no olgeta. Wanpela samting we em no wanbel lor en em no laikim Eksekutyutiv Seketeri bilong Lokol Environmen Kwaliti komisin long go olgeta pawa long sasim ol fi bilong ol pem we bai larim ol pipel i ranim ol operesen.

Muaveafa'atasi i tok Fono o lo i ma



• Wanpela Red Kros volentia i sekim lau bilong wanpela yangpela sumatin long Draiba Fijian Skul long Suva.

Kausnil i tok oraitim aplikesen bilong Tuvalu, em bai kamap olsem 189 memba kantri bilong UN.

makim ol fi na mani we ol i kisim i mas go long Steseneri Polusen Sos Fan. Em i tok eksekutyutiv atoriti i kisim planti pawa tumas na bil tu i no klia.

## Honiara, Solomon Ailan:

## Solomons sevim mani long 1999 baset

Solomon Ailan Alaiens bilong Senis gavman i tokaut olsem em bin wokim seving long 1999 baset, maski sampela hevi i bin kamap long ailan olsem dispela long Guadal kanal, Pacnius ripot i tok.

Praim Minista Bartholomeo Ulufa'alu i bin tokaut long dispela samting long ol niusman long dispela wik. Em bin tok gavman i bin sevim US\$2.98 milien (SI\$10 milien). Long 1998 tu, em bin sevim US\$2.98 milien.

Em i tok maski hevi i bin kamap long Guadal kanal na gavman i tromoim SI\$40 milien (US\$7.95) long kisim ol refuji i go long ples bilong ol na tu long ol plis operesen bihainim dispela hevi, em bin sevim yet sampela mani.

Mista Ulufa'alu i bin tok tu olsem Solomon Ailan i stretim pinis olgeta dinau we em i gat long ovasis na insait long kantri yet. Long wanpela dinau tasol we em i no bekim yet, em i wok long toktok wantaim gavman bilong Japan long kisim sapot bilong bekim dispela. Em i tok mak bilong inflesen we i bin stap long 13.8 pesen taim em i go long gavman i bin kam daun na nau i stap long 7.5 pesen.

Em i tok gavman bilong en bai go het wantaim wok long karimaut mentenes long ol rot, bris na ol arapela bikpela wok na tu wok long skruim ol senis long gavman sistem bilong kantri. Dispela i karamapim nupela provinsel gavman sistem senis na edukesen ekt we gavman bai kamapim long dispela yia.

## Ameriken Samoa:

Haus bilong Representetiv bilong Ameriken Samoa i tok oraitim sampela bikpela senis long Lokol Environmen Kwaliti Ekt we i save kamapim ol asples lo i lukautim ea, wara na ol arapela pipia we i save bagarapim ples.

Edministresen bilong Gavana George

## Kenbera, Australia:

## SBS ripot tok Pratt bin spai long Care Canada long Kosovo

Steve Pratt husat i wanpela long ol tripela Care Australia wokman we ol bin kalabusim ol long Kosovo, Yugoslavia las yia i kros na tok ripot we SBS Dateline program i putim aut bai kamapim trabel long ol Care woklain.

Yugoslav gavman i bin kalabusim Mista Pratt, Peter Wallace na Branko Jelen long Yugoslavia las yia long taim bilong bikpela pait na hevi long Kosovo bikos ol i sutim tok long tripela Care woklain olsem ol i wokim spai pasin.

Mista Pratt i tok ripot we SBS program i wokim na i tok em bin helpim long kirapim wanpela spai grup wantaim Care Kanada long Kosovo i no tru.

Em i tok ol ripot we em bin helpim long sanapim Care Kanada operesen long kisim ol pis monita long Kosovo long wok long gavman bilong Kanada olsem ol sapis i no tru.

Em i tok em bin helpim tasol John Watson bilong Care Kanada taim em i kam pastaim long soim em long ples na ol trabel eria.

Mista Pratt na tupela wanwok bilong em bilong Care Australia i bin stap long kalabus long Serbia long faipela mun las yiai tok Care Kanada i no bin wokim wanpela samting long brukim lo na ol wok long eria i gat hevi long Kosovo na Serbia.

Siaman bilong Care Australia Malcolm Frazer i tok program bilong Care Kanadalong Yugoslavia i no gutpela.

Mista Pratt i tok SBS i wok long putim ol woklain long hevi taim em i autim dispela program na ol kain ripot wantaim.

Niusman bilong SBS Graham Davis i tok ol no bin autim nius inap Serbia gavman i larim fri tripela Care Australia woklain na ol nogat samting long wari long en nau.



• Ol dispela manki Malaia i pilai long wasan na waswas long nambis bilong nupela ed pos long Malaia, Solomon Ailan. Piksa i kam long Insight, Megesin bilong Red Kros.

ol meri i ken wokim long sut long dispela na ol arapela moa.

Palamenter Seketeri bilong Foren Afeas long Australia Kathy Sullivan long taim bilong sainim Memorandum ov Agrimen pepa i bin tok Australia i gviim dispela mani sapot bikos em i lukim olsem SPREP i wok long karimaut gutpela wok long lukautim environmen long Pasifik rijen.

Gerald Miles husat i go aps long SPREP opis long Apia, Samoa taim em i tok tenkyu long Australia i tok ol i luksave long pasin we em (Australia) i wokim long skruim sapot i go long ogenaisesen. Na em i tok ol bai yusim mani long ol bikpela wok long baset bilong lukautim ol operesen wok. Na narapela hap mani em ol bai yusim long environmen edukesen, ol wok bilong

Frans, Frens Polinesia, Guam, Kiribati, Masal Ailan, Nauru, Nu Kaledonia, Nu Silan, Niue, Noten Mariana, PNG, Pitken, Samoa, Solomon Ailan, Tokelau, Tonga, Tuvalu, USA, Vanuatu na Walis na Futuna.

## Nu Yok, Amerika:

## Tuvalu wetim tok orait long kamap UN memba

Klostu taim liklik Yunaitet Nesens Sekyuriti Kausnil bai tok oraitim Tuvalu em liklik ailan kantri stret long Saut Pasifik bilong kamap olsem memba bilong Yunaitet Nesens. Pacnius ripot i tok.

Long las wik Fraide, UN Sekyuriti Kausnil i bin putim aplikesen pepa bilong Tuvalu i go long han bilong komiti we i save glasim



# Jenerel Wiranto no laik risain long gavman

**Jakarta, Indonesia:** General Wiranto husat i holim wok olsem Difens Minista long Indonesia i bin kisim pepa long Presiden Abdurrahman Wahid bilong lusim wok bikos ol toktok i sut long em olsem man husat i bin go pas long hevi, bagarap na dai bilong planti pipel long Is Timor las yia. Tasol Jenerel Wiranto i no surik. Long las wik taim Presiden Wahid i stap long ovasis wokabout we bai go het inap long Februari 13 na em bai kam bek long kantri, Mista Wiranto i bin stap insait long Kabinet bung we Deputi Megawati Sukarnoputri i bin go pas long en.

Jenerel Wiranto i bin smail na abrusim ol ripota taim em i go long bung tasol i no bin wokim wanpela toktok taim em i go insait long rum we bung i kamp long en.

Jenerel Wiranto i no wanbel long humen raits ripot bilong gavman we i tok taim em i stap olsem bos bilong ami long Indonesia taim independens vot long Is Timor i kamap na hevi i go nogut, em tasol i bin givim oda long kilim na bagarapim ol pipel bilong Is Timor.

Taim Presiden Wahid i bin winim namba wan demokretik ileksen las yia, em bin kisim long kabinet ol poroman na birua wantaim. Na Jenerel Wiranto em bin wanpela long ol sinia memba bilong olupela militeri gavman bilong Suharto.



□ L-R: Deputi Presiden Megawati Sukarnoputri wantaim ol sapota. Top rait em Presiden Abdurrahman Wahid i kamaut long prea lotu. Sekyuriti i was long wokabout bilong en. Insait rait, Jenerel Wiranto, olupela ami komanda bilong Indonesia na nau Difens Minista long gavman bilong Wahid. Piksa i kam long Courier Mail niuspepa.



• Monki Bisnis! Taim wara i tanim i go ais long taim bilong bikpela kol long winta na nek i drai, ol monki i save brukim hap ais na kaikai, olsem dispela long piksa. Piksa i kam long Pacific Friend megesin.

## Rotuma Ailan laik lusim Fiji

**Rotuma, Fiji:** Gavman bilong Fiji i wok long mekim ol wok painimaut long ripot olsem ol pipel bilong Rotuma Ailan i laik bruk lusim Fiji na kamap olsem wanpela ripablik.

Rotuma Ailan i stap not long Fiji. Na em i stap aninit long lukaut bilong Fiji stat yet long 1881. Ailan ya i gat 2,500 pipel long en. Pasin tumbuna bilong ol i olsem ol Polinesia pipel long Tonga na Samoa.

Ripot i kam long Pacnusi i tok wanpela turis man bilong Amerika husat i limlimbur na malolo long ailan i wok long go pas long ol wok bilong Rotuma i laik bruk lusim Fiji.

Home Afeas Minista bilong Fiji Joji Uluinakaqavadra i tok dispela

dispela waitman i putim pinis wanpela konstitusen o mama lo bilong Ripablik bilong Rotuma yet. Ol sapota i wok long strongim ol sief na pipel bilong sevenpela distrik long Rotuma long sainim ol doku-men pepa long bruk lusim Fiji.

"Dispela turis bilong Amerika i stap long Fiji wantaim visitas pemit na em nogat rait long karimaut ol dispela kain wok, Uluinakaqavadra i tok.

Wanpela i migresen na plis grup long Suva we Deputi Komisina bilong plis Operesens i go pas long en i go pinis long Rotuma long karimaut ol wok painim long dispela ripot we i kamap pinis long ol atoriti long Suva.

## Niue kamap top long wol long edukesen

**Pasifik:** Niue em iklik ailan kantri insait long Pasifik i wanpela long ol kantri long wol we i gat namba long top edukesenel rekot. Dispela i min olsem ol pipel bilong em i save long rit, rait na olgeta pikinini i save go long skul.

Ol bin autim dispela ripot long Asia-Pasifik Edukesen for All (AFA) konpres long Bangkok, Tailand.

Ripot i tok ailan i gat 2,200 pipel na moa long 80 pesen long ol pikinini i stap long skul. Ripot i tok tru Niue i no bisi tumas long top na gutpela rekot bilong em tasol olsem sampela ol arapela Pasifik Ailan kantri, dispela liklik ailan kantri i ken skulim ol arapela kantri husat i wok long laik skruim edukesen level bilong ol.

Dokta Margaret Chung bilong UNESCO i bin tokim ol Pasifik Edukesen Minista long bung olsem wanpela wok rivyu long ol wok go het long edukesen sistem insait long rijen i soim olsem ol gavman long dispela hap i wok long tro-moim bikpela hap mani long skruim ol wok long edukesen.

Em bin tok sait bilong lukautim infomesen i no strong yet na ol mas strongim dispela long kamapim ol gutpela polisi.

Em i tok ol papamama na komyuniti na ol Non Gavman Ogenaisesen i mekim gutpela wok long sapotim edukesen. Long Fiji, ol komyuniti i manesim na ronim ol skul taim gavman i save givim ol kurikulum metriel tasol.

Pasifik rijen i gat gutpela rekot long ol pipel i save long rit na rait na go skul. Na ol meri tu i gat wankain sans long skul na kisim wok olsmo ol man. Tasol dispela i no kamap long Vanuatu, Solomon Ailina na PNG.

Dokta Chung i tok bikpela samting we ol Pasifik Ailan kantri i laikim em long skruim edukesen we bai karamapim laipstail na pasin tumbuna bilong ol.

Nogat wok em bikpela hevi long rijen. Na narapela samting em long skruim ol profesenel keria bilong ol meri, maski i nogat wansait pasin long skul, ol manki man i save kisim ol ples long ol vokesenel trening na ol meri i nogat.

## Ol monki i gat stail!



• Noken ting olsem ol meri na man tasol i save bilasim na stalim ol yet, nogat ya! Ol monki tu ya i save stailim ol yet, olsem dispela piksa i soim. Ol monki i save komim na stre-tim gras, putim ol mekap olsem penim pes long taim ol bikpela samting insait long komyuniti bilong ol i kamap. Piksa i kam long Pacific Friend megesin.

Arashiyama Monki Pak long Maunt Iwata, Kyoto long Japan i gat tupela grup monki i stap long en. Em long Grup e na F.Grup E i gat 150 monki long en na long kipim ol yet bisi, ol i save klinim na bilasim ol yet na ol poroman bilong ol, wokim pren pasin, jeles taim

wanpela i poromanim narapela na klostu wokim ol arapela kain samting we ol manmeri i save wokim. Ol i gat gutpela laip na ol i save stap amamas. Ol i save kaikai long ples we ol i save givim kaikai long ol na long nait, ol i save go bek long maunten long slip.

## Nupela dokumeteri bilong Osen Ailan

**Pasifik:** Katerina Teaiwa, wanpela sumatin bilong Rabi Ailan husat i stadi long kisim doktoret bilong em i wokim wanpela dokumeteri vidio piksa long histri na ol bagarap we posfet maining long Banaba na Osen Ailan i kamapim. Posfiet em fetalaisa marasin bilong putim long givim gutpela kaikai long graun long kamapim ol gutpela kaikai.

Nem bilong dokumeteri vidio

em long, Out of Phosphate: The Diaspora of Ocean Islanders. Piksa i kiism 20 minit long lukim. Mis Teaiwa i bin kisim ol piksa long ol akaiv bilong Britis Posfiet Komisinas long wokim ol vidio piksa long dokumeteri. Namel long 1900 na 1979, Osen Ailan i bin kamapim moa long 20 milien ton posfeit na ol agrikalisa industri bilong Nu Silan na Australia i bin

kamap gutpela tru.

Taim posfet maining i kamap strong, g avman bilong Briten we i bin lukautim ol dispela ailan i surukim ol Osen o Banaba Ailan pipel i go long Rabi Ailan long Fiji.

Mis Teaiwa i tok ol bin yusim posfet bilong Osen Ailan long kamapim na strongim ol wok agrikalisa long Nu Silan, Australia na ol arapela ailan kantri we i bin

kam aninit long lukaut bilong koloniel gavman bilong Inglan.

Long tude, Osen Ailan i nogat man i stap long en.

Ol haus samting i no gutpela.

Mis Teaiwa i tok tru maining bisnis i save kamapim hariap developmen long sampela taim tasol taim olgeta samting i pinis na ol i kamautim ol minerel long graun, bai nogat gutpela samt-

ing i kamap.

Traipela hul tasol na ol bagarap long envoirnmen bai stap. Ol bin surukim ol Osen Ailan pipel i go long Rabi Ailan long Fiji namel long 1945 na 1947.

I gat samting olsem 4,000 Osen Ailan pipel long Fiji. Na long taim bilong ileksen long Fiji, ol i save putim vot bilong olsem ol jener-el vota.



# Spakman lusim bia long nu yia

## ...Strongim disisen bilong yu

MASTA WAI i raitim

LONG Nu Yia bilong dispela ya 2000, planti lain i bin kamap wantaim planti kain kain senis ol i laik mekim o bihainim. Ol dispela senis i bilong senisim sampela kain pasin o laip bilong ol o we bilong ol long mekim samting. Long tok Ingis ol i save tok New Year Resolution.

Wanpela bikman mi save gut long em, i man bilong dring bia stret. Na em i no save kisim wanpela gutpela malolo taim bilong em long mekim arapela gutpela samting olsem ol liklik wok arere long haus o raun lukim ol famili na wantok o sampela kain gutpela wok samting. Em i mas tingim long dring bia long dispela malolo taim bilong em, maski Sarere o Sande.

Long Nu Yia stret bilong ya 2000 baga man ya i mekim bikpela na strongpela promis tru olsem em bai lusim bia bikos em i bin dring bia olsem 15 krismas olgeta. Na em i tok bodi bilong mi i olsem raun wara we bikpela swim pul bilong bia i pulap long en i stap. Olsem na mi pret long dispela na mi laik lusim bia.

Long mun Januari i kam, man ya i no moa tasim wanpela botol bia. Insait long dispela wanpela mun, em i save go long haus stret bihain long em i pinis wok, long wiken em i mas slip o go raun lukim ol pilai spot long kisim taim bilong em na em i no ken stap nating.

Long las wiken mi bungim em na mi askim em sapos em i pilim olsem wanem nau taim em i lusim bia long wanpela mun, na em i tok, bodi bilong mi nogat ol skin pen mi save pilim bipo na mi save pilim hevi long bodi, em i pinis nau. Mi ting mi ken ron long resis wantaim ol manmeri husat i save ron.

Em i tokaut tu olsem nau em i gat sampela mani i stap long poket bilong em na em i ken baim ol liklik samting olsem slipa o masin bilong rausim mausgras, ol siot na trausis bilong werim long malolo taim na arapela samting moa.

Mi askim sapos em i no inap pundaun long traim sapos long namel taim em i dring bia gen. Tasol em i tok, mi pilim sampela bikpela senis i kamap pinis long bodi na long luksave bilong mi. Na sapos mi go bek long pasin bilong dring spak gen, ating bai ol dispela gutpela samting we i kamap long mi nau bai ino inap kamap gen. Olsem na mi mas strongim tingting na bilip bilong mi olsem mi noken pundaun go bek long olpela pasin bilong bipo.

Long dispela taim man ya i bin senisim dispela dring spak pasin, em i lusim tu planti poroman bilong em. Ol poroman we em i save dring bia wantaim ol oltaim i no moa lukim pes bilong em. Na bihain ol i harim stori olsem man ya i lusim bia. Bikman ya i tok ol poroman bilong em ya em ol man bilong dring bia tu olsem na nogut em i raun lukim ol bai ol i dring na pusim em long dring bia gen. Em i tok em i man bilong pret long tok nogat taim wanpela poroman i givim em bia. Olsem na wanpela rot tasol em long em i mas stap longwe long ol long abrusim dispela taim.

Mi no lusim ol olsem poroman bilong mi olgeta. Mi ken baim buai o bungim ol long belo na mipela i ken baim kaikai na kaikai wantaim long taim bilong wok. Tasol taim



wok i pinis, mi mas go stret long haus long abrusim spak pasin, em tok.

Ating long dispela stori bilong bikman ya long lusim bia, sampela lain tu i bin lusim spak pasin na ol arapela pasin bilong ol tu. Sampela i lusim smok na buai. Sampela i lusim pasin bilong kros nabaut.

Sampela bisnis lain tu ating ol i senisim nupela rot bilong mekim bisnis na lusim olpela rot bisnis i save ron long en. Sampela lain i tok ating ol bai lusim wok na go bek long ples.

Sampela lain i mekim promis long baim ka o haus o wokim bisnis. I gat planti samting ol manmeri i tingim long mekim. Olgeta dispela samting ol manmeri i laik mekim em i olsem senis bilong senisim laip na pasin na sindaun bilong ol wanwan o bisnis bilong ol.

Bikpela tok bilong lotu em, lusim pasin bilong sin na kam lotu na stap insait long banis bilong Bikpela.

Mi bin sindaun long haus kaikai na baim sampela kaikai na kaikai i stap taim wanpela yangpela man tu i baim kaikai bilong em na kam sindaun klostu long mi na kaikai i stap. Em tok halo long mi na bihain mitupela i stori nabaut igo. Na bihain em i tokim mi, taim yu stap insait long pasin bilong lotu, bai gutpela pasin na toktok na tingting bilong yu bai kamap. Bai yu gat gutpela tingting na save long mekim ol samting i stret. Na yu no inap tromoi mani nabaut na yu no inap i gat hevi na kros long sin-

daun bilong yu na famili. Long pasin bilong lotu, gutpela pasin na sindaun i save kamap. Taim mi harim dispela toktok bilong yangpela boi ya i mi save olsem em wanpela lotu manki. Olsem na mi tokim em, tok bilong yu em tru tumas. Dispela ples graun i pulap long pasin bilong trabel, kros, pait, stil na planti arapela moa. Olsem na sapos i gat wanpela banis bilong ol Kristen lain yet, ating ol bai i stap gut tru. Tasol yangpela boi ya i tok, em i tru.

Tasol yu mas strong long tingting na bilip bilong yu na go fowet long wanem mak yu laik go long en. Yu mas mekim olsem Nu Yia Risolusen bilong yu. Yu mas mekim olsem promis bilong yu olsem yu laik lusim sampela olpela samting na go long nupela rot long laip bilong yu.

Mi skelim toktok bilong yangpela boi ya i gat bikpela mining tru wankain olsem poroman bilong mi we em i promis long lusim bia. Em i mekim promis long senisim laip bilong em long dring na spak pasin. Em i makim pinis nupela rot em i mas go long en bikos dispela nupela rot bai bringim amamas na gutpela sindaun long laip bilong em na famili bilong em tu.

Olsem na lotu tu i tok, nu yia risolusen bilong yu i olsem promis bilong yu long lusim ol bikhet pasin na trabel pasin bilong yu na senisim laip long painim gutpela amamas na sindaun long kristen famili.

Mi bin luksave tu long wanpela yangpela boi. Em i man bilong bikhet tru na smokim smok nogut,

dring spak, pait na mekim trabel nabaut long rot. Tasol wanpela taim em i marit na em i pilim bikpela hat taim tru. Bikos em i mas gat mani bilong baim kaikai bilong em na meri bilong em. Meri bilong em i mas gat mani long paus long baim ol bilas na ol samting bilong haus tu.

Raga man ya i pilim tru laip bilong marit na dispela hevi i daunim em na olgeta bikhet pasin bilong smok nogut, mekim trabel olsem pait na stil nabaut i pinis olgeta. Tingting i kilim em na em i

kisim em na em i pinis olgeta na kamap olsem gutpela papa, famili man na lida bilong famili. Olgeta lain bilong em i amamas tru long em long lukim olsem laip bilong brata bilong ol i senis na kamap gut tru. Senisim laip o senisim pasin em i save kamap taim yu promis tru long mekim dispela samting.

Sapos yu pilim hevi bilong laip tu i kisim yu, orait mekim senis long painim amamas na gutpela sindaun bilong yu yet na famili bilong yu tu wantaim.

**FRI BAIBEL  
KOS  
LONG PAS**

I kam long wanpela pren long America sapos yu laikim fri kos salim nem na adres igo long:

**WOL BAIBEL SKUL  
WBS - PNG 12,  
P.O. Box 9346,  
Austin, TX 78766 USA.**

# Plesman ai op long Mosbi Siti

MASTA WAI i raitim

OLGETA mani bilong Papua Niugini i stap long Mosbi siti tasol. Dispela em toktok bilong wanpela man bilong ples taim em i bin raun i go lukluk raun long Mosbi long mun long las yia.

Dispela bikman bilong Morobe provins i bin lukim Mosbi siti na aigris nogut tru long lukim ol kain kain samting. Man ya i skelim olsem olgeta samting bilong grisim manmeri na pulim tingting i stap long Mosbi. Olsem na long dispela as, planti manmeri i go long Mosbi ino save tingim long go bek long ples bilong ol hariap.

Bikman ya i laikim Wantok i kolim nem bilong em olsem Josua. Olsem na Josua i tok taim em i lukim olgeta bikpela longpela longpela tawa na haus long Waigani, Boroko na long Taun, em i ting Mosbi i olsem wanpela bikpela siti wankain olsem ovasis. Na taim em i lukim tupela ka i ron long wanpela sait rot na tupela i ron long narapela sait, em i ting dispela em bikpela developmen tru Mosbi i kisim.

Josua i lukim olgeta kainkain haus kaikai na ol laki haus na planti bikpela hotel bilong dring na pilai laki na disko ples tu. Na em i tok dispela kain tasol na Mosbi em ples bilong raun na painim amamas long wiken. Mi i lukim tru wara saplai i ron long olgeta haus isi tasol, pawa lait i lait long olgeta haus na rot, telefon bilong ring i pulap hangamap long Boroko ples, ol pikinini i no hat long go painim skul na go long skul, haus siƕ tu i stap long olgeta kona bilong siti. ol kainkain pilai spot tu i stap na planti arapela samting moa. Ol waitman i kam long ovasis i save kam pundaun long Mosbi pastaim na planti arapela senis moa, Josua i tok. Laip i isi tru na yu no inap hatwok long painim, em i tok.

Bikpela tingting bilong Josua em olsem ating Gavman bilong Papua Niugini i putim olgeta mani bilong Papua Niugini i go long stretim na mekim Mosbi i kamap bikpela na naispela ples bilong ol manmeri i raun na lukim na stap long en. Long dispela as em i tok mani i stap long Mosbi siti bikos olgeta de ol manmeri i bisi tru long mekim ol kain kain wok.



• Siti long Mosbi i gat ol longpela haus tawa na i ken pulim ai bilong plesman.

Wanpela bikpela samting Josua i no laik em, ol bikhet na raskel pasin we i wok long kamap planti insait long Mosbi siti. Em i bin stap sotpela taim tasol na em i harim nius bilong planti trabel na raskel pasin i kamap. Long nait em i harim pairap bilong sotgan na em i save pret nogut tru na tingim meri pikinini bilong em long ples. Olsem na em i tokuat olsem ol man husat i nogat wok mani na raun mekim trabel na raskel pasin nabaut i mas daunim het bilong ol na go bek long ples bilong ol. Bikos Mosbi em ples bilong ol wokmanmeri na ol skul pikinini bilong ol tasol. Mosbi em i ples bilong mani tu. Bikos olgeta samting long stua em

bikpela mani tasol, Josua i tok.

Dispela toktok bilong plesman ya i soim olsem tru ol manmeri long narapela provins i lukim Mosbi siti olsem wanpela bikpela siti we i narakain olgeta long sait bilong developmen.

Senis na groa bilong Mosbi siti i bikpela moa winim ol arapela taun olsem Lae, Hagen, Goroka na Rabaul.

Bikman ya i tok provins bilong em long Morobe i save kamapim planti mani long ol agrikalisa wok na bisnis olsem kopi, timba, salim kaikai long Lae maket na arapela liklik kes krop. Na tu het kota bilong ol long Lae i pulap tru long planti fektori na masin bilong

wokim ol samting bilong salim long stua na ol-bisnis nabaut. Lae tu i gat bikpela wof o bris bilong sip we i save karim ol bikpela kago na saplai i kam long ovasis bilong salim i go long ol arapela provins na ol bisnis bilong ol. Na Lae i save pulim bikpela mani long takis. Tasol em i sori long lukim olsem siti bilong em long Lae i nogat kain developmen olsem Mosbi we rot bilong ol ka i ron i pulap long hul. Na i nogat ol bikpela bikpela haus na bilding olsem Mosbi.

Lae i save kamapim planti mani wankain tu olsem arapela hailans provins we i gat ol maining long wel na gol.

Ol i save kamapim planti mani tasol provins bilong ol i wok long develop isi isi tru na Mosbi i go hariap tru, Joshua i tok.

Dispela kain tingting bilong Josua i tromoi askim i go bek long Gavman long pasin bilong em long skelim na tilim aut ol risoses na helpim bilong wanwan provins. Dispela em long lukim olsem olgeta provins i bihainim wanpela step tasol long sait bilong developmen na sevis.

Dispela rot inap mekim ol manmeri bilong Lae, Goroka, Hagen, Madang, Rabaul na arapela provins i ken stap isi long taun bilong ol yet na amamas long serim developmen na sevis ol i gat. Na ol i noken painim na kisim balus i go pulap long Mosbi siti. Na dispela em inap stapim tu pasin bilong raskel na bikhet long ol siti na taun bikos ol manmeri i stap long provins bilong ol stret na go bek isi long asples bilong ol.

Mosbi i sanap olsem hetkota bilong olgeta gavman opis na dipatmen. Na wanem kain hevi we ol manmeri i laikim i stap long Mosbi na oltaim ol i save kisim balus i go long Mosbi long stretim. Mani bilong ol manmeri i stap tu long ol pasbuk bilong Gavman

long Mosbi olsem na taim ol pinis long wok na i no kisim POSF, NPF o ol ritaiamen mani bilong ol, ol i save kisim balus i go long Mosbi long kisim.


Taim ol i gat hevi long tok bilong graun, wok bisnis o kot samting, ol i save go long Mosbi bikos het kota na olgeta fail pepa i stap long Mosbi. Het kota i stap long Mosbi bikos bikpela haus bilong wokim disisen, Haus Palamen i stap long Mosbi we olgeta momba i stap. Olsem na dispela i save pulim ol manmeri i go long Mosbi jasol.

Tasol luksave i stap olsem insait long ol bikpela taun na siti, hevi bilong em tu i bikpela. Pasin stii na raskel i bikpela. Ka i save bam long rot, ol man i spak na pait, man i lusim meri pikinini na maritim nupela meri, pasin pamuk, sik AIDS, nogat gutpela haus bilong sliip, nogat kaikai na planti moa hevi olsem i save stap bikpela long ol bikpela siti.

Na Mosbi siti i gat ol dispela kain hevi i pulap i stap. Ol dispela samting i kamap bikos long developmen we i pulim ol manmeri. Wanwan i painim gutpela sindaun na planti i save abrus na sotwin. Na bikos balus tiket i save kos bikpela mani tumas, ol i stap olgeta long Mosbi na mekim nating i stap.


Ol lida bilong mipela i save long ol dispela hevi tasol ol i save toktok planti na mekim planti mauswara tasol na ino save mekim samting tru long kamap wantaim sampela rot bilong stretim. Tasol dispela em hevi bilong ol pipel bilong dispela kantri na ol lida i stap long karim.

Na wanem taim ol i kamap wantaim rot bilong stretim na mekim kantri i kamap gutpela na ol manmeri i ken sindaun isi long wanwan provins bilong ol yet, em i stap long han bilong ol lida long kamap wantaim plen na gutpela polisi bilong ol.



• Ol sampela kain pilai masin na laki olsem i pulap long siti na i save pulim tru ol liklik manki.





# Ambra Meninba

kisim olgeta rop na go bek long maunten Ambra. Na em i wokim haus bilong em. Em i wokim kankain rum bilong kankain animel bilong bus. Orait long wanpela taim, em i laik pati long haus bilong em na em i salim tok i go long bus long olgeta animel mas kam.

Na em i bin salim tok olsem bos bilong olgeta pisin na ol muruk i mas kam long pes lain.

olsem em na ol lain bilongem i mas go sindaun long wanpela sait. Na sikauwantaim lain bilong em i go sindaun long narapela sait. Olgeta i sindaun gut tru na lukluk long liklik Ambra Meninga. Na Meninga i stat long toktok nau. Taim liklik pisin Meninga i laik toktok em bin holim wanpela spia sut. Na em bin toktok na skelim ol kaikai long olgeta animel. Em givim i

pinis ya na yu tu mas katim tel bilong yu na mitupela wantaim bai mitupela raun long graun. Sikau i bin trikim kiwi olsem na kiwi i ting dispela i tru na em bin katim tel bilong em. Sikau bin trikim kiwi olsem na em bin supim tel bilong em i go insait long as bilong em.


Na taim kiwi bin katim tel bilong em pinis nau, sikau bin rausim tel bilong em long as bilong em na tokim kiwi olsem. Brata mi trikim yu ya, teil bilong mi ya mi supim long as na nau mi rausim ya. Lkim. Yu stap

Long bipo bipo tru, i gat wanpela ples maunten ol i save kolim maunten Ambra. Na long dispela maunten Ambra i bin i gat wanpela liklik pisin i save stap.

Nem bilong dispela pisin em Ambra Meninga. Em bin stap i go na long wanpela taim, em bin wokim wanpela traipela haus tru. Em bin sanapim pos tasol em i nogat rop long taitim.

Orait long wanpela de em bin i go long bus long painim rop bilong wokim haus bilong em. Em i bin i go insait long bik bus stret na i kisim ol rop na traipela mama bilong ren stret i kam na wasim em gut tru. Olsem na em i nogat ples bilong sindaun. Na em i bin i go stap aninit long wanpela traipela diwai. Na wanpela muruk, em i bin painim pikinini diwai o diwai prut i kam na kamap long dispela hap. Na em i bin lukim baga Ambra Meninga i slip aninit long diwai stap. Em isi tasol i go na daunim em i go insait long bel pinis. Na ol rop em i bin kisim long en, em bin stap yet long as bilong diwai we em bin slip long en. Na long neks moning, muruk ya em i laik go painim nupela kaikai na olpela kaikai bilong aste, em bin rausim long dispela hap. Na taim em i go long dispela hap Ambra Meninga em i no bin dai. Em bin stap laip yet insait long bel bilong muruk.

Na taim muruk i pekpek i go ausait, Ambra Meninga i bin kirap na i go long wara na waswas gut tru na go long we hap em bin slip long en. Em i bin lukim olgeta rop em bin kisim long en i stap. Orait, em i bin



Na bos bilong olgeta kapul, sikau i mas kam long pes lain. Em i bin salim tok i go pinis na em i bin kilim pik na redi gut tru long ol lain long bus bai kam na kaikai.

Em redi stap na ol lain long bus i kam kamap pinis.

Em nau muruk sanap long pes lain na olgeta pisin bilong bus i bihainim em. Na bos bilong kapul em sikau i bin sanap pes lain na olgeta kapul i bihainim em na ol i pulim lain i kam kamap long maunten Ambra. Taim ol i kam kamap pinis, Ambra Meninga bin tokim muruk

go pinis na las tru, em bin singautim muruk long kam kisim kaikai bilong em. Olgeta animel i bin pinisim kaikai na muruk em las tru laik i go kisim kaikai bilong em ya nogat. Ambra Meninga i sutim em stret long spia sut long tupela lek bilong em. Nau yumi lukim lek bilong muruk long skru bilong em i save nogut ya, em long dispela as tasol.

Olsem na olgeta animel i bin flai nabaut. Na sikau wantaim kiwi tupela i bin i go long wanpela rot. Na sikau i bin tokim kiwi olsem. Mi katim tel bilong mi

daunbilo mi i go antap long diwai.

Em tok olsem na em i go antap long diwai na kiwi i nogat rot long go antap long diwai. Na em i stap tasol long graun.

Nau yumi save lukim sikau i save raun antap long diwai na kiwi save supim nus i go insait long graun na em save slip long graun.

**John Karpus  
Blue Mouftain  
Westen Hailans**



**Nem:** Kikarem Sakai  
**Krismas:** 19 (man)  
**Adres:** St. John Lutheran Youth Group, P O Box 165, Lae, MP  
**Save laikim:** Pilai soka, daiv long wara, go long bikpela gem na senisim presen wantaim arapela.

**Nem:** Andrew Blue  
**Krismas:** 16 (man)  
**Adres:** P O Box 390, Maprik, East Sepik Province  
**Save laikim:** Pilai tas, harim musik na pilai wantaim ol poro na raun long taun

**Nem:** Ronson Kay  
**Krismas:** 19 (man)  
**Adres:** P O Box 923, Togulo Plantation, Kimbe, WNPB  
**Save laikim:** Harim musik, slip, pilai soka na raun long taun painim ol pren na wantok.

**Nem:** Kelep Api  
**Krismas:** 19 (man)  
**Adres:** Kapiura Plantation, Bilomi Division 2, P O Box 451, Kimbe, WNPB  
**Save laikim:** Tok pilai wantaim ol mangi, papamama, go lotu, ritim Baibel na raitim pas i go long ol pen pren na marit.

**Nem:** Paul Don  
**Krismas:** 16 (man sumatin)  
**Adres:** Kombolopa high school, P O Box 1422, Mt. Hagen, WHP  
**Save laikim:** Go lotu, pilai na poroman wantaim ol arapela pipel.

**Nem:** Bobye Kuipa  
**Krismas:** 20 (man)  
**Adres:** Hi Way beef branch, P O Box 726, Kimbe, WNPB  
**Save laikim:** Go lotu, pilai ragbi, visitim ol nupela ples na givim presen i go i kam.

**Nem:** Betty Damien  
**Krismas:** 16 (meri)  
**Adres:** Sarakolok Primary School, P O Box 617, Kimbe, WNPB  
**Save laikim:** Harim PNG hits, go lotu, pilai spot, waswas long wara, tok pilai wantaim ol poro, mekim pen pren wantaim ol narapela manmeri, senisim poto, danis na visitim ol narapela ples.

**Nem:** Jeff Rambua  
**Krismas:** 15 (man)  
**Adres:** C.L.T.C, P O Box 382, Mt. Hagen, WHP  
**Save laikim:** Pilai ragbi touch, ridim buks, lukim TV, pren wantaim ol yangpela meri na senisim poto go kam.

**Nem:** Steven Muta  
**Krismas:** 18 (man)  
**Adres:** C.L.T.C, P O Box 382, Mt. Hagen, WHP  
**Save laikim:** Pilai basketbal, lukim TV na pren wantaim ol arapela meri.

**Nem:** Cynthia Quansah  
**Krismas:** 25 (meri)  
**Adres:** P O Box 5464, Kumasi Central, Ghana, West Africa  
**Save laikim:** Musik, Swim, Wokim prenasin na marit bihain.

**Nem:** Celia Quansah  
**Krismas:** 27 (meri)  
**Adres:** P O Box cc 903, Jerusalem-Crescent, Cape Coast, Ghana, West Africa  
**Save laikim:** Laikim ol samting i sut long pasin tumbuna, stori wantaim ol pren, musik, pilai, kuk na rit

**Nem:** Abdul Rahaman Shaibu  
**Adres:** P O Box cc 283, Cape Coast, Ghana, West Africa  
**Krismas:** 16 (man)  
**Save laikim:** Wokim pren na raitim ol pas.



## Mi wari bikos mi gat belkros long olpela gelpren

kamap olsem pren wantaim meri na mi bin smail long en long las taim mi lukim em. Tasol mi no save long daunim na lusim pasin bilong belkros.

### JELES

#### Dia Pren

Planti meri na man long olgeta hap bilong wol i save buŋgim dispela hevi.

Yu no klia sapos man bilong yu i laikim yu tru na yu jeles long narapela meri ya. Planti man na meri husat i save gat dispela kain tingting i rong. Bikos long dispela kain pretpasin na jelesi, ol no soim bikpela laik na lukaut long ol man o meri bilong ol na dispela i ken kamapim hevi we man o meri bai lusim wanpela.

Dispela samting i skruim hevi bilong yu moa yuet bikos olsem wanpela Kristen, yu save olsem em i rong long gat belkros long narapela. Tingting bilong yu i pas long no laikim em na yu pilim olsem em no stret long wokim dispela kain pasin. Bai yu senisim dispela kain tingting olsem wanem?

Nambawan samting em i moa-beta long yu i luksave long sam-pela samting we i sut long yu

yet. Na bikos yu tanim bel na givim laip bilong yu i go long Jisas, Baibel i tok yu stap long gutpela rot tasol yumi olgeta man em ol sin manmeri. Sin bilong yu i stap namel long yu na God. Bai yu wokim wanem samting?

Namba wan pas bilong John i tokim yumi olsem bekim long dispela i stap long sapta 1, ves 8 inap long 10. Yu mas luksave olsem yu sinman na askim God long lusim ol rong bilong yu. Tasol yu luksave long ron bilong yu na yu tokaut pinis long Papa God long dispela samting. Na God Papa i lusim tingting long sin bilong yu pinis na yu smail long meri ya.

Tasol bikos dispela pasin bilong hetim o strongpela tingting long no laikim em i stap longpela taim pinis wantaim yu, em i kamap olsem wanpela' hebit bilong yu. Na em i hat long lusim dispela hebit kwiktaitim. Tasol sapos yu wok long traime lusim, samting bai i wok na yu kamap gutpela.

Baibel i tok "i gat belkros we i bihainim lo na yu no wokim sin long en". Kros i kamapim gutpela samting taim em i gat long en bel sori pasin long ol dispela husat i wokim rong. Inap yu

tanim tingting bilong yu i go long preia olsem meri ya bai lusim ol sori bilong em long wanem em no moa prenim man bilong yu, na em bai painim ol nupela poroman.

Yu tok yu sem long toktok long man bilong yu long hevi we yu gat long olpela gelpren bilong em. Yu ting em i gutpela long tokim man bilong yu nau? Nogut man bilong yu i lus tingting pinis long meri ya na sapos yu kirapim ol toktok long en, moa hevi bai kamap. Na sapos em i tru olsem em wok long skruim toktok wantaim meri ya, em bai tokim yu o bai em kros tasol.

Stiatok bilong mipela long daunim hevi bilong yu em strongim tingting bilong yu olsem yu bai rausim olgeta tingting long en. Na sapos nogat, yu mas pait strong taim tingting long en i kamap wantaim nupela tingting olsem "Bai mi mekim wanem samting long amamasim man bilong mi? Bai mi kukim kaikai we em save laikim tumas? Bai mipela i wokim ol samting wantaim na dispela bai amamasim em o slipim bebi kwiktaitim na tupela yet i ken stap wantaim long toktok, serim ol samting na slip wantaim.

LAIPLAIN

### Dia Laiplain

Kristen laip bilong mi i wok long bagarap bikos mi gat belkros long olpela gelpren bilong man bilong mi. Bel bilong mi i no save gutpela long en taim mi tingim ol hevi we i bin kamap pastaim namel long mi na man bilong mi bikos long dispela meri. Sampela krismas i go pinis, mi bin kros wantaim man bilong mi long dispela samting na lusim haus. Nau mitupela i stap wantaim tasol mi save wari planti long bihain taim bilong mitupela. Mi save sem long tokim man bilong mi olsem mi save belkros tru long meri ya taim mi tingting long en o taim mi buŋgim em long sampela hap.



Mi wari tu bikos Baibel i tok em i rong long ol Kristen bilong belkros long narapela. Mi laik lusim pasin bilong belkros na



**Taim bilong  
ol pikinini i skul**

Taim bilong skul i stat long dispela wik Mande na olgeta hap long Papua Niugini em ol pikinini wantaim papamama i sanap lain long skul long Mande long stretim ol skul fi na nem bilong ol manki long klas. Long Mosbi tu, wankain pasin olgeta papamama long olgeta hap bilong PNG i mekim, ol pikinini i go bek bungim ol wanskul bilong ol na amamas long go long narapela klasrum o i go antap long bikpela gred. Ol nupela pikinini tu i pusim papama long sekim gut nem bilong ol long skul buk bai ol i ken mekim pri skul o elementeri long dispela yia.

*Ol poto Isaac Ikuavi*





# KANAGE



OL BOIS... TAIM YUMI PILAI, YUMI MAS WAS GUT LONG OL RONGO TAIGAS... EM OL DETI PLAIAS STRET!

EM NAU... MI SAVE LONG KAIN STAIL BILONG OL... ASTE LONG NAIT OL I GO SIKS TU SIKS DISKO NA OL INO WASWAS NA OL I KAM PILAI RAGBI... OL I DETI TRU YAH!



**K**anage bilong Lumi, wanpela taim em i go lukim pikinini bilong em long Mosbi siti. Em kalap long Air Niugini long Wewak. Balus i tekov, na em pilim pekpek na em i go askim eahostes long soim em long toilet. Em opim dua stret na i go insait em lukluk i go na lukim piksa bilong em. Na em kirap nogat tok yu pekpek mi wetim yu long ausait. Em sanap wait i stap na pekpek i kilim em olgeta. Em opim dua na go insait na em lukim gen piksa gen. Em oelhat na tok "Hey hariap, mi kam. Em sanap wait insait. Oloman pekpek klostu i kam ausait long trausis. Hariap tasol em opim dua na siksti i go stret long toilet. Em rausim trausis na sindaun pekpek, em taim long baksait em lukim gen piksa long glas. Oloman em kirap nogut na bikmaus na tok "Hei wet" mi pekpek yet. Eahostes i wetim em long kam bek tasol nogat na em i go painim em long toilet na askim em: Hey yu mekim wanem. Kanage tok mi i go insait na mi lukim narapela man i pekpek yet. Na mi wet i stap tasol em i no kamaut. Oloman eahostes i lap nogut na tok i nogat narapela man em yu yet i stap long glas. Kanage lap na toksave manki long ples ya.

**Solman Ruben**  
Aitape, Sandaun provins.

Kaunsil Kanage i bilong. Long ples bilong papa kela. Wanpela taim em wantaim ol wanwok kaunsila bilong em i go spak long Wom Bis. Na kaunsil Kanage i lukim olgeta wanwok bilong em i spak tumas. Na em i tingim wanpela trik long giamanum ol em isi tasol go insait long Mangro Wom nambis. Nau em i rabim olgeta skin bilong em long supgraun bilong mangoro. Nau em i kisim wanpela gorgur na paitim gut tru olsem Raifol bilong Japan nau em i trik olsem wanpela devol bilong Japan soldia bipo idai long Seken Wol Woa. Nau em kam ausait na stat singaut long Wom Memorial Pak bilong ol Japanese. Na stat long mas i kam klostu long ol wanwok bilong em. Man ol wanwok i kirap nogut na olgeta yet i ting em devol bilong Japan soldia na ol i ronim Wom nambis i stap. Long wanem dispela taim em ples i tudak pinis. Kaunsil Kanage i lukim olsem na lap i kilim em, nau wantu tru. Em i kalap long si wasim em yet. Na senisim em yet na stap lap tanim tanim i stap long nambis.

**Kanage Pren**  
Wewak, Is Sepik provins.

Wanpela taim Kanage laik sekim bon de bilong pikinini bilong em. Nau em singaut long pikinini bilong em Maks. Hoi Hoi na em i no harim. Na em i singaut gen. Hoi Hoi ai ai. Em nau pikinini i harim na bekim. Yes Dodik. Paps Kanage i harim na i no wanbel long kolim em Dodik.

Yupela pikinini i no Dodik nau tasol mi waswas na wasim ya. Pikinini laik tok deti na abris em tok Dodik. Nau Kanage i askim long bon de bilong pikinini. Ai pikinini yu tok long wanem mun yia mi karim yu na yu kamap. Em laik tok long wanem "mun yia yu ron na kamap na abris na em givim mi na mi kamap. Ol famili bilong Kanage lap idai stret.

**Francis Maje**  
Wewak, Is Sepik provins.

Kanage em wanpela tim mensesa bilong wanpela soka tim bilong Sepik. Long independens de em i kisim tim bilong em i go pilai long Bogia. Kanage yet i holim dabol enjin antap long 23 futa Bomana bot, ol i kamap long maus wara Ramu. Na ol i go stop long sait. Yu save ol boi i no save lukim solwara bipo olsem na ol kalap i go daun na waswas na Kanage i lukim ol na bikmaus long ol. Yupela lukaut "masol art" bai kisim yupela. Ol boi i paul na askim em masol art o masol kram" sori maus i abrus masol clem man ol boi klostu dring solwara. Ol i kamap long Bogia long nait na Kanage i tokim ol boi bilong em. Tumoro bai mi kisim yupela i go long kes na keru. Ol boi i ting em tok long wanpela yupela i go long kes na keru. Ol boi i stap long we. Na Kanage i tokim ol boi. Ol i stap klostu long fil. Ol taitim ol tent na stap. Ol boi i paul ken na askim Kanage yu tok long stua o yu tok long Kea Senta bilong ol Manam. Ol boi kilim skin long lap na ol tokim Kanage. Tok pisin mas kilim yu stret.

**Carl Donny**  
Anoram, Is Sepik provins.

Kanage bilong Hagen. Dispela taim em taim bilong bikpela drai sisen ya na tupela Junia i laik mumu. Tupela kukim ston na painim sampela kaikai long moning. Ston redi long hot san stret na tupela kam bek long mumu ples. Junia pilim pekpek na em i no toksave, nogat, em go toilet long as bilong banana klostu long mumu ples. Paps Kanage i no save. Em redim olgeta samting pinis san hat stret nau na em pilim hat na laik malolo liklik. Em go stret long we Junia toilet long en. Paps Kanage go sindaun pinis na laik putim han long

graun beksait long em long kisim gut win. Tasol em pilim olsem em holim wanpela samting hat, malomalo na wel long en, em ting wanem na kisim na lukim, kirap nogut em singaut. "Kaiye pekpek ya, em kam we?" Taim Kanage lukim pekpek em les tru na em i laik klinim hariap olsem na em lus tingting olgeta long hat ston klostu long em. Kanage klinim antap long hat ston stret na han bilong em paia lait. Em painim wara long kolim han tasol drai taim na nogat wara klostu. Kanage pilim bikpela pen na em pasim ai na subim han long maus na dastim long bikpela wara. Sori paps Kanage, neks moning em stap long haus sik wantaim hangre na pen bikos em yet asua.

**Gabriel Jack**  
Minj, Westen Hailens provins.

Kanage em bikman bilong ples insait long Aitape distrik. Em i no bin lukim ol samting bilong ol waitman. Em i gat wanpela pikinini man. Pikinini man i bin wok long Kokopo, Is Niu Briten provins. Taim pikinini i kam em i bin baim wanpela bikpela wol mira glas. Pikinini man i no tokim papa Kanage tu o soim em long dispela kain samting. Orait taim pikinini i go wok long gaden em i lus tingting long pasim dua long haus boi bilong em. Papa Kanage i go antap long haus boi bilong pikinini na long dua stret em i laik lukluk i go insait long rum. Em i lukim stret tewel piksa bilong em i stap insait long glas. Man papa Kanage i singaut pret na kra i guria wantaim na ron i go stret na tokim lapun meri bilong em. Hei bikpela tewel man i stap insait long rum bilong pikinini kam mitupela i go kilim nogut em i kilim pikinini blong mitupela. Em i kisim meri bilong em na tupela i go bek long lukim dispela tewel man. Taim tupela i go papa Kanage i taitim bunara i go long dua tasol lusim spia i go stret long dispela wol glas tasol wol glas i bruk bruk olgeta lapun mama i karim hap diwai i go brukim wol glas i go liklik olgeta. Lapun papa Kanage i holim pas lapun meri bilong em na tupela i singsing amamas tru i stap tupela i tok sapos nogat bai tewel man i kilim man i kam kamap lukim tupela lapun i samsam i

stap. Papa Kanage i no wet em i tokim pikinini man sori pikinini nogat bikpela tewel man i stap long rum bilong yu bai kilim yu long nait tasol mi na lapun mama i kilim em pinis. Pikinini man i save pinis olsem tupela lapun i brukim bikpela wol glas bilong em pinis.

**Markus Aino**  
Aitape, Sandaun provins.

Kanage bilong Lumi, wanpela taim em i go raun long Vanimo taun, na lukim pikinini bilong em wok long Vanimo Fores Kampani. Em raun i go na ples i hat tumas na em i laik waswas stret. Em kisim taim na i go insait long waswas ples. Kanage rausim trausis bilong em na hangamapim long palang bilong haus na em waswas. Em waswas pinis, na kisim tauwel na rausim wara. Kanage rausim wara pinis em putim tauwel long nek bilong em na i kam ausait. Em ting olsem ol i lap long husat. Oloman i no long taim sampela man i lukim em na kirap singaut na tok olsem. Oloboi geit kipa yu i no pasin dua na plis wantaim 2-pela dok i kam insait long maket. Kanage harim na tok "tude mi kam long opim maket. Yupela ken kisim olgeta samting fri.

**Solman Ruben**  
Aitape, Sandaun provins.

Wanpela taim papa Kanage i go long gaden na em i katim bikpela mama bilong rop banana tru, na kam putim i stap long haus. Na ankol Kanage i laik kisim ka na go lukim kandre man long narapela ples. Longwe long ples bilong Kanage olsem na ankol Kanage i statim ka pinis na i laik tekov. Tasol Junia Kanage tu em i manki nogut bilong seksek long raun long ka. Taim em i harim ankol Kanage i singautim em. Junia yu go na kisim bunara bilong mi i kam. Taim Junia Kanage kalap long ka em i ron tasol i go man em i edim traipela rop banana tru na karim i go putim long ka. Taim ankol Kanage lukim, man em i klini skin long lap, na i tokim Junia Kanage, long taim papa Kanage askim yu long karim rop banana yu painim hat long karim. Mi tokim yu long go long ka em i isi long yu.

**Kanage Pren**  
Wewak, Is Sepik provins.

Wanpela taim Kanage wantaim Misis bilong em tupela i go long bikpela bung long Ambua long painim wel enimol. Kanage i bin karim sotgan bilong em. Taim tupela i kam kamap long bus stret, Kanage i lukim wanpela traipela mama bilong wel pik stret. Kwik taim tru Kanage kisim sotgan bilong em na makim gut tru long blowim het bilong wel pik. Klostu em laik sutim wel pik ya nogat, Misis bilong Kanage i pairapim traipela kapupu stret. Trangu han bilong paps Kanage i seksek pinis na em i lusim gan. Trangu Kanage i belhat na tokim Misis bilong em olsem "Mi ting mi tasol i gat gan tasol yu tu i gat.

**D. Pokoraita**  
Tari, Sauten Hailens provins.

Wanpela taim long moning Kanage wantaim pren masta bilong em i lusim 6 mail long Lae, na laik go painim pis. Tupela go kamap long solwara na masta kirapim enjin bilong moto na tupela tekov i go namel long solwara na Kanage kirap na bikmaus hei masta masta a sak, a sak. Na pren masta biong em tanim na tok. Sak i stap we, Kanage sem na em i no tok, masta kirap na tok men yu telling a lai, Kanage kirap na tok na mi no bilong Lae, na masta tok yu stupit na Kanage tok. Yes, I'am from Sepik.

**Gideon Kumal Turu**  
Minj, Westen Hailens provins.

Kanage i bin wok long wanpela sip. Na kepten bilong sip yet em wanpela Ostrelia. Wanpela taim kepten 45 wantaim Kanage seil i go long wanpela ailen. Tupela seil i go na klostu tupela kam sua long ailen. Na kepten kirap na tokim Kanage long go long fran bilong sip na lukluk long rip. Baga man i no lukluk gut na sip sapim wanpela rip. Sem taim kepten belhat na singaut i go olsem "You stupid why don't you look properly." Trangu Kanage skelim dispela ap toktok na em i no wanbel stret. Olsem na em kirap na bekim kepten olsem. Yeh yu tu yu sanap long nambis. Yu tok mi i tok yu mi manki long ples no playup ok.

**Collish Liko**  
Kainantu, Isten Hailens provins.

# KANAGE



SOLWARA IRAF TRU... KANAGE I PRET NA STAT LONG BETEN LONG BIKMAN...



**K**anage i bilong PS kantri long Sepik. Wanpela taim lapun Kanage kalap long balus long Wewak. Na i laik i go long Mosbi bilong lukim pikinini bilong en. Long hapwe eahostes i laik givim kopi long ol pasindia. Eahostes i givim kopi long sampela manmeri pinis na em i kam kamap long lapun Kanage na i askim em. Papa yu laikim blek kopi o susu wantaim. Kanage i kisim rong tingting olsem na em lukluk raun pinis na i tok isi long wokmeri ya. Pikinini em orait susu bhain long taim balus i stap. Long taim balus i pundaun long Mosbi ol manmeri i go daun pinis na papa Kanage wanpela tasol i sindaun i stap. Long taim wokmeri i tok tenkyu long ol manmeri i lusim balus na em tanim lukim Kanage na em kam klostu na askim. Papa yu bai yu go daun o nogat. Kange tanim isi tasol daunim spet pinis na tokim wokmeri ya. Na yu askim mi long susu na mi tokim yu olsem balus i pundaun pastaim ya, wokmeri ya lap nogut tru na tokim Kanage sori tru papa mi askim yu olsem yu laikim waitpela kopi o blek kopi. Na mi no min long wanpela samting taim Kanage i pilim olsem man em sem pipia stret na lus nating insait long balus.

**Terry Siah**  
Lae, Morobe provins

Kanage em wanpela stail pilot bilong helikopta ya. Wanpela taim em kisim helikopta antap long kol ples na em i tromoi kandaun long Wewak ples balus. Holide na ples balus tu i pulap tru long ol kainkain kala haibiskes bilong ol hai skul. Pasin bilong ol manki Sepik ol long sot wantaim ol liklik sot. Ples bilong em tu na yu save olgeta ai bilong em i lukluk gut tru long ples bilong putim helikopta. Tupela lek wantaim bel bilong helikopta i go antap na em lendim stret long propela bilong em. Brata ya, em man tu yal Ol Vavine i singaut long em Kanage hariap em krol i kam ausait na salutim bos bilong em wantaim bikpela pilings tru. Bos i belhat nogut tru em i kirap taso! kikim tupela buai wantaim wanpela daka. Kanage putim insait long trausis. Brata ya i pundaun kirap tasol em ronawe. Bos i singaut long em yu stupit Kanaka. Kanage i ron yet na em bekim, yu tok stret tru, wait basta mi Kanage bilong Sepik, em tu i no harim gut bos i singaut long em. Brata ya, wanem em pilim hat i kirap insait long trausis, na tu em i ron yet olsem na em i bekim tasol. Kanage i no malolo liklik das i kirap yet long baksait na em i singaut i go long bos. Bos yu givim helikopta ya na yu kaikai, bel bilong yu i pulap long pekpek wantaim Dem Dem. Kanage i bagarapim waitman ya,

em i singaut gen, ol man i lukim yu long nait bai ol i ting, yu wanpela mun lait bilong nait yu blari wait devol. Kanage em yet isi tasol em i bekim, yu orait o mi go long ples nau lukim yu sem taim.

**Rolen Urubuol**  
Wewak, is Sepik provins.

Kanage em i bilong Maprik distrik. Wanpela taim Kanage wantaim kandre bilong em i save prenim wanpela meri long ples. Wanpela taim Kanage i stap long haus bilong em long apinun na lukim meri ya i wokabout i kam long rot long lukim ol wantok bilong em. Long nait kandre bilong Kanage i ting meri i stap long haus bilong em olsem na em i wokabout long sem rot i go long banis bilong meri ya na Kanage i ting meri ya tasol i kam olsem na em i go pulim em. Taim Kanage pulim kandre bilong em i go kandre bilong Kanage i ting meri ya tasol i pulim em olsem na em i kisim pilings na wokabout isi tasol taim Kanage apim em na laik kisim em long haus, poro tok yu laik mekim wanem? Na Kanage i tok kandre mi ting meri ya tasol na kandre bilong Kanage i tok taim yu pulim mi. Mi ting meri ya tasol olsem na mi kisim bikpela pilings na wokabout isi tasol na Kanage i tok mi tu mi ting mi pulim meri ya kandre bilong Kanage na meri ya tupela luk wankain tasol olsem na Kanage i paul na pulim kandre bilong em.

**Himslo Tomkiauen**  
Maprik, is Sepik provins.

Kanage em i wanpela yangpela man long ples insait long Maprik distrik. Wanpela taim Kanage toktok wantaim wanpela yangpela meri long marit na tupela i marit na mama bilong meri bilong Kanage i les long pikinini meri bilong em i maritim. Olsem na tambu meri bilong Kanage i go krosim Kanage long banis bilong em. Na mama bilong Kanage i kirap na i go ripot long pis opisa na ol i toktok na Kanage i kirap na krai wantaim na em i tok olsem. Sapos

ypupa stopim mi long maritim em bai mi kilim mi yet. Em i krai olsem man idai na ol i save krai taim ol manmeri i lukim Kanage i krai long meri ya. Ol manmeri lap nogut tru.

**Peter John**  
Maprik, is Sepik provins.

Kanage i go salim kopra. Em wantaim nambawan pikinini bilong em. Tupela i go salim kopra pinis na tupela i go long Ela Motos long lainim longlong Kanage long hau long statim moto na ronim. Orait longlong Kanage i no klia yet long wanem samting bos i wok long toktok long em olsem na em wok long askim. Bos na pikinini long em i kam na tok. Taim yu laik statim yu mas putim gia long niutral na yu statim, man papa Kanage kirap tasol na rausim pikinini bilong em na tok klia i go, taim mipela ol bikman i toktok maski long kam distep nabaut kirap na klia nau. Orait bos i tokim Kanage long bringim tupela i go daun long nambis. Orait Kanage yet em eking bikos long fran wantaim bos na san bilong em i sindaun baksait kebin na ol i laik i go long ap rot na bos i spik Inglis long papa Kanage na paps Kanage em painim ol tru long bekim, bikos em i no save tu long toktok bilong ol waitman. Olsem na waitman em Inglis long Kanage. Kanage isi tasol tanim i go long baksait na askim pikinini bilong em, bikman ya i tok wanem. Orait ol ron i go na waitman Inglis gen long Kanage, man Kanage i sotwin na tuhat i ron long pes bilong em na tanim isi isi gen i go long beksait na askim. San, man ya wok long tok wanem? Pikinini kirap tokim em, maski lukluk i kam baksait, lukluk long fran na harim man ya i stori. Kanage i sindaun olsem wanpela ap diwai inap ol i go kamap long nambis. Bos lusim tupela na go bek. Orait Kanage wantaim pikinini bilong em kirap na pusim moto i go liklik long nambis. Pikinini kirap tokim paps Kanage pusim liklik i go long dip na statim. Kanage kirap bikmaus long pikinini bilong em na tok. Bos i tokim yu o em tokim mi orait pikinini em pasim maus tasol na i go sindaun long as bilong Talis i stap na lukluk long paps bilong

em i stap. Orait paps Kanage pusim bot liklik tasol long ples we solwara save kam bruk long em na em i pinisim olgeta spit bilong bot ya na tu em kirap na putim long gia, olsem na em kirap putim wanpela lek bilong em antap long bot na wanpela lek bilong em long nambis. Pikinini em sindaun gut tru long as bilong talis na lukluk is tap. Taim pap's Kanage i statim bot. Bot i sigirapim wesana na sakim paps Kanage na em i sot win i go insait long solwara na laplap bilong em karamapim het bilong em. Na trangu na tupela rap buai wantaim wanpela longpela daka ya. Suriksurik nabaut olsem kindam em painim ples long hai.

**Samuel J. Vuaina**  
Kimbe, Wes Niu Briten provins.

Kanage bin lukim Madang taim em manki yet, tasol nau em marit na i gat foapela pikinini na em laik go lukluk raun tasol olsem lokol turis. Samting tru Kanage em bilong Goroka na em pisman long Mapemo riva. Em kalap long wanpela 15 sita bus na em go na long 3 kilok stret bas kamap long Madang na long dispela taim tu Kanage i bin slip long bas. Pespela stap bas i mekim stret long Tusbab hai skul na taim wanpela pasindia i laik kalap go daun na gat Kanage guria na kirap na sem taim em kirap na tok olsem, "Oh Madang, mi senis pinis na yu no senis yet, pasin bilong bipo yu holim yet, wanem taim bai yu senis? Kain pasin bilong hangamap, hangamap na ating yumi noken kolim yu biutiful Madang tasol yumi mas kolim "Hangamap," insait long krismas 2000 na go olsem. Taim ol pasindia i harim dispela tok, man ol kil stret long lap na wanpela meri Apo sindaun klostu long em, askim Kanage, yu tok long wanem samting? Na Kanage bekim na tok, mi tok tasol long ol blak bokis, i no nau ol hangamap na singaut singaut i stap, ol mas raun tu long Goroka na kisim sampela kolwin na kaikai sampela gutpela kumu na kaikai bilong Goroka na kam bek.

**Bob Holoso Mapemo**  
Goroka, Isten Hailens provins.

Kanage i bilong disasta eria insait long Aitape distrik, Sandaun provins. Wanpela taim Kanage painim wok go daun long taun, tasol ol wok i kam long ples, na taim em i kam long ples em i leit na wanpinis bilong em tasol ol wok. Kanage kirap na askim waitman bos bilong Nawae em i tok any space bos, na bos i tok, see mi tomorrow with your referencé. Na Kanage i no harim gut bos i spik na em i harim liklik olsem Frence tomorrow. Kanage waswas gut long moning na kisim gel pren bilong em na tekov stret long ples bilong wok na bos i lukim em na askim em long reference na Kanage i putim han long meri bilong em. Nogat. Mi no tok long meri bilong yu? Mi tok long reference na ol wanpinis bilong em i salim skin stret long lap na Kanage i sem nogut stret na em i surik surik i go na meri bilong em i kalap kalap i kam long holim han bilong em na tupela tekova. Na Kanage i wari wantaim reference bilong em na go long haus. Sapos yu laik lukim wari bris yu kam na lukim pes bris long ples Ramo bai yu lukim

**Mirii Mevova**  
Aitape, Sandaun provins.

Kanage em i wanpela man Madang na em i marit long Morobe. Wanpela taim em wantaim pikinini bilong en ol i laik go long Lae na ol i go long sip. Taim ol i ron long sip, solwara i bagarap nogut tru. Na Kanage i pret na holim pasin ol meri pikinini na beten na i tok, O papa, yu helpim mipela na mipela i noken lus long solwara. Sapos yu helpim mipela na mipela i go kamap gut long hap, bai mi wokim bikpela kaikai bilong yu. Taim Kanage i tok olsem, meri bilong en i kirap nogut na em i tok. Kanage mani bilong yu i stap we bai yu wokim kaikai? Na Kanage i tok, s-s-sh bai mi gi-manim em.

**Taing Taweng**  
Finsafen, Morobe provins.



# Pater Lak kisim sapot

**Dia Edita,**  
MI WANPELA meri Hagen nau mi laik autim wari bilong mi.

Westen Hailans Rijnel sit em Nokpa na Kopi Robert Lak i bin winim.

Tasol mi save lukim ol kopi Nokpa i save komplek long Gavana Lak long givim mani na wok na tu mi save lukim ol Kopi Nokpa yet i save tanim na kotim Robert Lak.

Mi lukim dispela pasin bilong ol Kopi Nokpa em mi tingim ol Hagen i paul

olsem longlong man. Dispela sit Pater Lak i winim em i no open memba bilong yupela.

Noken kamap bus kanaka na pulap long haus slip na opis bilong Gavana.

Sapos mi lukim yupela gen bai mi kolim yupela dok.

Em tasol husat i laik bekim orait mi wetim yupela.

**Misis Rosa Etli**  
**Tambul, Westen Hailans provins.**

Sapos yu laik salim ol pas bilong yu i kam long dispela niuspepa. Salim i kam long dispela adres:  
**THE EDITOR**  
**WANTOK NEWSPAPER**  
PO BOX 1982,  
BOROKO, NCD.

# Ambulens em i no PMV

**Dia Edita,**  
MI WANPELA man long Hoebso ples. Mi laik tokim yupela olsem yupela noken karim manmeri nating long haus sik ka.

Haus sik ka em ka bilong karim sik manmeri tasol. Taim mi ron long Mendi taun mi lukim planti manmeri pulap long haus sik ka. Em i no PMV long karim manmeri nogat sik. Em ka

bilong sik manmeri tasol. No ZGB 069.

Sapos yupela karim manmeri nogat sik, ka mas go bek long han bilong plis. Sapos wanpela laik sapot rait i go long Edita hariap. Em tasol

**Filex Sosi Hoebsole**  
**Mendi, Sauten Hailens provins.**

## Ol memba kisim salens

... Mathew Gubag

**Dia Edita,**  
MI WANPELA boi stap long ples Balbe inlen Madang Sumgijbar. Mi no lukim memba bilong mipela wokim rot i go long ples bilong mi 1997 inap 1999 klostu 2000 yia.

Nogat sevis tru haus sik, skul klostu bai pinis. Nogat nem bilong memba kamaut long redio tu na memba stap we tru.

Bipo nem bilong Peter Yama save kamaut na mekim sevis i go long ples nabaut. Memba bilong mipela Peter Yama mas kisim ples bilong Mathew Gubag. Em tasol wari bilong mi.

**Mista Ganim**  
**Sumgijbar, Madang provins.**

... Philimon Embel

**Dia Edita,**  
INAP YU givim mi liklik spes long raitim dispela pas. Taim Philemon Embel stap memba bilong Nipa Kutubu em i wokim wanem long distrik het kota long Nipa?

Taim em i stap memba bilong Nipa Kutubu em i wokim wanem ol rot long Nipa Kutubu?

Taim em i stap memba bilong Nipa Kutubu em i wokim wanem ol skul long Nipa Kutubu?

Taim em i stap memba bilong Nipa Kutubu em wokim wanem ol helt senta long Nipa Kutubu?

Taim em i stap memba bilong Nipa Kutubu em i baim wanem kain ka bilong ol divisen long Nipa Kutubu? Em tasol wari bilong mi na em ol askim bilong mi. Taim yu laik sanap long 2002 bai yu tok wanem long ol pipel long Nipa Kutubu.

Mi tok tenkyu long Edita.

**Filex Sosi Kaywapy**  
**Mendi, Sauten Hailens provins.**

... Roy Yaki

**Dia Edita,**  
MI WANPELA manki long ples Muli, klostu long ples bilong memba long lalibu mi laik autim ol wari bilong mi long memba bilong lalibu Pangia, Roy Yaki. Longpela taim tru nau na yu i stap o dai pinis long ples bilong ol Papua meri Pom siti.

Orait sapos yu stap yet harim gut.

Mista Yaki, mipela ol manmeri long ples ting yu dai pinis ya. Mipela ting olsem solwara kaikai yu pinis o kokonat kris paulim het bilong yu. Long dispela 15 yia i kam inap nau i nogat wanpela developmen o sevis i bin kamap long Muli na tu long narapela ples tu. Long sampela hap yu givim wok olsem wokim ol han rot o mekim sampela kain wok.

Tasol ples Muli nogat tru wanpela sevis yu save givim mipela.

Olsem wanem? Mipela em birua bilong yu? Yu mas save ol lain bin givim vot long yu, mipela tu i bin givim yu olsem na mipela makim yu bilong karim hevi bilong olgeta manmeri long dispela ilektoret olsem na bilong wanem yu mekim kain pasin olsem.

Yu mas luksave long dispela mani Dick Mune na Ami Yawari i bin kam putim long Muli haus sik long kisim lait kam insait.

Dispela yu bin pasim o putim tambu long noken kisim lait. Ating yu no memba ya?

Dispela kain wok yu inap long mekim tasol yu stapim gen i no gutpela tru long ai bilong komyniti.

Dispela mani Nesenel Gavman i putim long ol wan wan ilektoret olsem lalibu Pangia. I luk olsem nogat wanpela developmen o sevis i kamap.

Ating, yu save poketim mani long wokim ol bisnis long ovasis ya. Poke' mani bilong yu o bilong Gavman?

Olsem na Roy Yaki yu mas save o tingting long 2002 bai yu sanap yet o bai yu lus. Em yu yet nau.

Sapos yu husat i laik sapotim o egensim em mi stap tasol, long lukim long Wantok Niuspepa. Yu ken rait i kam tasol.

**Maris Mapu**  
**lalibu, Sauten Hailen provins.**

... Ginson Soanu

**Dia Edita,**  
MI WANPELA mangi Raikos long Madang provins. Hia nau mi autim belhevi bilong mi go long memba bilong Kabwum long Morobe provins.

Mista Ginson Soanu, bilong wanem yu senisim boda bilong Madang na Morobe antap long Teptep. Nau boda i krungut tru. Ating yu painim namba bilong winim vot tasol a? Olsem na yu kisim ol dispela ples i go insait long Morobe.

Nem bilong ples, Nokopo, Ganglut na ating sampela moa ol ples i bilong Madang. Plis noken wokim pipia long boda. Yu harim krai bilong Kabwum na helpim ol.

Yes, na mi bilip yu holim yet bekim bilong yu long askim bilong Mista Starhi Muza memba bilong Raikos long ples Malaiamai long taim bilong "Mengkonfrens" o bikpela bung bilong ol mama long Ukata distrik.

Yes, Mista Soanu, yu tokim manki Nankina long setim soka bal, na bai yu kam sut i go insait long gol na nau yu i stap we? Bal em setim pinis.

Yu painim soka but yet o yu werim pinis na redi long kik?

Em tasol na welkam ol Kabwum na Raikos long sapotim o agensim.

**Kaspar .D.**  
**Kimbe, Wes Niu provins.**



**Piksa i soim Highlands Pacific Limited, Nesenel Gavman na Madang Provinse Gavman i laikim Ramu main mas stat kwik. Tasol ol papa graun i kros long graun yet. Wanem samting bai kamap taim main i stat.**  
*Poto: Wenceslaus Magun.*

## Hailens soka asosiesen kisim tok salensim

**Dia Edita,**  
MI WANPELA man husat i save i stap long ples na olgeta wiken mi save i kam lukim ol Soka Klub husat save pilai soka long en.

Taim mi save i go lukim pilai mi save amamas tru long lukim ol yangpela pilai soka. Orait taim mi pilai pinis na i go bek long ples mi save tokim pikinini man bilong mi olsem taim yu bikpela yu mas pilai soka na karim nem bilong Hagen stret. Olsem na nau mi laik rausim wari bilong mi olsem Hailens Soka Asosiesen presiden David Chung em yet kamap kosa bilong tim.

Dispela mi lukim na i no stret. Inap wanpela man nating kamap kosa bilong tim. Orait narapela mi no amamas long en em ol wokim seleksin long en ya i no gutpela. Em ol wokim wansait seleksin stret, na tu mi lukim long Wantok

Niuspepa det 2-01-2000 em nem bilong ol manki Momads Soka Klub tasol i stap long en.

Ol dispela mi lukim i no stret long mi? Ating mi ken tok olsem Momads Soka Klub tasol save pilai long Hagen Soka Asosiesen o i gat sampela klub tu i save pilai insait long Hagen Soka Asosiesen tu i stap.

Em i no hailens soka ripresentativ, em mas klub sempionsip bilong Momads tasol ol bai pilai long Lae nating.

Em tasol liklik wari bilong mi na yu husat laik sapotim o agensim yu welkam tasol long rait long Wantok Niuspepa na mi bai baim na lukim.

**Fox Gawi**  
**Baiyer Wara, SHP.**

## Ating i gat tupela lo long PNG

**Dia Edita,**  
MI LAIK autim wari long wanpela bikpela pasin korapsin ol lida bilong yumi save mekim long sakim lo bilong dispela kantri. Bikpela rong, pasin korapsin, brukim lo na pasin stil em ol memba save mekim.

Tasol lo i no stap aninit long ol politisen.

Wai mi tok olsem bikos, taim ol i fomim pinis gavman ol i save hariap tru long makim ol wantok, pren, tambu, wanskul o wan pati lain long kamap dipatmen het, menesing dairekta na het bilong Lo na Oda Oganaisesen olsem Ombudsmen Komisn, Altoni Jenerol na Plis Komisina. Bihain long en ol no save

wari bikos husat tru bai kolim ol o mekim save long ol. Dispela bikos ol bos bilong lo na oda em ol politisen yet i makim na hat long ol i kotim dispela han husat i givim bret na bata long ol.

Long lainel jasmen bilong papa antap yet bai skelim na givim mekim save long ol dispela lida. Trangu mipela ol grasrut i go long kalabus long stilim K200 na olsem wanem long ol memba i stilim K100,000 na wokim bikpela korap dil.

Tru tumas mipela ol man nating i stap aninit long lo na ol politisen i stap antap long lo.

**Kopun Kayam**  
**5 Mail Setolmen, NCD.**

# Maski paulim ol pipel

**Dia Edita,**  
MI WANPELA manki bilong ples. Mi bin harim olsem bai i gat wanpela samting bai kamap em ol i tok tudak bai i stap tupela de olgeta.

Na long dispela tudak bai ol sangauma nogut tu bai raun ausait long haus bilong yu. Nau sapos yu laik raun ausait bai ol i kilim yu dai.

Tasol dispela-toktok i no bin kamap, olsem na yu husat brata o susa yu bin mekim dispela tok long maus bilong yu o rait long niuspepa em ating yu mas

papa antap o samting. Ating yu wanpela bilong ol wail abus i karim yu olsem na yu i no save long, tok bilong antap man.

Ating sapos yu sindaun isi na ritim baibel bai yu ken luksave long tok tru. Mi laik save yu husat brata o susa i laik saptoim o agensim dispela toktok bilong mi em yu ken rait tasol long *Wantok Niuspepa* na bai mi lukim.

**Mem Benson**  
**Madang, Madang provins.**

# Zeming kisim sapat

**Dia Edita,**  
PLIS GIVIM mi liklik pes long *Wantok* long salim tok amamas bilong mi i go long trupela Deputi Praim Minista na ol pipel bilong Morobe.

Bipo long mi go het mi laik salim bikpela tok tenkyu na amamas i go long ol pipel bilong Tewai-Siassi long makim kain man olsem Mao Zeming i kam long nesanel palamen. Long gutpela save pasin bilong yupela ol Tewai-Siassi pipel bilong makim kain lida olsem Mao Zeming.

Nau ol narapela Morobe tu i kisim biknem na hai pilings long lida bilong yupela ol Tewai-Siassi.

Yupela ol Morobe mas amamas

bikos nogat wanpela Morobe politisen bilong bipo i kamap Praim Minista o Deputi Praim Minista. Olsem na maski mi bilong narapela hap bilong PNG mi amamas na tenkyu i go gen long ol pipel bilong Tewai-Siassi long makim gutpela lida olsem Mao Zeming.

Mi wisim memba bilong yupela na nupela Deputi Praim Minista bilong PNG - Hon. Mao Zeming hepi Niu Ya.

Na tu mi gat bikpela bilip Mista Mao Zeming bai karimaut wok bilong em olsem namba tu praime minista bilong PNG.

**Paul Minga**  
**5 Mail Setelmen, NCD.**

# Givim plis wok long ol gred 10

**Dia Edita,**  
MI WANPELA bus manki bilong Strikten Veli bilong Lek Kopiago, SHP. Mi laik autim liklik wari bilong mi long *Wantok Niuspepa*.

Wanpela taim mi raun long Mendi taun, lukim ol manmeri wok long gavman i werim plis yunifom na mekim wok na kolim ol yet olsem Risev Plis.

Mi laik askim, ol dispela pablik sevan kamap na wok olsem Risev Plis, dipatmen bilong yupela i no save peim yupela o olsem wanem, o yupela ting pe yupela save kisim em liklik na yupela laik dabolim mani na kisir: bikpela.

Yupela harim ha! I no yupela tasol. I gat planti gras 10 dropaut i stap. Givim sans long ol. Ol bosman long het opis tu i noken pliaim rabis sistem bilong. Yupela yusim ston het bilong yupela gut.

Wantok sistem tasol na Sauten Hailens provins i go bagarap.

Em tasol na yu husat i save sapatim o agensim, mi stap tasol long ritim bekim bilong mi.

**Jim Tilini**  
**Lake Kopiago, SHP.**

# Gavana Agiru kisim salens

**Dia Edita,**  
MI WANPELA bus manki bilong tumbuth Veli bilong Lek Kopiago Distrik, Sauten Hailens provins.

Mi laik autim liklik belhevi bilong mi. Belhevi bilong mi em olsem. Gavana Anderson Agiru em Gavana bilong Sauten Hailens provins. I no bilong Tari/Pori tasol o bilong Komo/Margarima tasol. Olgeta opis long Mendi olsem, BMS opis, opis bilong Provisal Gavman, Provisal Edministreta na Muruk Lod i save pulap tru long ol lain bilong Westen tasol i no Lek Kopiago.

Na giaman opis lain na wokim kainkain askim long kisim mani we

inap wokim wok insait long provins. Olsem wanem Gavman Agiru em gavana bilong yupela tasol o? Nogat sem bilong yupela na pulap pulap olsem karakum na pinisim mani bilong pipel bilong Sauten Hailens provins.

Traim na i stap long ples, i no yupela tasol i givim vot long Gavana Anderson Agiru.

Nogat sem bilong yupela ol Tari, Komo, Margarima, na Koroba. Em tasol belhevi bilong mi na husat yu laik agensim o sapatim mi wet tasol stap.

**Jim Alu**  
**Lake Kopiago, SHP.**

# Noken rausim ol kalabus

**Dia Edita,**  
MI WANPELA manki long ples na mi laik autim wanpela tingting bilong mi. Na tok mi laik tok olsem. Bilong wanem na Gavman bilong Sir Mekere i rausim ol kalabusman na meri i go aut fri.

Mi ting olsem dispela i no gutpela tumas long Gavman i mekim olsem. Ol dispela lain manmeri i no ol gutpela lain. Em ol lain bilong mekim ol pasin nogut, olsem na ol i mas stap long haus kalabus inap lo i mekim save long ol pastaim, na bihain bai ol i no inap long mekim trabel gen.

Sapos Gavman i go het long mekim dispela pasin bilong rausim ol kalabus manmeri i go aut fri em bai moa pasin raskol na biket i kamap bikpela long kantri.

Dispela Lo Gavman bilong Sir Mekere i mekim gutpela tumas bikos ol manmeri bilong mekim ol kainkain pasin nogut bai i ting olsem kalabus em i samting nating na bai ol i go het long mekim ol pasin nogut.

Na tu kantri PNG bai i kisim nem nogut. Olsem na Gavman i mas stopim

dispela Lo bilong rausim ol kalabus lain i go aut fri. Em tasol tenkyu.

**John Topo**  
**Banz, Westen Hailens provins.**

# Ginson Soanu kisim tok salens

**Dia Edita,**  
MI WANPELA man bilong Kabwum tasol nau mi stap long Hagen. Mi laik askim ol manmeri i save sapatim memba bilong Kabwum Ginson Sounu.

Dispela memba i no bringim wanpela gutpela wok long Kabwum na olsem wanem na yupela save sapatim em.

Ol brata susa dispela ples Kabwum bipo bin stap ya em stap yet ya. Olsem na plis ol manmeri ples bilong yumi Kabwum tu em i no klostu long taun, em i stap long bus

# PNG politiks kisim salens

**Dia Edita,**  
PASIN POLITIKS bilong ol memba bilong palamen i mekim mi sem nogut tru na tingting long ronawe na i go stap long narapela kantri.

Mi les na les olgeta bikos ol waitman i lap long pasin politiks bilong ol nesanel palamen memba bilong yumi. Ol waitman i lap na tok pani long ol memba bilong yumi na dispela i mekim mipela ol man nating i kisim sem nating na mi les tru long ol memba bilong yumi.

Mi laikim Ostrelia gavman mas tekova long dispela toi ailan bilong yumi. Sapos ol memba no inap long stretim ol bikpela hevi bilong dispela toi ailan bilong yumi orait yumi ol manmeri

bilong PNG mas vot long Ostrelia bai lukautim yumi o nogat.

Yupela olgeta manmeri bilong PNG mas sapatim dispela pas bilong mi bikos Ostrelia lukaum yumi bai olgeta samting bai go gut na ol pipel bai stap amamas.

Bai nogat senis long sinia pablik sevan olsem dipatmen het na Menesing Dairekta. Saveman stret bai wokim wok bilong em. Mani bilong ol pipel bai i go stret long developim ples na kantri, bai nogat wantok sistem, tredsmen sistem, politiks pati sistem, tambu sistem, wanskul sistem, wantok sistem na ol narapela sistem.

Tu bai ol waitman bai no inap westim wanpela minit nating

long stori, kaikai buai, tokpilai pulim matus, ritim niuspepa long wokples na hangamap longpela taim long opis telipon long nogat gutpela as.

Narapela bikpela hevi em toi ailan wantaim 109 memba bilong palamen. Planti politisin inap long developim toi kantri hariap tru tasol nogat sakin bilong ol developmen.

Wanem taim ol putim ol lapun long kea senta, o neseri, wanem taim bai ol wanwan manmeri i slip long haus kapa, i gat pawa long haus na yusim kolta rot na ol narapela samting. Em tasol.

**Paul Minga**  
**5 Mail Setelmen, NCD.**



• Lukautim pasin tumbuna na kalsa. Yu inap mekim mani long en. Foto: Bustin Anzu.

# PDM save long rot

**Dia Edita,**  
MI LAIK bekim na autim tingting wari bilong mi i go long konsen sitisen bilong Minj. Konsen sitisen bilong Minj raitim pas long 30/12/99 kolim Jonah Amban i kamap olsem selsman bilong PDM Pati na yu i no save kisim win o malolo liklik na yu i no save tingim bihain taim bilong yu o nogat?

Jonah Amban i gat bikpela amamas tru long harim konsen sitisen bilong Minj i no lusim tingting long papa bilong PDM Paia Wingti na Jamie Graham

na tu yu i no lusim tingting long wok bilong Jonah Amban i salim Paia Wingti na PDM Pati i go long olgeta haus lain long Waghi Valley.

Wanem as tingting Jonah Amban i no save kisim malolo liklik long salim PDM i go long ol man na meri long hauslain?

PDM i kamapim strongpela lidasip, kamapim strongpela Praim Minista long kantri, i gat strongpela bilip long senisim mama lo bilong PNG. PDM i ansa na rot tru bilong kirapim bek ekonomi bilong kantri na luksave gut long wok developmen. PNG i painim taim nogut/kisim bagarap; PDM ken stretim sindaun bilong ol lain bilong yumi long ples. (Long wanem i gat strongpela hausman). Dispela kain bikpela as tingting Jonah Aban i salim PDM Pati.

Sapos yu pilim dispela toktok i no gutpela long yu orait, raitim pas i go long *Wantok Niuspepa* long Boroko na bai mi skelim na save.

**Jonah Amban**  
**Minj,**  
**Westen Hailens provins.t**

# Noken salensim lapun Somare

**Dia Edita,**  
MI WANPELA manki Sandaun mi stap nau long Mosbi mi laik bekim pas bilong brata Philip A. Pais. Brata long pas bilong yu long Novemba 18, 1999 yu toktok long lapun Sief Somare.

Lapun Somare i bin kisim Independens long Papua Niugini, em i tru tasol wan wan provins i gat ol memba bilong ol na ol dispela memba i gat wok bilong pait long bringim sevis na wok developmen i go long ol pipel bilong ol.

Yu laikim wanem wok kamap long eria bilong yu, yu mas rait i go stret long ol lida long eria yu kam long em, na noken salensim lapun Sief Somare.

Wanem samting yu toktok long Somare na Is Sepik em i no samting bilong yu em, samting bilong Sief na ol pipel bilong em long Is Sepik.

Em tasol na husat i laik sapatim o agensim em yu ken rait i go long *Wantok Niuspepa* na bai mi lukim. Tenkyu long givim mi liklik spes.

**E. Olix**  
**Erima, Nesanel Kapitol Distrik.**

**Lok Bolineng**  
**Mt Hagen,**  
**Westen Hailens provins.**





KOMISIN BILONG HAIA EDUKESEN

**PABLIK NOTIS**

*Go hetim TESAS long yia 2000*

**GAVMAN bilong Sir Mekere Morauta i rausim NATSHOL na putim Teseri Edukesen Stadi Asistens Skim (TESAS).**

Edukesen Minista John Walko insait long wanpela bung wantaim ol ripota long Desemba 16 i bin tokaut long dispela nupela polisi. Namel long Desemba 1999 na Januari 2000, ol niuspepa, radio Tok Bek program, telivisen na ol arapela sekula i bin karim na tokaut long ol nius long dispela long mekim kila long ol papamama, ol sumatin na ol edukesenel institutsen olsem i gat nupela studen sapot skim long 2000 na ol yia i kam bihain.

Olgeta teseri institutsen insait long kantri i bin kisim dispela infomesen na mipela i etvaisim ol long skruim dispela nupela polisi long stat bilong 2000 akademik yia.

Dispela notis i trim long mekim kila ol tems na Kondisen bilong TESAS na long mekim kila ol nupela fi we i kam aninit long en. Olgeta sumatin we i kam aninit long TESAS em ol i kisim pinis pas long toksave, tasol ol ken kisim tu wankain infomesen taim ol i kam kama long ol Institutsen we ol bai skul long en.

Tebol 1 na 2 i eksplenim ol TESAS fi long yunivesiti na non-yunivesiti teseri institutsen bilong yia 2000 na ol yia bihain.

Olsem meja sponsa, gavman i laikim ol sumatin we TESAS i karamapim ol long inapim ol samting we TESAS i laikim ol long en. Ol sumatin husat i kam aninit long TESAS i mas wok hat na kisim gupela mak.

**Ol Tem na Kondisen bilong TESAS:**

**1 - Diteminesen bilong TESAS**

Sumatin husat i kisim Akademik Ekselens Skolasip aninit long TESAS bai peim wan pesen long total kos long edukesen bilong em. Sumatin we i kisim Haia Edukesen Kontribusen Skim (HECAS) bilong TESAS bai peim seven pesen long total yunit kos. Na dispela we i kam aninit long Selp Sponsa bai peim 25 pesen long total yunit kos.

Ol dispela we i kam aninit long Praivet Sponsa em ol lain we ol kampani o employi bilong ol, ol ovasis sumatin na ol PNG sunatin we ol ovasis gavman i sponsarim ol bai no inap long kisim helpim long TESAS. Ol sumatin we i stap long dispela grup bai peim 50 pesen o haf long ol yunit kos bilong yunivesiti edukesen na 100 pesen dairek studen kos long non yunivesiti edukesen.

**2 - Husat inap kam aninit long TESAS**

Long kam aninit long TESAS skolasip, sumatin i mas pulumapim TESAS Tems na Kondisens fom. Ol dispela we i kam aninit long HECAS na Self Sponsa i mas peim 50 pesen long ol skul fi pastaim.

**3 - Benefit bilong TESAS**

Helpim we TESAS i givim em ol sumatin i stap long grup 1 na 2 bai kisim. Ol dispela we i stap long grup 3 bai mas kisim lon na riter balus tiket tasol. Ol dispela i stap long grup 4 bai no inap kisim wanpela helpim long TESAS.

**4 - Ol Kondisen bilong bihainim na bai TESAS i sponsarim sumatin**

Ol sumatin bai kisim TESAS Awod long wanpela yia tas ol. Long pinis bilong yia, ol bai glasim ol samting na sapos ol sumatin i kisim gupela mak, TESAS bai sponsarim ol bek gen. Sapos sumatin i no wokim gut na em no inapim ol kondisen we TESAS i putim, ol bai rausim awod long en long pinis bilong yia.

**5 - Pinisim TESAS Awod**

Bihainim etvais bilong Gavaning Kaunsil o Akademik Bod, ol bai rausim TESAS Awod sapos institutsen i pinisim sumatin taim em feilim ol sabjek o i no kisim gupela mak o em i wokim bikhet pasin o em i lusim klas long planti taim o em yet long laik bilong em i pinis long skul.

**6 - Riniuwal bilong TESAS aninit long Kategori 1 na 2.**

Sapos ol sumatin i widro long skul na ol nogat gupela medikal risen, ol bai no inap long kisim ol long Akademik Ekselens Skolasip o HECAS studen sapot skim. Sapos ol dispela sumatin i laik go bek, ol bai sponsarim ol yet na dispela em bai long wanpela yia. Bihain long dispela, ol ken aplai long kisim sekon sans sapot long TESAS.

Sapos wanpela sumatin meri i widro long skul bikos ol i gat bel, ol bai no inap long kisim em bek inap long em i kisim gupela mak long

averek sko poin we i alrusim 1.6 o gupela moa Na bihain long wanpela semesta em i sponsarim em yet. Na sapos em i gat hevi yet bihain long em i karim pikinini, i moabeta long em i withdro olgeta long skul.

**7 - Senisim Program**

Sapos sumatin i laik senisim program we ol i stadim, ol mas aplai i go long Haia Edukesen long tok oraitim na tu transferim skolasip. Ol Het bilong Dipatmen bai raitim pas long sapotim aplikesen.

**8 - Awod bilong TESAS kwota**

Gavman i save putim kwota long wan wan grup bilong ol TESAS Awod. As tingting long dispela em mitim ol manpawa rikwaimen long ol wok we ol i kam aninit long en na long kipim sponsasip mak long level we fanding i ken inapim long en.

**9 - Studen Lon skim**

Ol sumatin we i stap long hevi na ino inap long painim mani long peim fi bilong kos na i stap aninit long grup 3 long ol arapela teserei institutsen tasol i no long yunivesiti em ol bai inap long kisim Studen Lon skim. Em no karamapim ol sumatin we ol koporet bodi o ol arapela kampani i sponsarim ol. Studen lon skim i bilong helpim tasol ol sumatin i skul long ol teseri skul insait long kantri na i no long ausait.

Ol sumatin i mas peim haf o 50 pesen long total fi na putim orijinel risik wantaim lon aplikesen fom na salim i go long opis bilong OHE na ol bai skruim i go.

**10 - Sumatin we TESAS i sponsarim long ol skul we gavman i luksave long ol.**

Akademik Ekselens Skolasip i karamapim ol sumatin we i stadim ol Program gavman i luksave long en na sapotim. Dispela kain skul em

we ol sios na praivet sekta i papa long ol. Mak bilong ol sumatin we i stadi aninit long TESAS program mas noken stap aninit long 1.6 poin averej o i mas gupela moa long ol i ken skruim HECAS sapot.

**11 - Speesil Awod Akademik Ekselens**

- Aninit long Akademik Ekselens Skolasip, 100-pela awod i bilong ol meri
- Fifty (50) i bilong ol medikal studen
- Ol arapela 150 awod i bilong ol sumatin long ol arapela eria

**HECAS**


- Aninit long HECAS, 1,000 awod i bilong ol elijibel meri sumatin
- Dispela speesil awod i go long ol meri sumatin we i edreseim jenda ikwaliti isu.

**12 - Aplikesen long TESAS Awod**

Yu ken kisim ol TESAS Awod aplikesen pepa long studen sevis desk insait long wan wan institutsen long taim bilong rjstresen. Yu ken kisim TESAS Awod long Studen sapot na Skolasip Brens bilong Opis ov Haia Edukesen (OHE). Sapos yu laik kisim ol aplikesen pepa bilong TESAS sapot, lukim ol lain long Studen Support and Scholarship Branch, OHE, P.O.Box 5117, Boroko, NCD.

Man i oraitim ol toktok em:

  
Joseph Sukwianomb (Mr)  
Siaman - CHE

  
Philip Kereme (Ph.D)  
Dairekta Jenerel - OHE

**Table 1 TESAS FEES FOR UNIVERSITIES**

1 Scheme	2 Average Unit Cost (K)	3 Board/Lodging & Tuition Fees		4 Students/Parents Contribution	5 Fee Options		6 State Share		7 Total Fees Per Student Per Ann	8 Grade Point Average
		B/L	Tuition		Residential	Non-Residential	Actual Cash	Hidden Cash		
Academic Excellence	15,000.00	3,150.00	600.00	150.00	150.00	150.00	3,600.00	11,250.00	3,750.00	3.6 - 4
HECAS	15,000.00	3,150.00	600.00	1,050.00	1,050.00	600.00	2,700.00	11,250.00	3,750.00	1.6 - 3.5
Self Sponsor	15,000.00	3,150.00	600.00	3,750.00	3,150.00	600.00	Nil	11,250.00	3,750.00	0.8 - 1.5
Private Department, Corporate and Foreign Government Sponsorship	15,000.00	6,900.00	600.00		7,500.00	3,750.00	Nil	7,500.00	7,500.00	

The category in which a student comes under depends on the Grade Point Average (GPA) a student obtains at the final assessment.

Students with GPA from 3.6 to 4 will come under the Academic Excellence Scholarship scheme.  
Students with GPA from 1.6 to 3.5 will come under the Higher Education Contribution Assistance scheme.  
Students with GPA 0.8 to 1.5 will come under the Self Sponsor scheme.

- Hidden costs are born by the state through the institutions' recurrent budget
- Students under Academic Excellence Scholarship are not eligible for assistance under the loan scheme.
- Students under HECAS and Self-Sponsorship can obtain a loan to pay for their fees.
- Students under Private, Departmental, Corporate Bodies, and Foreign Government sponsorship are not eligible for assistance under the loan scheme.

**Table 2: TESAS FEES FOR NON-UNIVERSITY TERTIARY INSTITUTIONS**

1 Scheme	2 Average Unit Cost (K)	3 Students/Parent's Contribution	4 Private Contribution	5 Fees		6 State's Share	7 Total Fees Per Student Per Annum	8 Grade Point Average
				Residential	Non-Residential			
Academic Excellence	1,875.00	18.75	Nil	18.75	18.75	1,856.00	1,875.00	3.6 to 4
HECAS	1,875.00	131.25	Nil	131.25	131.25	1,743.00	1,875.00	1.6 to 3.5
Self Sponsor	1,875.00	1,875.00		1,875.00	1,875.00	Nil	1,875.00	0.8 to 1.5
Private, Department, Corporate and Foreign Government Sponsorship	1,875.00		1,875.00	1,875.00	1,875.00	Nil	1,875.00	

The category in which a student comes under depends on the student's Grade Point Average (GPA) at the final assessment.

Students with GPA from 3.6 to 4 will come under the Academic Excellence Scholarship.  
Students with GPA from 1.6 to 3.5 will come under the Higher Education Contribution Assistance Scheme [HECAS].  
Students with GPA from 0.8 to 1.5 will come under the Self Sponsorship Scheme.

The loan scheme does not apply to students who are enrolled at non - university institutions except the self-sponsored students, if they can prove that they come from disadvantaged families.

## Telikom i putim ai long winim taitel

DEGI Telikom Bullets i redi tasol long winim taitel bilong Goroka wimens sofbal taitel bihain long gutpela win bilong ol long wiken.

Sapos ksoa Renagi Ralai i holim na strongim tim long wankain pilai ol i bin mekim, Bullets bai gat planti pawa na strong yet long winim taitel long taim bilong fainel ya.

Tim ya i no lusim wanpela gem yet. Kepten Raiz Roslyn Salatiel i go pas long tim wantaim gutpela kain stail na pilai bilong ol ya.

"Dispela taim nau mipela i min bisnis, na mipela bai winim yet," Raiz i toktok long tim bilong em.

Las sisen, kompetisen i no pinis gut na tupela tim Malangan na Bullets i stap wantaim long poin lata.

Bullets i gat sampela ol gutpela pilaia olsem Oddie Kaminiel, Raiz, Iddie Kenny, Sandra Ralai, Theresa Mainge,

### GOROKA SOFBAL RIPOT

Lucy Lakas, Anna Sarea, Roslyn Paguson, Dulsie Gamuta na Rosalyn Kaminiel.

Long Sarere Bullets i waraim stret United Sisters 8-0 na bihain em i go na nekim gen Amagan 11-5 long seken gem.

United Sisters i mas winim Bullets o lus long liklik skoa tasol. Samting tru nogaut, ol i no pilai gut na Bullets i wilwilim ol.

Pitsa bilong Iddie Kenny i no marimari na em i givim strongpela pits we ol pilaia bilong Sisters i painim hat tru.


Maski ol Sisters i gat ol biknem beta olsem Cathy Lai, na tripela pikinini bilong em Andrea, Milred na Cynthia, Mary Womola, Rosa Aige, Agatha McKenzie, Rosario Sam na Jane Titus, ol i no fit long paitim bal bilong pitsa Kenny bilong Bullets.

Bullets i winim tos na ol i bet pas. Ol i no westim taim na Roslyn Angmai na Ester Levi i kam hom.

United Sisters i gat tupela pilaia McKenzie, Aize na Andrea Lai long best tasol ol beta olsem Womola, Cathy Lai na Sylvian i no paitim gut bal long bringim ol i kam hom. Insait long dispela ining, Sisters i gat sans tasol samting tru Bullets i bosim olgeta ining nau.

Bullets i winim 6-pela ran i kam long las tu ining we Anna Sarea, Angmai, Oddie Kaminiel, Dulsie Gamuta, Freda Kaminiel na Kenny long helpim tim bilong ol i winim 8 poin.

Insait long arapela gem, Sisters husat i lus long Bullets i wilwilim Malangan 10-3, Burma Hawks nekim Royals 17-5, Malangan husat i lus long Bullets i wilwilim Amazon 7-0 na Hawks 10-8.



• Patricia Siwin bilong Word Publishing i laik traim rausim bal long han bilong pilaia bilong SP Holding, Word i lus.

# PNGFA wetim yet tok yesa bilong FIFA

### HENRY MORABANG i raitim

PAPUA Niugini Futbal Asosiesen (PNGFA) bai i no inap tokaut long kalenda inap em i kisim tok yesa i kam long FIFA.

Jenerel sekretari bilong PNGFA Ivan Ngahan i tokim Wantok olsem olgeta toktok na samting long kalenda i stap nau wantaim FIFA.

Bikpela ol spot long kalenda em Melanesian Kap we bai i kamap long Fiji long mun Epril 8-15. PNG i givim nem pinis, olsem na opis bilong PNGFA nau bai wok hat long traim painim mani long lukautim dispela wokabaut.

Ngahan i tok olsem em i no klia gut bikos i gat ripot i kamap pinis olsem PNG, Vanuatu na Nu Kaledonia i laik Melanesian Kap i mas kamap long wanpela sentrel ples, olsem Honiara, Solomon Ailans.

Tasol Fiji, wanpela tasol i strong tru olsem Melanesian Kap i ken kamap long wanpela hap tasol em long Suva.

### PNGFA RIPOT

Wanpela miting bilong OFC long Nu Silan las mun i no tok klia yet wanem toktok i tru olsem na Mista Ngahan i no inap mekim planti toktok long dispela Melanesian Kap.

Arapela toktok we i stap nau long han bilong FIFA em 2000 baset bilong PNGFA. Insait long dispela baset, PNGFA i tingting long givim aut mani i go long lokel soka asosisen insait long kantri sapos ol i gat development plen. Dispela mani we i kam long US\$250,000.

Narapela bikpela toktok bilong soka em Futuro 2 - we ol kosa bilong FIFA bai kam insait long kantri long holim ol kos. Ol kos ya em referi, kos-ing, administresen na spot marasin.

Nagahn i tok i gat samting olsem 90 man bai kamap long dispela kos na ol i tingting long holim long Neseneel Spots Institut.

Futuro wantaim Coca Cola Intanesenel bai go pas long holim na ranim dispela kos ya.

## Aihi Dat bai statim kompetisen long Mas

AiHi Dats Asosiesen (ADA) i tingting nau long statim kompetisen propa bilong ol long mun Mas.

Nupela sekretari Philip Sigai i tok dispela kompetisen ya bai stap long namba wan wik bilong dispela mun.

Em i tok em i no laik wankain pasin bilong ol hevi i bagarapim kompetisen na ol grenfainel i no bin kamap. Olsem na em i askim olgeta kepten na sinia pilaia olsem bai i gat wanpela miting i kamap long Februari 17 long Club 96, Negiso. Dispela miting bai stat long 4.30 long apinun.

Sigai i tok dispela miting ya bai toktok strong long lo na rul bilong ol pilai, na wanem ol rul bai ol i bihain.

"Mipela i wok long painim planti hevi bikos i nogat gutpela konstitusen," nupela sekretari i tok.

Sigai i tok "Nau em nupela milenium, na mi stap olsem sekretari,

### DATS RIPOT

mi laik lukim gutpela pilai i mas kamap. Dats em i no pilai we olsem ragbi takol nogat. Em i gutpela spot we olgeta famili memba i ken stap long en."

Em i tok em i askim ol pilaia long noken kros nating bikos yu i no inap kisim wanpela gutpela samting long kros pasin.

Ol eksekutiv i makim pinis olsem wanwan klab bai baim K50 na pilaia rejistresen bai sanap long K12.

Dispela nupela ol fi em bilong helpim ol eksekutiv long painim ol nupela samting long kirapim kompetisen,

Wanem ol tim i gat hevi o laik joinim dispela dat kompetisen, ol i mas ringim Sigai long dispeal telepon namba 4735037.

# Fainens kampani bai helpim

WANPELA fainens kampani long Australia i tingting nau long givim sapat long helpim kompetisen insait long Papua Niugini.

Bikpela eria dispela kampani i tingting long strongim em long sait bilong wok administresen bilong ragbi lig.

Jenerel menesa bilong PNGRFL Kevin Murphy i tokaut long dispela nius bihain long 4-pela bikpela ragbi lig senta i kisim bikpela mekim save long han bilong em. Ol senta ya em Pot Mosbi, Lae, Mt Hagen na Goroka.

Murphy i tok dispela kain helpim i kam long fainens kampani i soim stret olsem ol man i laik helpim ragbi lig.

Dispela helpim i kam long Australia i no bilong ol 4-pela senta tasol, nogat em bilong

### PNGRFL RIPOT

olgeta memba asosiesen bilong PNGRFL.

Olgeta asosiesen bai kisim moa toksave bihain long bot i sindaun na skelim toktok wantaim fainens kampani.

Bihain long toktok bilong saspensen, dispela fainens kampani i tingting nau long kam na helpim ragbi lig.

Dispela ol 4-pela lig i no baim kwik afiliesen olsem na ol i kisim bikpela mekim save ya. Planti ol liklik senta tu i no baim kwik ol dispela pe. tasol olsem bikpela senta, ol i mas go pas wantaim gutpela pasin.

Dispela rot bilong stretim afiliesen i

karamapim dispela ol eria:

- junia lig afiliesen
- rejistresen bilong teknikel opisel bilong wanwan gret
- baim K2,200 afiliesen fi, na
- stretim dinau bilong PNGRFL.

Aninit long seksen 4 bilong konstitusen bilong PNGRFL, wanem ol lig i no baim afiliesen fi bai kisim mekim save, na ol i ken saspensim ol opisel na rausim ol olgeta long noken memba moa long PNGRFL.

I tru olsem planti lig i no baim rejistresen, PNGRFL i saspensim ol bikpela senta bikos ol i mas go pas long soim gutpela pas.

Murphy i tok bot ov dairekta miting long

Januari 24, i pulim mausman bilong 34 lig insait long kantri.

PNGRFL i bin givim ol bikpela taim tru long redim dispela ol afiliesen fi tasol nogat wanpela asosiesen i mekim wanpela samting. Na tu PNGRFL tu i kamapim wanpela kalenda we olgeta asosiesen i kisim.

Insait long kalenda i tokaut olsem:

\* lig na klab afiliesen bilong 2000 bai pas long Septemba 25. Olgeta wanwan presiden i kisim dispela notis long Julai 24 las ya.

\* PNGRFL i salim notis long baim K2,200 na ol rejistresen fi bilong olgeta teknikel opisel.

Murphy bai makim ol administreta bilong lukautim dispela ol foapela lig.





# Wiken Spot Dro

## PORT MORESBY WOMENS SOFTBALL ASSOCIATION 1999/2000 SEASON PROPER Week 19 - Game 15 Saturday February 12, 2000

### Diamond 3

0900	Admiralty vs Gazelle	B
1030	Norths vs Malangan	A
1200	Wantoks vs Gazelle	A
1330	All Stars vs Chebu	A
1500	AB Bears vs Mazda	A

### Diamond 2

0900	Sunkist vs Chebu	C
1030	All Stars vs Sunkist	B
1200	Dolphins vs Admiralty	C
1330	Norths vs Malangan	C

Wantoks "C" grade and AB Bears "B" grade automatically collects two points as Sharks and Mazda have been dropped for three consecutive forfeits.

Dolphins "B" Grade bye

This is the washout game dated 27/11/99

## NEGISO CUP DART

Thursday February 10, 2000

### Board One

Salamanda (1) vs PNG Spts Comm

### Board Two

Sol vs TNT Air Cargo

### Board Three

Telikom vs Royals

### Board Four

Lcia vs Sala (2)

### Board Five

Arnotts vs Subway Lodge

## NCD PUBLIC SERVANTS SOCCER

Week Thirteen

Saturday February 12, 2000

### University Toa One

0830	M1	NCDC vs NSO
0945	W1	NSO vs NCDC
1100	M1	Cellnet vs NPF
1205	W1	NPF vs Cellnet
1305	W1	Education vs Fisheries
1420	M1	Fisheries vs Education
1533	M2	NCC vs Harbours (reschedule game)

### University Toa Two

0830	M2	A/General vs Elcom
0945	W2	Elcom vs A/General
1100	M2	BPNG vs Commerce
1205	W2	Commerce vs BPNG
1305	M2	UPNG vs Works
1420	W2	Works vs UPNG
1520	M2	Air Niugini vs NBC

Bye: Pool One Post PNG (Man/Woman)

## Sunday, February 13, 2000.

0830	M1	Transport vs Teachers
0945	W1	Teachers vs Transport
1100	M1	NAQIA vs Police
1205	W1	Police vs NAQIA
1305	W1	DCA vs PNGBC
1420	M1	PNGBC vs DCA
1535	M2	A/Niugini vs Works (reschedule game)

### University Toa Two

0830	M2	NCC vs Defence
0945	W2	Defence vs NCC
1100	W2	NBC vs A/Niugini
1200	M2	Harbours vs Telikom
1310	W2	Telikom vs Harbours
1415	W2	IRC vs POSF
1515	M2	POSF vs IRC

Pool Two Health (Man/Woman)

## NCDPSSA POINTS LADDER February 4, 2000

### Mens Pool One

Team	GP	W	D	L	GF	GA	PTS
NPF	11	8	1	2	21	12	22
PNGBC	10	6	4	0	13	5	21
Education	10	6	2	2	14	8	19
Cellnet	11	5	2	4	11	6	17
Police	11	5	2	4	15	14	16
Fisheries	10	4	3	3	13	8	15
Teachers	10	4	3	3	11	10	14
Post PNG	11	3	5	3	15	17	13
Transport	10	2	3	5	10	11	9
NSO	10	2	3	5	5	10	8
NAQIA	10	2	3	5	5	11	8
DCA	11	2	3	6	10	18	7
NCDC	10	2	2	6	7	14	6
Pangtel	3	0	0	3	0	6	0

### Womens Pool One

Education	9	7	2	0	14	0	23
Police	10	7	1	2	14	6	22
NPF	10	6	2	2	10	5	20
Cellnet	10	6	1	3	13	9	19
Teachers	8	5	3	0	6	0	18
NAQIA	9	3	3	3	8	8	12
PNGBC	8	3	1	4	6	6	10
Fisheries	10	2	4	4	11	11	10
NCDC	7	2	1	4	6	8	7
Transport	8	1	4	3	4	10	7
NSO	8	1	2	6	7	13	5
DCA	9	1	2	6	4	13	5
Post PNG	9	0	4	5	3	14	4
Pangtel	3	0	0	3	0	6	0

### Week Eleven

### Mens Pool Two

A/Niugini	8	7	1	0	19	5	22
A/General	9	6	2	1	17	5	20
BPNG	10	5	4	1	13	9	19
Elcom	9	4	3	2	15	7	15
POSF	9	4	2	3	10	6	14
Telikom	8	4	1	3	9	7	13
NCC	9	4	1	4	11	10	13
Works	8	3	3	2	9	7	12
Harbours	8	3	2	3	7	8	11
UPNG	9	3	2	4	10	15	11
Defence	10	3	2	5	7	12	11
Health	9	2	2	5	10	18	8
Commerce	10	2	1	7	8	19	7
IRC	8	1	1	6	6	13	4
NBC	8	1	1	6	4	14	4

### Womens Pool Two

BPNG	10	7	3	0	12	1	24
UPNG	9	6	2	1	12	2	20
Defence	10	5	3	2	20	6	18
A/General	9	5	3	1	13	1	18
Works	9	5	2	2	10	6	17
Telikom	9	4	4	1	9	1	16
Elcom	9	5	1	3	10	5	16
POSF	9	5	0	4	7	9	15
IRC	9	3	2	4	8	7	11
Harbours	9	3	1	5	7	10	10
Air Niugini	9	3	0	6	6	15	9
Health	10	2	1	7	7	18	7
NCC	10	2	0	8	4	16	6
Commerce	10	2	0	8	4	20	6
NBC	9	1	2	6	3	15	5

## PORT MORESBY PRIVATE COMPANIES NETBALL

Sunday February 13th 2000

Minor/Major semi finals

### Division 1 - Court 1

2:25	SPH 1 vs CCA
3:10	Fairdeal vs Post 1

### Division 2 - Court 2

2:25	Brian Bell 1 vs EFM
3:10	STC 1 vs Faywhite

### Division 3 - Court 3

2:25	BSP 1 vs Kenmore 1
3:10	National vs STC 2

### Division 4 - Court 4

2:25	BAT 1 vs MBA 1
3:10	Paterson vs Arnotts

### Division 5 - Court 5

2:25	Eda Ranu 1 vs Islander Travelodge
3:10	MBA 2 vs Mobil

### Division 6 - Court 1

1:00	Air Niugini vs Kenmore 2
1:45	PNGFM vs Lamana

### Division 7 - Court 2

1:00	ANZ 1 vs Avis
1:45	Century vs Eda Ranu 2

### Division 8 - Court 3

1:00	Oil Search vs Curtains
1:45	Ericssons vs Datec 2

### Division 9 - Court 4

1:00	BDW vs Kina Securities
1:45	Renos vs MJ Dwyers

### Division 10 - Court 5

1:00	IBS vs PWHC
1:45	Gordon DMK-IEA vs Bank Hawaii



### Division 11 - Courts 6

1:00	STC 3 vs Hastings
1:45	Car Care Centre vs House Build Construction



# ZENAG - Gutpela kiau

# WANTOK SPOT



## Manus salensim PNGAU

MANUS Provinsal Edministresen i salensim PNG Atletik Yunion long bihain profesenel we long holim na ranim ol nesenel sempionsip.

Spots kodineta bilong Manus Jack Changau i tok Manus i save stap insait long planti nesenel sempionsip we PNGAU i no save ranim gut.

Sampela ol hevi i save kamap em ol ikvipmen, na nogat opening na closing seremoni na nogat spika long mekim ol toktok, na planti ol samting ya em bilong planti yia, yia na mun.

"Mipela nau i satp long nupela milenium, na gutpela ol program i mas kamap long ranim ol nesenel sempionsip," Changau i tok.

Changau i tok olsem em i bin oge-naisim Manus Milenium las yia, na i bin askim PNGAU presiden Tony Green long sampela helpim tasol em i kirap na bagarapim gutpela wok bilong en.

Tasol Changau i no harim toktok na go het long holim dispela marathon we Gavana Stephen Pokawin i givim K10,000 olgeta wantaim helpim i kam long Papindo Trading kampani.

### ATLETIK RIPOT

Em i tok wok redi i stat nau we arapela maraton resis bai kamap long Septemba long Manus. Em i tok em bai salim na askim olgeta top maraton rana insait long kantri long i ken stap na resis long em.

Atletik sisen bilong Manus bai stat long Mas 18. Ol kain resis bai kamap em resis, maraton, 5km, na 10-pela resis long rot na provinsal sempions, nesenel sempionsip na maraton.

Presiden bilong PNGAU Tony Green i tok em i no laik mekim toktok long dispela bikos em i no bikpela samting tumas.

Bikpela astingting long mi no sapatim em, Manus i ken yusim dispela mani long sapatim ol yangpela man na meri husat i ken kamapim nem long bikpela sempionsip.

Atletik insait long kantri em i no save kisim bikpela sapat, na Manus i nap sapatim wanem spotsman o meri husat i ken makim Manus long nesenel sempionsip o intanesenel tonamen.



• Wanpela soka tim husta i save pilai long Pablik Sevans soka resis.

# Tupela opisel paia long presiden

TUPELA sinia opisel bilong PNG Basketbal Federesen (PNGBF) i guria stret long harim olsem presiden bilong PNGBF Robert Kopaol i saspensim ol.

Las wik Mista Kopaol i tokaut olsem em bai saspensim tresera Yapi Delabu na sekretari jenerel Martin Surab bikos ol i no mekim gut wok olsem opisel bilong PNG Basketbal Federesen.

Em i tok tupela eksekutiv ya i no kamapim ripot, na tu salim ol notis i go long ol asosiesen.

Tupela mani i tok Mista Kopaol em i wok long laik wokim nem bilong em yet na i no gat wanpela gutpela aidia bilong basketbal.

### PNG BASKETBAL RIPOT

Delabu na Surab i tok dispela disisen bilong saspensim ol i no kam long PNGBF, em i tingting bilong Kopaol tasol. Na ol i askim sapos Kopaol i ken lusim wok presiden bikos em i bagarapim nem bilong basketbal.

"Sapos mipela i bihainim bai-lo, dispela saspensin em i no bihain tru rot. Mipela ol eksekutiv i no holim wanpela miting liklik, na mipela i laik save wanem samting nau i wok long kamap long nesenel federesen."

Tupela opisel i askim Kopaol long tok sore long ol basketbal

sapota na pipel, na askim olgeta memba asosiesen long stap isi na noken joinim dispela tok kros i kamap namel long ol eksekutiv.

Judiseri bilong PNGBF i no mekim wanpela wok liklik inap 5-pela yia, na ol i nogat pawa long mekim dispela wok.

"Dispela risen bilong Kopaol i no redim fainensel ripot i no tru, bikos ripot ya i bin redim na ol i tokaut long em long anuel jenerel miting long 1998 AGM," tupela i tok.

Ripot ya i no audited tasol olgeta wanwan memba asosiesen i wanbel long dispela fainensel ripot.

NA wankain pasin tu i bin kamap we olgeta ripot long miting ya em ol i salim pinis i go long olgeta memba asosiesen.

Delabu na Surab i no amamas long pasin bilong Robert Kopaol na askim em long risain.

Tupela nau bai i nogat bilip long wok wantaim kain pasin bilong Kopaol bikos em i wok long bos tumas.

Nau yet i gat planti wantok sistem, na ol PNGBF i kain planti ol kainkain liklik akaun long mekim wok.

"Ol asosiesen i makim mipela, na mipela olgeta bai lusim wok

sapos ol dispela memba asosiesen i rausim mipela," tupela i tok olsem.

Taim bilong tupela long holim opis bai paia long 2002. Na anuel jenerel miting tasol bai tokaut long sapos ol i ken holim wok yet o nogat.

PNGBF i laik stap yet olsem wanpela strongpela na nesenel spot, Delabu na Surab i laik Mista Robert Kopaol i mas risain.

Sapos Kopaol i les long risain, ating tupela bai kisim dispela tok-tok i go long kot long stretim.

Surb na Delabu i save stap long Lae.

Em i Gutpela  
Em i Tuna  
Em i bilong  
PNG stret...

PROUDLY



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.